

## ISAYA

<sup>1</sup> Chiratidzo chaIsaya mwanakomana waAmozi, chaakaona pamusoro peJudha neJerusarema pamazuva aUzia naJotamu, naAhazi naHezekia, madzimambo eJudha.

### *Rudzi Runomukira*

<sup>2</sup> Inzwai imi matenga! Teerera iwe nyika!

Nokuti Jehovha akataura achiti,  
“Ndakarera vana ndikavakudza,  
asi ivo vakandimukira.

<sup>3</sup> Nzombe inoziva vatenzi vayo,  
nembongoro inoziva chidyiro chomwene  
wayo,

asi Israeri haizivi,  
vanhu vangu havanzwisisi.”

<sup>4</sup> Haiwa, rudzi runotadza,  
vanhu vakaremerwa nezvakaipa,  
vana vavaiti vezvakaipa,  
vana vanoita zvakaora!

Vakasiya Jehovha;  
vakashora Mutsvene waIsraeri  
vakamufuratira.

<sup>5</sup> Mucharambireiko muchingorohwa?  
Munorambireiko muchimukira Jehovha?

Musoro wenyu wose wakuvadzwa,  
mwoyo wenyu wose warwadziwa.

<sup>6</sup> Kubvira pasi porutsoka rwako kusvikira pan-  
hongonya yomusoro  
wako hapana pakukutu,  
anongova maronda nokurwadziwa

namavanga akazaruka,  
asina kusukwa kana kusungwa  
kana kuzorwa mafuta.

<sup>7</sup> Nyika yenyu yaparadzwa,  
Maguta enyu apiswa nomoto;  
minda yenyu iri kutorwa navatorwa  
pamberi penyu chaipo,  
nyika yaparadzwa sapanoparadza vatorwa.

<sup>8</sup> Mwanasikana weZioni asiyiwa sedumba  
mumunda wemizambiringa,  
seimba mumunda wamanwiwa,  
seguta rakakombwa.

<sup>9</sup> Dai Jehovha Wamasimba Ose  
asina kutisiyira vakapunyuka,  
tingadai takafanana neSodhomu,  
tingadai takaita seGomora.

<sup>10</sup> Inzwai shoko raJehovha,  
imi vabati veSodhomu;  
teererei kumurayiro waMwari wedu,  
imi vanhu veGomora!

<sup>11</sup> “Zvibayiro zvenyu zvizhinji,  
zvinyiko kwandiri?” ndizvo zvinotaura Je-  
hovha.

“Zvibayiro zvinopiswa zvawandisa,  
zvamakondobwe namafuta ezvipfuwo  
zvakakodzwa;  
Handifadzwi neropa renzombe,  
ramakwayana nerembudzi.

<sup>12</sup> Pamunouya kuzozviratidza pamberi pangu,  
ndianiko akambokukumbirai izvi kwamuri,  
naikoku kutsika-tsika pavazhe dzangu?

13 Regai kuuya nezvipiriso zvisina maturo!  
 Zvinonhuhwira zvenyu zvinondinyangadza.  
 Nguva dzoKugara kwoMwedzi, maSabata nen-  
 guva dzekokorodzano,  
 handigoni kufarira ungoro dzenyu dza-  
 kaipa.

14 Mitambo yenyu yoKugara kwoMwedzi nemi-  
 tambo yenyu yakatsaurwa inovengwa  
 nomweya wangu.

Zvava mutoro kwandiri;  
 ndaneta nokuzvitakura.

15 Pamunotambanudza maoko enyu  
 muchinyengetera,

ini ndichakuvanzirai chiso changu;  
 kunyange mukawanza munyengetero,  
 handisi kuzokunzwi.

Maoko enyu azere neropa;  
<sup>16</sup> shambai muzvinatse.

Bvisai mabasa enyu akaipa  
 pamberi pangu!

Regai kuita zvakaipa,

<sup>17</sup> dzidzai kuita zvakarurama.

Tsvakai kururamisira,  
 kurudzirai vakamanikidzwa.

Dzivirirai nherera,  
 mukumbirire chirikadzi.

18 “Chiuyai zvino titaurirane,”  
 ndizvo zvinotaura Jehovha.

“Kunyange zvivi zvenyu zviri  
 zvitsvuku zvichachena sechando;  
 kunyange zviri zvishava somuti mushava,  
 zvichaita samakushe amakwai.

19 Kana muchida uye muchiteerera

- muchadya zvakanakisa zvenyika;  
 20 asi kana muchiramba uye muchindimukira,  
 muchaparadzwa nomunondo.”  
 Nokuti muromo waJehovha wazvi-  
 taura.
- 21 Tarirai guta rakatendeka  
 rava chifeve sei!  
 Iro rakanga rizere nokururamisira;  
 kururama kwaigara mariri,  
 asi zvino mogara mhondi!
- 22 Sirivha yako yava nengura,  
 waini yako yakavhenganiswa nemvura.
- 23 Machinda ako vapanduki,  
 ishamwari dzembavha;  
 vose vanoda fufuro,  
 uye vanomhanyira zvipo.  
 Havana hanya nokudzivirira nherera;  
 mhaka yechirikadzi haiuyiswi pamberi  
 pavo.
- 24 Naizvozvo Ishe, Jehovha  
 Wamasimba Ose, Anesimba waIsraeri, ano-  
 taura achiti,  
 “Haiwa, ndichadurura hashu dzangu pamusoro  
 pavadzivisi vangu,  
 nokuzvitsivira vavengi vangu.
- 25 Ndichatambanudzira ruoko rwangu kwauri;  
 ndichapedza chose ngura yako  
 ndigobvisa kusachena kwako kwose.
- 26 Ndichadzosea vatongi vako sapamazuva  
 akare,  
 namakurukota ako sapamazuva okutanga.  
 Shure kwaizvozvo uchanzi  
 Guta Rokururama,

Guta Rakatendeka.”

- 27 Zioni richadzikinurwa nokururamiswa,  
navanotendeuka varo, nokururama.
- 28 Asi vapanduki navatadzi vachaparadzwa vose,  
uye vose vanosiya Jehovha vachaparara.
- 29 “Nokuti muchanyadziswa nokuda kwemiti  
yomuouki yamunoeresa,  
yamunofadzwa nayo;  
muchanyadziswa nokuda kwamapindu  
amakasarudza.
- 30 Muchafanana nomuouki wasvava mashizha,  
sebindu risina mvura.
- 31 Murume ane simba achava serwodzi  
nebasa rake sesasaradzi;  
zvose zvichatsva pamwe chete,  
pasina achadzima moto.”

## 2

### *Gomo raJehovha*

1 Izvi ndizvo zvakaonekwa naIsaya  
mwanakomana waAmozi, pamusoro peJudha  
neJerusarema:

2 Mumazuva okupedzisira,  
gomo retemberi yaJehovha richasimbiswa,  
richava guru pakati pamakomo;  
richakwiridzirwa pamusoro pezvikomo,  
uye ndudzi dzose dzichamhanyira kwariri.

3 Ndudzi zhinji dzichauya dzichiti,  
“Uyai ngatiendei kugomo raJehovha,  
kuimba yaMwari waJakobho  
Iye achatidzidzisa nzira dzake,

kuitira kuti tigofamba mumakwara ake.”  
 Nokuti murayiro uhabva paZioni,  
 shoko raJehovha richabva kuJerusarema.  
<sup>4</sup> Achatonga pakati pendudzi  
 uye achapedza gakava pakati pamarudzi  
 mazhinji.  
 Vachapfura minondo yavo vagoiita miromo ya-  
 magejo,  
 namapfumo avo vagoaita mapanga  
 okuchekerera miti nawo.  
 Rudzi rumwe harungazosimudziri munondo  
 kuno rumwe rudzi,  
 kana kuzodzidzirazve kurwa.  
<sup>5</sup> Uyai, imi imba yaJakobho,  
 ngatifambei muchiedza chaJehovha.

### *Zuva raJehovha*

<sup>6</sup> Nokuti makasiya vanhu venyu,  
 ivo imba yaJakobho.  
 Vakazara nezvinamato zvokuMabvazuva;  
 vanoita zvokuvuka kufanana navaFiristia,  
 vachibatana maoko nevedzimwe ndudzi.  
<sup>7</sup> Nyika yavo izere nesirivha negoridhe;  
 pfuma yavo haiperi.  
 Nyika yavo izere namabhiza;  
 ngoro dzavo hadziperi.  
<sup>8</sup> Nyika yavo izere nezvifananidzo;  
 vanopfugamira mabasa amaoko avo,  
 kuzvinhu zvakaitwa neminwe yavo.  
<sup>9</sup> Naizvozvo munhu achaderedzwa  
 uye marudzi avanhu achaninipiswa,  
 musavakanganwira.

<sup>10</sup> Pinda mumapako,

- uvande muguruva,  
 ubve mukutyisa kwaJehovha  
 nokubwinya kwoumambo hwake!
- 11 Meso omunhu anozvikudza achaninipiswa,  
 uye kuzvikudza kwavanhu kuchaderedzwa;  
 asi Jehovha oga ndiye achakudzwa pazuva iro.
- 12 Nokuti Jehovha Wamasimba Ose  
 ane zuva raakachengetera avo vose  
 vanozvikudza navanodada,  
 navose vanokudzwa (uye vachaninipiswa),
- 13 nemisidhari yose yeRebhanoni, yakareba  
 neyakakwirira,  
 nemiouki yose yeBhashani,
- 14 namakomo ose akakwirira,  
 nezvikomo zvose zvakakwirira,
- 15 neshongwe dzose dzakakwirira,  
 namasvingo ose akasimba,
- 16 nezvikepe zvose zveTashishi,  
 nemidziyo yose yakanaka.
- 17 Kuzvikudza kwomunhu kuchaderedzwa,  
 uye kuzvikudza kwavanhu kuchaninipiswa;  
 Jehovha oga ndiye achakudzwa pazuva iro,  
 18 uye zvifananidzo zvichapera zvachose.
- 19 Vanhu vachatizira kumapako amatombo,  
 nokumwena yapasi  
 nokuda kwaJehovha anotyisa,  
 uye nokubwinya kwoumambo hwake,  
 paanosimuka achizungunutsa nyika.
- 20 Pazuva iro vanhu vacharasira  
 kumakonzo nokuzviremwaremwa,

zvifananidzo zvavo zvesirivha nezvifananidzo  
zvegoridhe,

zvavakaita kuti vazvinamate.

<sup>21</sup> Vachatizira kumapako amatombo

nokumikaha yakaremba,

nokuda kwokutya Jehovha,

uye nokubwinya kwoumambo hwake,

paanosimuka kuti azungunutse nyika.

<sup>22</sup> Regai kuvimba nomunhu,

anongova nokufema mumhino dzake.

Anobatsireiko?

### 3

#### *Kutongwa kweJerusarema neJudha*

<sup>1</sup> Tarirai zvino, Ishe Jehovha

Wamasimba Ose

ava kuda kutora zvose rutsigiro nomudonzvo,

kubva kuJerusarema neJudha;

rutsigiro rwose rwezvokudya norutsigiro rwose  
rwemvura,

<sup>2</sup> mhare nomurwi,

mutongi nomuprofiti,

muvuki nomukuru,

<sup>3</sup> mukuru wamakumi mashanu nomunhu

anokudzwa,

gurukota nomurume weumhizha, nomuvuki

anoziva.

<sup>4</sup> Ndichaita kuti majaya ave vabati vavo;

vana vadiki ndivo vachavatonga.

<sup>5</sup> Vanhu vachadzvinyirirana,

munhu nomunhu,

muvakidzani

nomuvakidzani.

Vadiki vachamukira vakuru,



nounozvidza achamukira anokudzwa.

<sup>6</sup> Murume achabata mumwe wavanun'una vake  
paimba yababa vake achiti,

“Ndiwe une ngu, chiva mutungamiri wedu;  
iva mutariri wedutu roungwandangwanda  
uhu!”

<sup>7</sup> Asi pazuva iro achadanidzira achiti,  
“Handigoni kugadzirisa zvinhu.

Handina chokudya kana chokufuka mumba  
mangu;  
musandiita mutungamiri wavanhu.”

<sup>8</sup> Jerusarema rozungunuka,  
Judha riri kuwa;

mashoko avo nezviito zvavo zvinopesana naJe-  
hovha,  
vachizvidza kuvapo kwake kunobwinya.

<sup>9</sup> Zvinoonekwa pazviso zvavo zvinovapupurira;  
vanoburitsa chivi chavo pachena seSod-  
homu;  
havambochivanzi.

Vane nhamo!

Vanouyisa njodzi pamusoro pavo.

<sup>10</sup> Udzai vakarurama kuti zvichavanakira,  
nokuti vachanakirwa nezvibereko zvam-  
abasa avo.

<sup>11</sup> Vane nhamo vakaipa! Njodzi yava kuda  
kuvawira!  
Vacharipirwa zvakabatwa namaoko avo.

<sup>12</sup> Vadiki vanomanikidza vanhu vangu,  
vakadzi vanovatonga.

Haiwa, vanhu vangu, vatungamiri venyu  
vanokutsausai;  
vanokubvisai munzira.

<sup>13</sup> Jehovha anotora nzvimbo yake muimba yokutonga;  
anosimuka kuti atonge vanhu.

<sup>14</sup> Jehovha anopinda mukutonga vakuru  
navatungamiri vavanhu vake achiti,  
“Ndimi makaparadza munda wangu womuzambiringa;  
zvapakambwa zvinobva kuvarombo zvirimudzimba dzenyu.

<sup>15</sup> Munoreveiko zvamunopwanya vanhu vangu,  
uye muchikuya zviso zvavarombo?”  
ndizvo zvinotaura Ishe Jehovha Wamasimba Ose.

<sup>16</sup> Jehovha anoti,  
“Vakadzi veZioni vanozvikudza,  
vanofamba vakamisa mitsipa yavo.  
Vachichonya nameso avo,  
uye vanofamba vachinzenzeta,  
vaine zvishongo zvinorira muzvizo zvakumbo avo.

<sup>17</sup> Naizvozvo Jehovha achauyisa marondapamisoro yavakadzi veZioni;  
Jhovha achaitisa misoro yavo mhanza.”

<sup>18</sup> Pazuva iro Jehovha achabvisa pazvizo zvakumbo avo: mabhenguro, nezvishongo zvomusoro, neungetani hwomutsipa hunon’aima, <sup>19</sup> nemhete dzenzeve, nezvingetani zvomumaoko, namavhoiri <sup>20</sup> nezvishongo

zvebvudzi, nezvingetani zvomuzvizo  
 zvamakumbo, nemasikavha, namabhodhoro  
 amafuta anonhuhwira, namazango, <sup>21</sup> nemhete,  
 noukomba hwemhino, <sup>22</sup> nenguu dzakanaka  
 dzomutambo, nezvijasi, namakepesi namajasi  
 nezvikwama, <sup>23</sup> nezvionioni, nenguu  
 dzomucheka wakaisvonaka, nezvishongo  
 namashaweri.

<sup>24</sup> Pachinzvimbo chezvinonhuhwira, pachava  
 nokunhuhwa;  
 pachinzvimbo chesikavha, pachava  
 netambo;  
 pachinzvimbo chebvudzi rakashongedzwa  
 zvakana, pachava nemhanza; pachinzvimbo chem-  
 batya dzakaisvonaka, pachava nechipfeko  
 chesaga;  
 pachinzvimbo chorunako, pachava  
 nokupiswa.

<sup>25</sup> Varume venyu vachafa nomunondo,  
 varwi venyu vachafa muhondo.

<sup>26</sup> Masuo eZioni achachema uye achaungudza;  
 nokutambura kwaro, richagara pasi.

## 4

<sup>1</sup> Pazuva iro vakadzi  
 vanomwe vachabata murume mumwe  
 vagoti,

“Tichadya zvokudya zvedu  
 uye tichazvitsvakira zvokufuka.  
 Tinongoda kudanwa nezita rako bedzi.  
 Bvisa kunyadziswa kwedu!”

*Davi raJehovha*

<sup>2</sup> Pazuva iro, davi raJehovha richava rakanaka uye richabwinya, uye zvibereko zvenyika zvichava chidadiso nokukudzwa kwavakapunyuka muIsraeri. <sup>3</sup> Vaya vakasara muZioni, navakasara muJerusarema, vachanzi vatsvene, navose vakanyorwa pakati pavapenyu muJerusarema. <sup>4</sup> Jehovha achashambidza tsvina yevakadzi veZioni; achanatsa makwapa eropa kubva muJerusarema nomweya wokutonga uye nomweya womoto. <sup>5</sup> Ipapo Jehovha achasika pamusoro pegomo rose reZioni napamusoro pavose vanoungana ikoko gore routsi masikati nezhenje romoto unopfuta usiku; pamusoro pokubwinya kwose pachava nechidzitiro. <sup>6</sup> Chichava chifukidzo nomumvuri kubva pakupisa kwezuva, noutiziro, nenzvimbo yokuvanda kubva padutu nemvura inonaya.

## 5

### *Rwiyo rwoMunda weMizambiringa*

<sup>1</sup> Ndichaimbira mudiwa wangu  
rwiyo pamusoro pomunda wake wemizam-  
biringa:  
Mudiwa wangu akanga ane munda wake wem-  
izambiringa,  
pachikomo chakaorera.

<sup>2</sup> Akautimbira akabvisa mabwe  
akasimamo mazambiringa akaisvonaka.  
Akavaka shongwe mukati mawo  
uye akauchererawo chisviniro chewaini.  
Ipapo akatarisa kuti awane zvibereko zva-  
mazambiringa akanaka,

asi iwo wakangobereka muchero wakaipa chete.

<sup>3</sup> “Zvino imi vagari vomuJerusarema nemi varume veJudha, chitongai pakati pangu nomunda wemizambiringa wangu.

<sup>4</sup> Chiiko chimwezve chaifanira kuitirwa munda wangu wemizambiringa chandisina kuuitira?

Pandakatsvaka mazambiringa akanaka, wakagoberekerei akaipa oga?

<sup>5</sup> Zvino ndichakuudzai zvandichaitira munda wangu wemizambiringa:

Ndichabvisa ruzhowa rwawo, ugoparadzwa;

ndichaputsa rusvingo rwawo, ugochatsikwa-tsikwa.

<sup>6</sup> Ndichauita nzvimbo yamarara, hauzochekererwi kana kusakurirwa, uye minzwa norukato zvichakuramo.

Ndicharayira makore kuti arege kunayisa mvura pamusoro pawo.”

<sup>7</sup> Munda womuzambiringa waJehovha Wamasimba Ose ndiwo imba yaIsraeri, uye varume veJudha ndivo bindu rake rinomufadza.

Zvino akatarisira kururamisira asi akaona kuteuka kweropa; akatsvaka kururuma, asi akanzwa kuchema kwokutambudzika.

*Nhamo noKutongwa*

- 8 Mune nhamo imi munowedzera dzimba nedz-  
imba  
uye munobatanidza munda nomunda,  
kusvikira pasisina nzvimbo yasara,  
mugogara moga munyika.
- 9 Jehovha Wamasimba Ose akataura ndich-  
inzwa akati,  
“Zvirokwazvo dzimba zhinji dzichava matongo,  
dzimba huru dzakanaka dzichashaya vanog-  
aramo.
- 10 Maeka gumi omunda wemizambiringa  
achabereka bhati rimwe chete\* rewaini,  
uye homeri† rembeu richabereka efa‡ imwe  
chete rezviyo.”
- 11 Vane nhamo avo vanomuka mangwanani  
kuti vatsvake doro rinodhaka,  
vanogara kusvikira usiku,  
kusvikira vapengeswa newaini.
- 12 Vanenge vane rudimbwa,  
nemitengeranwa pamabiko avo,  
namatambureni, nenyere newaini,  
asi havana hanya namabasa aJehovha, ha-  
vana rukudzo nebasa ramaoko ake.
- 13 Naizvozvo vanhu vangu vachapinda muu-  
tapwa,  
nokuda kwokushayiwa zivo;  
vanokudzwa vavo vachafa nenzara,  
uye vazhinji vavo vachafa nenyota.
- 14 Naizvozvo gehena rakawedzera kukara kwaro,  
uye rakazarura muromo waro zvinodarika  
mwero;

---

\* 5:10 5:10 marita angaita 22 † 5:10 5:10 marita angaita 220

‡ 5:10 5:10 marita angaita 22

mariri muchaburukira vanokudzwa vavo  
 nevoruzhinji,  
 navose vanokakavara vavo navanofara  
 vavo.

15 Naizvozvo munhuwo zvake achadzikiswa,  
 marudzi avanhu achaninipiswa,  
 nameso avanozvikuza achaninipiswa.

16 Asi Jehovha Wamasimba Ose achakudzwa,  
 nokuda kwokururamisira kwake, uye  
 Mwari,  
 mutsvene achazviratidza pachake kuti  
 mutsvene, mukururama kwake.

17 Ipapo makwai achafura saari mumafuro awo;  
 makwayana achadya pakati pamatongo  
 avapfumi.

18 Vane nhamo avo vanokweva chivi nerwodzi  
 rwokunyengera,  
 uye zvakaipa sezvinenge mabote engoro,

19 uye nevanoti, “Mwari ngaakurumidze,  
 ngaachimbidzike nebasa  
 rake kuti tirione.

Ngarisvike,  
 urongwa hwoMutsvene waIsraeri ngahu-  
 uye,  
 kuti tihuzive.”

20 Vane nhamo avo vanoti zvakaipa  
 ndizvo zvakana, uye zvakana  
 ndizvo zvakaipa, vanoisa rima  
 panzvimbo yechiedza nechiedza  
 panzvimbo yerima, vanoisa zvinovava  
 panzvimbo yezvinotapira,  
 nezvinotapira panzvimbo yezvinovava.

21 Vane nhamo avo vanoti vakachenjera pameso avo,  
uye vakangwara pakuona kwavo.

22 Vane nhamo avo vanova mhare pakunwa waini,  
uye shasha pakuvhenganisa zvokunwa zvinodhaka,

23 vanopembedza ane mhosva nokuda kwefufuro,  
asi vanoramba kururamisira vasina mhosva.

24 Naizvozvo, samarimi omoto anonanzva mashanga,  
uye souswa hwakaoma hunomedzwa nemirazvo yemoto,

naizvozvo midzi yavo ichaora  
uye maruva avo achapeperetswa seguruva;  
nokuti vakaramba murayiro waJehovha Wamasimba Ose,  
uye vakazvidza shoko roMutsvene waIsraeri.

25 Naizvozvo kutsamwa kwaJehovha kwopfuta pamusoro pavanhu vake;  
ruoko rwake rwasimudzwa uye anovarovera pasi.

Makomo anozungunuka,  
uye mitumbi yavakafa yaita samarara mumigwagwa.

Kunyange zvakadaro nokuda kwezvose izvi,  
kutsamwa kwake hakuna kudzorwa, ruoko rwake rwaramba rwakasimudzwa.

26 Anosimudzira ndudzi dziri kure mureza,



anoridzira muridzo kuna avo vari kumigumo yenyika.

Havo vouya, nokukurumidza  
uye nokuchimbizika!

27 Hapana kana mumwe wavo anoneta kana kugumburwa,  
hapana kana mumwe wavo achakotsira kana kuvata;  
hapana kana bhanhire richasunungurwa pachino,  
hapana kana rukanda r weshangu ruchadambuka.

28 Miseve yavo inopinza,  
uta hwavo hwose hwakakungwa;  
mahwanda amabhiza avo anenge omusarasara,  
mavhiri engoro dzavo akaita sechamupupuri.

29 Kuomba kwavo kwakaita sokweshumba,  
vanoomba kufanana neshumba diki;  
vanodzovova pavanobata mhuka yavo vagoitakura pasina kana angairwira.

30 Pazuva iro vachaomba pamusoro payo,  
sokutinhira kwegungwa.

Uye kana mumwe akatarisa panyika,  
achaona rima nokutambudzika;  
kunyange chiedza chichasvibiswa namakore.

## 6

### *Kutumwa kwaIsaya*

<sup>1</sup> Mugore rakafa Mambo Uziya, ndakaona Ishe agere pachigaro choushe, chirefu chakakwirira

uye mupendero wenguo dzake wakazadza temberi. <sup>2</sup> Kumusoro kwake kwaiva neserafimi, imwe neimwe yaiva namapapiro matanhatu: namapapiro maviri, dzakafukidza uso hwadzo, namaviri dzakafukidza makumbo adzo, uye namaviri dzakanga dzichibhururuka. <sup>3</sup> Zvino imwe yaidanidzira kune imwe ichiti:

“Mutsvene, mutsvene, mutsvene, iye Jehovha Wamasimba Ose; nyika yose izere nokubwinya kwake.”

<sup>4</sup> Nokutinhira kwamanzwi adzo, nheyo dzezvikumbaridzo dzakazungunuka uye temberi yakazadzwa noutsu.

<sup>5</sup> Ipapo ndakachema ndichiti, “Ndine nhamo! Ndaparara! Nokuti ndiri munhu ane miromo ine tsvina uye ndigere pakati pavanhu vane miromo ine tsvina uye meso angu aona Mambo, Jehovha Wamasimba Ose.”

<sup>6</sup> Ipapo imwe yesarafimi yakabhururukira kwandiri ine zimbe romoto muruoko rwayo, rayakanga yatora nembato kubva paaritari. <sup>7</sup> Yakaganzva muromo wangu naro ikati, “Tarira, zimbe iri raganzva miromo yako; mhosva yako yabviswa uye chivi chako chadzikinurwa.”

<sup>8</sup> Ipapo ndakanzwa inzwi raJehovha richiti, “Ndiani wandichatuma? Uye ndiani achatien-dera?”

Ini ndakati, “Ndiri pano! Nditumei!”

<sup>9</sup> Iye akati, “Enda undoudza vanhu ava uti, ‘Munogara muchinzwa, asi hamumbonzwisisi; munogara muchiona, asi hamuonesesi.’”

<sup>10</sup> Ita kuti mwoyo yavanhu ava isindimare; ita kuti nzeve dzavo dzisanzwisise

uye vatsinzine meso avo.  
 Nokuti vangaona nameso avo,  
 nokunzwa nenzeve dzavo,  
 vakanzwisisa nemwoyo yavo,  
 vakadzoka vakaporeswa.”

<sup>11</sup> Ipapo ndakati, “Haiwa, Ishe, kusvikira riniko?”

Iye akapindura achiti,  
 “Kusvikira maguta ava matongo  
 uye pasisina anogaramo,  
 kusvikira dzimba dzasiyiwa dzisina vanhu,  
 neminda yaparadzwa zvachose,

<sup>12</sup> kusvikira Jehovha adzingira vanhu kure,  
 uye nyika yasiyiwa zvachose.

<sup>13</sup> Uye kunyange kukasara chegumi munyika,  
 naichowo chichaparadzwa.

Asi somuterabhiniti nomuouki  
 zvichasara zvava zvigutsa pazvinotemwa,  
 saizvozvo rudzi rutsvene ruchavawo  
 sechigutsa munyika.”

## 7

### *Chiratidzo chaImanueri*

<sup>1</sup> Zvino Ahazi mwanakomana waJotamu, mwanakomana waUzia, paakanga ari mambo weJudha, Mambo Rezini weAramu naPeka mwanakomana waRamaria mambo weIsraeri vakauya kuzorwa neJerusarema, asi havana kugona kurikunda.

<sup>2</sup> Zvino imba yaDhavhidhi yakaudzwa kuti, “Aramu yabatana neEfuremu;” saka mwoyo waAhazi nemwoyo yavanhu vake

yakazungunuswa, sokuzungunuswa kunoitwa miti yesango nemhepo.

<sup>3</sup> Ipapo Jehovha akati kuna Isaya, “Buda, iwe nomwanakomana wako Sheari-Jashubhi, unosangana naAhazi kumucheto womugero weDziva Rokumusoro, mumugwagwa unoenda kuMunda woMusuki. <sup>4</sup> Uti kwaari, ‘Chenjera, dzikama hako, uye usatya. Usaora mwoyo nokuda kwamatsiga maviri ehuni, nokuda kwokutsamwa kunotyisa kwaRezini naAramu uye nekwomwanakomana waRemaria. <sup>5</sup> Aramu naEfuremu nomwanakomana waRemaria vakarangana kukuparadza vachiti, <sup>6</sup> “Handei tindorwa neJudha; ngatiribvarurei tigorigovana pakati pedu, tigogadza Tabheeri kuti ave mambo pamusoro paro.” <sup>7</sup> Asi zvanzi naIshe Jehovha:

“ Izvi hazvingamiri, hazvingaitiki,

nokuti musoro weAramu iDhamasiko,

<sup>8</sup> uye musoro weDhamasiko

iRezini bedzi.

Makore makumi matanhatu namashanu asati apera,

vaEfuremu vachaputswa-putswa  
zvokusazova rudzizve.

<sup>9</sup> Musoro weEfuremu iSamaria,

uye musoro weSamaria mwanakomana  
waRamaria bedzi.

Kana usingamiri zvakasimba mukutenda kwako,  
hauchazomiri zvachose.’ ”

<sup>10</sup> Jehovha akataurazve kuna Ahazi akati,

<sup>11</sup> “Kumbira chiratidzo kuna Jehovha Mwari wako, kunyange pakadzikadzika kana pamusoro-soro.”

<sup>12</sup> Asi Ahazi akati, “Handizokumbiri; handin-gaedzi Jehovha.”

<sup>13</sup> Ipapo Isaya akati, “Inzwai zvino, imi imba yaDhavhidhi! Hazvina kuringana here kuedza mwoyo murefu wavanhu? Ko, imi muchaedzawo mwoyo murefu waMwari wangu here? <sup>14</sup> Naizvozvo Jehovha pachake achakupai chiratidzo: Mhandara ichava nemimba uye ichabereka mwanakomana igomutumidza kuti Imanueri. <sup>15</sup> Iye achadya ruomba nouchi paachaziva zvakakwana kuti arambe zvakaipa achisarudza zvakarurama. <sup>16</sup> Asi mwana asati anyatsoziva kuramba zvakaipa nokusarudza zvakanaka, nyika yamadzimambo maviri aunotyia ichava dongo. <sup>17</sup> Jehovha achauyisa pamusoro pako napamusoro pavanhu vako napamusoro peimba yababa vako nguva isina kumbovapo kubva nguva iya yaakazvipatsanura kubva kuna Judha, achauyisa mambo weAsiria.”

<sup>18</sup> Pazuva iroro Jehovha acharidzira muridzo kunhunzi dzichibva kuhova dziri kure dzeJipiti nokunyuchi dzichibva kunyika yeAsiria. <sup>19</sup> Dzichauya dzose dzigogara mumawere emipata nomumikaha yamatombo, nomumakwenzi ose eminzwa uye napamadziva ose. <sup>20</sup> Pazuva iro Jehovha achashandisa chisvo chakakumbirwa kubva mhiri kwoRwizi, kuna mambo weAsiria, kuti aveure misoro yenyu nemvere dzomumakumbo enyu, uye kuti abvisewo ndebvu dzenyu. <sup>21</sup> Pazuva iro, murume achapfuwa mhou duku imwe chete nembudzi mbiri. <sup>22</sup> Uye nokuda kwokuwanda kwomukaka wadzinopa, achadya ruomba.

Vose vachasara munyika vachadya ruomba nouchi. <sup>23</sup> Pazuva iro munzvimbo imwe neimwe maimbova nemizambiringa inokwana chiuru yaitengwa namashekeri anokwana chiuru\* esirivha, pachazova norukato neminzwa chete. <sup>24</sup> Varume vachaendako neuta nemiseve, nokuti nyika ichange yafukidzwa norukato neminzwa. <sup>25</sup> Kana zviru zvikomo zvose zvaichimbosakurirwa nebadza, hakuna achada kuendako nokuda kwokutya rukato neminzwa; dzichava nzvimbo dzokusundira mombe nokunomhanyirwa namakwai.

## 8

### *Asiria, Shamhu yaJehovha*

<sup>1</sup> Jehovha akati kwandiri, “Tora bhuku guru unyore pamusoro paro nechinyoreso: pamusoro paMaheri-Sharari-Hashi-Bhazi. <sup>2</sup> Ndichadana Uriya muprista naZekaria mwanakomana waJebherekia sezvapupu zvakatendeka kwandiri.”

<sup>3</sup> Ipapo ndakaenda kumuprofitakadzi, akatora pamuviri akabereka mwanakomana. Zvino Jehovha akati kwandiri, “Mutumidze kuti Maheri-Sharari-Hashi-Bhazi; <sup>4</sup> nokuti mwana asati aziva kuti, ‘Baba vangu’ kana kuti, ‘Mai vangu,’ pfuma yeDhamasiko nezvakapambwa zveSamaria zvichatakurwa namambo weAsiria.”

<sup>5</sup> Jehovha akataurazve kwandiri akati,  
<sup>6</sup> “Nokuti vanhu ava vakaramba  
 mvura inoyerera zvinyoronyoro yeShiroa,  
 uye vanofarira Rezini  
 nomwanakomana waRemaria,

\* **7:23** 7:23 makirogiramu angaita 11.5

7 naizvozvo Jehovha ava kuda kuuyisa pamusoro pavo  
 mafashamu makuru oRwizi,  
 mambo weAsiria nokukudzwa kwake  
 kwose.  
 Ruchapfachukira hova dzarwo dzose,  
 uye rugopfachukira kumahombekombe  
 arwo ose,  
 8 ruchakukura kusvikira kuJudha,  
 ruchipafuma nomukati mayo, rugopfuura  
 nomairi ruchisvika muhuro.  
 Kutandavara kwamapapiro arwo kuchafukidza  
 upamhi hwenyika yako,  
 iwe Imanueri!”

9 Ridzai mhere yehondo, imi ndudzi,  
 mugoputswa-putswa!  
 Teereraï, imi nyika dzose dziri kure.  
 Gadzirirai kurwa,  
 mugoputswa-putswa!  
 10 Gadzirirai urongwa hwenyu, asi huchakona;  
 Taurai zavourongwa hwenyu, asi hauzomiri,  
 nokuti Mwari anesu.

### *Ityai Mwari*

11 Jehovha akataura kwandiri ruoko rwake  
 rune simba rwuri pamusoro pangu, achindiyam-  
 bira kuti ndirege kutevera nzira yavanhu ava,  
 akati:

12 “Musati irangano zvinhu zvose  
 zvinonzi navanhu ava irangano;  
 musatya zvavanotyã,  
 musazvivhunduka.

13 Jehovha Wamasimba Ose ndiye wamunofanira  
 kuita mutsvene,

ndiye wamunofanira kuvhunduka,  
<sup>14</sup> ndiye achava nzvimbo tsvene;  
 asi padzimba dzose dzaisraeri  
 achava dombo rinoita kuti vanhu vagumburwe;  
 nedombo rinoita kuti vapunzike.  
 Uye kuvanhu veJerusarema  
 iye achava musungo norugombe.  
<sup>15</sup> Vazhinji vavo vachagumburwa;  
 vachawa vagovhunika,  
 vachateyiwa vagobatwa.”

<sup>16</sup> Sungai chipupuriro  
 mugosimbisa murayiro pakati pavadzidzi  
 vangu.

<sup>17</sup> Ndichamirira Jehovha,  
 iye ari kuvanzira imba yaJakobho chiso  
 chake.

Ndichaisa ruvimbo rwangu maari.

<sup>18</sup> Ndiri pano, navana vandakapiwa naJehovha. Tiri zviratidzo nemifananidzo muIsraeri inobva kuna Jehovha Wamasimba Ose paGomo reZioni.

<sup>19</sup> Kana vanhu vachiti kwamuri bvunzai masvikiro navavuki, vanozevezera nokunguruma, ko, vanhu havangabvunzi kuna Mwari wavo here? Munobvunzirei vakafa pamusoro pavapenyu? <sup>20</sup> Endai kumurayiro nokuzvipupuriro! Kana vasingatauri maererano neshoko iri havana chiedza chamambakwedza. <sup>21</sup> Vatambudzika, vava vane nzara vachafambafamba nenyika; pavachatambudzika vachava neshungu, uye vachatarira kudenga, vagotuka mambo wavo naMwari wavo. <sup>22</sup> Ipapo vachatarira pasi vagoona nhamo chete nerima



nokusafara kunotyisa, uye vachakandirwa kurima guru.

## 9

### *Isu tazvarirwa Mwana*

<sup>1</sup> Kunyange zvakadaro, hakuchazovazve nerima kuna avo vakanga vari munhamo. Pamazuva akare akaninipisa nyika yeZebhuruni nenyika yeNafutari, asi panguva inouya achakudza Garirea reveDzimwe Ndudzi, nenzira yokugungwa mhiri kwaJorodhani.

<sup>2</sup> Vanhu vaifamba murima vakaona chiedza chikuru; avo vaigara munyika yomumvuri worufu, chiedza chakavavhenekera.

<sup>3</sup> Makakurisa rudzi mukawedzera mufaro wavo; vanofara pamberi penyu savanhu vanofara panguva yokukohwa, sokufara kwavarume, kana vachigoverana zvakapambwa.

<sup>4</sup> Nokuti sapamazuva okukundwa kwavaMidhia, vamakaparadzira joko raivaremera, nedanda raichinjika mafudzi avo, iyo tsvimbo yavamanikidzi vavo.

<sup>5</sup> Shangu imwe neimwe yomurwi yakashandiswa muhondo, nenguu imwe neimwe yakaumburudzwa muropa, zvichapiswa, zvichava huni dzomoto.

<sup>6</sup> Nokuti takazvarirwa mwana, takapiwa mwanakomana,

uye umambo huchava pamapfudzi ake.  
 Uye achanzi Gota Rinoshamisa,  
 Mwari Ane Simba,  
 Baba Vokusingaperi, Muchinda woRugare.  
 7 Kukura kwoumambo hwake nekworugare  
 rwake  
 hazvizovi namagumo.  
 Achatonga pachigaro choushe chaDhavhidhi  
 napamusoro poumambo hwake,  
 achihusimbisa nokuhutsigira,  
 nokururamisira uye nokururama,  
 kubva panguva iyoyo kusvikira nokusin-  
 gaperi.  
 Kushingaira kwaJehovha Wamasimba Ose  
 kuchazviita.

*Kutsamwa kwaJehovha pamusoro peIsraeri*

8 Jehovha akatuma shoko pamusoro paJakobho;  
 richawira pamusoro paIsraeri.  
 9 Vanhu vose vachariziva,  
 Efuremu navagari vomuSamaria,  
 ivo vanoti nokuzvikudza kwavo  
 uye namanyawi emwoyo,  
 10 “Zvidhinha zvakoromokera pasi,  
 asi tichavakazve namatombo;  
 mionde yatemerwa pasi,  
 asi tichaitsiva nemisidhari.”  
 11 Asi Jehovha akamutsira Rezini vadzivisi  
 akakurudzira vavengi vavo.  
 12 VaAramu vachibva nokumabvazuva  
 navaFiristia vachibva  
 nokumavirira vakapedza vaIsraeri  
 nomuromo wakashama.

Kunyange zvakadaro, kutsamwa kwake hakuna kudzorwa,  
asi ruoko rwake ruchatongotambanudzwa.

13 Asi vanhu havana kutendeukira kuna iye akavarova,  
kana kutsvaka Jehovha Wamasimba Ose.

14 Naizvozvo Jehovha achadimura vaIsraeri vose musoro nomuswe,  
zvose davi romuchindwe norutsanga pazuva rimwe;

15 vakuru navarume vanokudzwa ndivo musoro,  
vaprofita vanodzidzisa nhema ndivo muswe.

16 Vanotungamirira vanhu ava vanovatsausa,  
navose vanotungamirirwa vanotsauswa.

17 Naizvozvo Jehovha haachazofariri majaya,  
kana kuva netsitsi nenherera nechirikadzi,  
nokuti mumwe nomumwe wavo haana umwari uye akaipa,  
muromo mumwe nomumwe unotaura zvoupenzi.

Kunyange zvakadaro, kutsamwa kwake hakuna kudzorwa,  
ruoko rwake ruchakangosimudzwa.

18 Zvirokwazvo zvakaipa zvinopfuta somoto;  
unopisa rukato neminzwa,

unopisa matenhere edondo zvokuti unokwira kudenga mushongwe youtsu.

19 Kubudikidza nokutsamwa kwaJehovha Wamasimba Ose  
nyika ichapiswa kwazvo  
uye vanhu vachava huni dzomoto;

hapana achaponesa hama yake.

<sup>20</sup> Kurudyi vachadya  
asi vacharamba vane nzara;  
kuruboshwe,  
vachadya asi havangaguti.

Mumwe nomumwe achadya nyama yomwana  
wake.

<sup>21</sup> Manase achadya Efuremu uye Efuremu  
achadya Manase;  
pamwe chete vachamukira Judha.

Kunyange zvakadaro, kutsamwa kwake hakuna  
kudzorwa,  
ruoko rwake ruchakangosimudzwa.

## 10

<sup>1</sup> Vane nhamo vanodzika mitemo isina kuru-  
rama,

neavo vanopa mitemo inodzvinirira,

<sup>2</sup> kuti vadzivise varombo kodzero dzavo  
uye vadzivise kururamisirwa  
kwavakadzvinirirwa vavanhu vangu,

vachipamba chirikadzi  
uye vachibira nherera.

<sup>3</sup> Muchaita sei pazuva rokutongwa,  
njodzi painouya ichibva kure?

Muchatizira kuna aniko kuti mubatsirwe?  
Upfumi hwenyu muchahusiyepiko?

<sup>4</sup> Hapana chichasara asi kungokotama pakati  
penhapwa,  
kana kuwira pakati pavakaurayiwa.

Kunyange zvakadaro, kutsamwa kwake hakuna  
kudzorwa,  
ruoko rwake ruchakangosimudzwa.

*Kutonga kwaMwari pamusoro peAsiria*

- 5 “Une nhamo iwe Asiria, shamhu yokutsamwa kwangu,  
 iye akabata tsvimbo yehasha dzangu mu-  
 maoko ake!
- 6 Ndiri kumutuma kurudzi rusina Mwari,  
 ndinomutuma kuvanhu vanonditsamwisa,  
 kundokomba nokutora nokubvuta zvaka-  
 pambwa,  
 nokuvatsikirira pasi sedope riri  
 mumigwagwa.
- 7 Asi izvi handizvo zvaanoda,  
 izvi handizvo zvaanga achifunga;  
 vavariro yake ndeyokuparadza,  
 kupedza chose marudzi mazhinji.
- 8 Anoti, ‘Ko, machinda angu haazi madzimambo  
 ose here?’
- 9 Karino harina kuita sezvakaita Karikemishi  
 here?
- Ko, Hamati harina kufanana neAripadhi,  
 uye Samaria harina kufanana neDhamasiko  
 here?
- 10 Ruoko rwangu sezvarwakatora umambo  
 hwezvifananidzo,  
 umambo hune zvifananidzo zvakakunda  
 zveJerusarema neSamaria,
- 11 ko, handichaitiri Jerusarema nezvifananidzo  
 zvaro  
 sezvandakaitira Samaria nezvifananidzo  
 zvayo here?’ ”
- 12 Kana Ishe achinge apedza basa rake rose  
 pamusoro peGomo reZioni neJerusarema, ac-  
 hazoti, “Ndicharanga mambo weAsiria nokuda  
 kwokuzvikudza kwomwoyo wake namanyawi  
 emeso ake. 13 Nokuti iye anoti,

“ ‘Nesimba ramaoko angu ndakaita izvi,  
 uye nouchenjeri hwangu, nokuti ndinonzwi-  
 sisa.

Ndakabvisa miganhu yendudzi,  
 ndikapamba pfuma yavo;  
 semhare ndakakunda madzimambo avo.

14 Sezvinoita munhu anosvasvavira mudendere,  
 saizvozvo ruoko rwangu rwakananavira  
 pfuma yamarudzi;

savarume vanounganidza mazai akasiyiwa,  
 saizvozvo ndakaunganidza nyika dzose;

hakuna yakapfakanyisa bapiro,  
 kana kushamisa muromo wayo kuti irire.’ ”

15 Ko, demo ringazvirumbidza kupfuura iye  
 anoritemesa here?

Kana jeko ringazvirumbidza pamusoro  
 pounorishandisa here?

Zvinozoita sokunge tsvimbo inosimudza uyo  
 anoitakura,

kana mudonzvo kusimudza uyo asati ari  
 huni!

16 Naizvozvo, Ishe Jehovha Wamasimba Ose,  
 achatumira denda rinoonza pamusoro  
 pavarwi vakafuta;

pasi pokubwinya kwake moto uchatungidzwa  
 kufanana nemirazvo inopfuta.

17 Chiedza chaIsraeri chichava moto,  
 noMutsvene wavo murazvo womoto;

muzuva rimwe chete uchapfuta  
 ugopedza minzwa yake norukato rwake.

18 Kubwinya kwamasango ake neminda yake  
 yakaorera kuchaparadzwa chose,  
 kufanana nomurwere anoramba achipera.

19 Uye miti yakasara yamasango ake ichava mishoma kwazvo, zvakuti mwana angagona kuinyora pasi.

*Vakasara veIsraeri*

20 Pazuva iro vakasara veIsraeri, vakapunyuka veimba yaJakobho, havachazovimbi naye iye akavarova, asi zvirokwazvo vachavimba naJehovha, Mutsvene waIsraeri.

21 Vakasara vachadzokera, vakasara vaJakobho, vachadzokera kuna Mwari Ane Simba.

22 Kunyange vanhu vako, iwe Israeri, vakaita sejecha regungwa,

vachasara chete ndivo vachadzokera.

Kuparadzwa kwakatotemwa,

kuzere nokururama.

23 Ishe, Jehovha Wamasimba Ose

achapedzisa kuparadzwa kwakatemerwa nyika yose.

24 Naizvozvo zvanzi naIshe, Jehovha Wamasimba Ose:

“Haiwa, vanhu vangu vanogara muZioni,

musatya vaAsiria,

vanokurovai nomudonzvo nokukusimudzirai tsvimbo,

sezvakaitwa neIjipiti.

25 Nokuti nenguva duku duku kutsamwa kwangu pamusoro penyu kuchapera,

uye hasha dzangu dzichanangana noku-paradzwa kwavo.”

26 Jehovha Wamasimba Ose achavarova netyava, samarovero aakaita vaMidhia padombo re-Orebhi,

uye achasimudza tsvimbo yake pamusoro  
pempvura zhinji,  
sezvaakaita muljipiti.

27 Pazuva iro mitoro yavo ichabviswa pamap-  
fudzi enyu,  
nejoko ravo pamitsipa yenyu;  
joko richavhuniwa,  
nokuti manyanya kufuta.

28 Vanopinda muAyati;  
vopfuura nomuMigironi;  
vochengeta nhumbi paMikimashi.

29 Vanopfuura napamupata, vagoti,  
“Tichadzika matende paGebha usiku.”

Rama rinobvunda;  
Gibhea raSauro rinetiza.

30 Ridza mhere, iwe mukunda weGarimi!  
Teerera, iwe Raisha!  
Newe Anatoti unonzwisa urombo!

31 Madhimena riri kutiza;  
vanhu veGebhimi vanovanda.

32 Zuva ranhasi vachamira paNobhi;  
vachakunga chibhakera chavo  
pagomo remwanasikana weZioni,  
pachikomo cheJerusarema.

33 Tarirai, Ishe, Jehovha Wamasimba Ose,  
achatema matavi nesimba guru.

Miti mirefu refu ichawiswa,  
uye yakareba ichadzikiswa.

34 Achatema matenhere esango nedemo;  
Rebhanoni ichawa pamberi paIye Ane  
Simba.



# 11

## *Davi raJese*

- <sup>1</sup> Bukira richabva kudzinde raJese;  
Davi rinobva pamidzi yake richabereka  
muchero.
- <sup>2</sup> Mweya waJehovha uchagara pamusoro pake,  
mweya wouchenjeri newokunzwisisa,  
mweya wokurayira nowesimba,  
mweya wokuziva newokutya Jehovha,
- <sup>3</sup> uye achafarira kutya Jehovha.  
Haazotongi nezvaanoona nameso ake,  
kana kutonga nezvaanonzwa nenzeve  
dzake,
- <sup>4</sup> asi nokururama achatongera varombo,  
nokururamisira achatongera vanyoro vapanyika.  
Acharova nyika neshamhu yomuromo wake;  
nokufema kwemiromo yake achauraya  
vakaipa.
- <sup>5</sup> Kururuma ndiro richava bhanhire rake  
uye kutendeka bhanhire romuchiuno chake.
- <sup>6</sup> Bere richagara negwayana,  
ingwe ichavata pasi nembudzi,  
mhuru neshumba nezvakanodzwa zvichafura  
pamwe chete;  
uye mwana mudiki achazvitungamirira.
- <sup>7</sup> Mhou ichafura nebere,  
vana vazvo vachavata pasi pamwe chete,  
uye shumba ichadya uswa senzombe.
- <sup>8</sup> Mwana mucheche achatambira pedyo  
nomwena wemhakure,

uye mwana mudiki achaisa ruoko rwake  
mumwena wenyoka.

<sup>9</sup> Hazvingazokuvadzi kana kuparadza  
pagomo rangu rose dzvene,  
nokuti nyika ichazara nokuziva Jehovha  
semvura zhinji inofukidza gungwa.

<sup>10</sup> Pazuva iro Mudzi wajese uchamira so-  
mureza wamarudzi; ndudzi dzichamhanyira  
kwaari, uye nzvimbo yake yokuzorora ich-  
abwinya. <sup>11</sup> Pazuva iro Jehovha achatam-  
banudza ruoko rwake kechipiri kuti adzorezve  
vakasara ivo vanhu vake vakasiyiwa kubva  
kuAsiria, kubva zasi kweIjipiti, nokubva ku-  
musoro kweIjipiti nokubva kuEtiopia, nokubva  
kuEramu, nokubva kuBhabhironi, nokuHamati  
uye nokubva kuzviwi zvegungwa.

<sup>12</sup> Ahasimudzira marudzi mureza  
uye achaunganidza vakadzvingwa vaIsraeri;  
achaunganidza vakaparadzirwa vavanhu  
veJudha,  
kubva kumativi mana enyika.

<sup>13</sup> Godo raEfuremu richapera  
uye vavengi vavaJudha vachagurwa;  
Efuremu haachazovi negodo naJudha,  
naJudha haangaitire Efuremu hashu.

<sup>14</sup> Asi vachawira pamusoro pamateru eFiristia  
kumavirazuva;  
pamwe chete vachapamba vanhu vokumab-  
vazuva.

Vachatora Edomu neMoabhu,  
uye vaAmoni vachava varanda vavo.

<sup>15</sup> Jehovha achaomesa chose  
chikamu chegungwa reIjipiti;

nemhepo inopisa achatsvaira noruoko rwake  
 pamusoro peRwizi rweYufuratesi.  
 Acharukamura-kamura agoruita hova nomwe,  
 kuitira kuti vanhu vagone kuyambuka  
 vachienda mhiri vakapfeka shangu.  
<sup>16</sup> Pachava nomugwagwa mukuru wavanhu vake  
 vakasara,  
 vakasiyiwa kubva kuAsiria,  
 sezvazvakanga zvirira kuIsraeri  
 pavakabva kuJipiti.

## 12

### *Nziyo dzoKurumbidza*

<sup>1</sup> Pazuva iro muchati,  
 “Ndichakurumbidzai, imi Jehovha,  
 kunyange makanga makanditsamwira,  
 kutsamwa kwenyu kwakadzorwa  
 uye makandinyaradza.  
<sup>2</sup> Zvirokwazvo Mwari ndiye ruponeso rwangu;  
 ndichavimba naye uye handingatyi.  
 Jehovha, Jehovha ndiye simba rangu nerwiyo  
 rwangu;  
 ava ruponeso rwangu.”  
<sup>3</sup> Nomufaro muchachera mvura  
 kubva mumatsime oruponeso.  
<sup>4</sup> Pazuva iro muchati,  
 “Vongai Jehovha, danai kuzita rake;  
 zivisai zvaakaita pakati pendudzi,  
 uye muparidze kuti zita rake risimudzirwe.  
<sup>5</sup> Imbirai Jehovha, nokuti akaita zvinhu zvi-  
 noshamisa;  
 izvi ngazvizivikanwe pasi pose.

6 Pururudzai uye muimbe nomufaro, imi vanhu  
veZioni,  
nokuti Mutsvene waIsraeri mukuru pakati  
penyu.”

## 13

### *Chiprofita pamusoro peBhabhironi*

1 Shoko rakaonekwa naIsaya mwanakomana  
waAmozi pamusoro peBhabhironi:

2 Simudzai mireza pamusoro pechikomo chisina  
miti,  
danidzirai kwavari;  
muninire kwavari  
kuti vapinde pamasuo amakurukota.

3 Ndakarayira vatsvene vangu;  
ndakadana varwi vangu kuti vazadzise kut-  
samwa kwangu,  
avo vanofadzwa nokukunda kwangu.

4 Inzwai, kutinhira pamusoro pamakomo,  
kwakafanana nokwavanhu vazhinji zhinji!  
Inzwai, mheremhere pakati poumambo,  
sendudzi dziri kuungana pamwe chete!  
Jehovha Wamasimba Ose ari kugadzirira  
mauto kundorwa.

5 Vanobva kunyika dziri kure,  
kubva kumagumo amatenga,  
Jehovha nezvombo zvokutsamwa kwake,  
kuti aparadze nyika yose.

6 Ungudzai, nokuti zuva raJehovha rava pedyo;  
richauya nokuparadza kunobva kuna Wa-  
masimba Ose.

<sup>7</sup> Naizvozvo maoko ose achashaya simba,  
mwoyo mumwe nomumwe wavanhu  
uchanyungudika.

<sup>8</sup> Kutya kuchavabata,  
kurwadziwa nokugomera zvichavabata,  
vachamonyoroka somukadzi ari kusunun-  
guka.

Vachatarisana vachishamisika mumwe  
nomumwe wavo,  
zviso zvavo zvichipfuta.

<sup>9</sup> Tarirai, zuva raJehovha riri kuuya,  
zuva rakaipisisa, rine hashha nokutsamwa  
kunotyisa,  
kuti nyika ive dongo  
uye nokuzoparadza vatadzi vari mukati  
mayo.

<sup>10</sup> Nyeredzi dzokudenga namapoka adzo  
hadzizoratidzi chiedza chadzo.  
Zuva rinobuda richasvibiswa  
uye mwedzi hauzopi chiedza chawo.

<sup>11</sup> Ndicharanga nyika nokuda kwokuipa kwayo,  
navakaipa nokuda kwezvivi zvavo.  
Ndichagumisa vanozvikudza pakudada kwavo,  
uye ndichaderedza kuzvikudza kwavasina  
tsitsi.

<sup>12</sup> Ndichaita kuti munhu ashayikwe kudarika  
goridhe,  
ashayikwe kudarika kushayikwa  
kwegoridhe reOfiri.

<sup>13</sup> Naizvozvo ndichabvundisa matenga;  
uye nyika ichazungunuka kubva panzvimbo  
yayo,  
nehasha dzaJehovha Wamasimba Ose,

pazuva rokutsamwa kwake kunopisa.

- 14 Semhara inovhimwa,  
samakwai asina mufudzi,  
mumwe nomumwe achadzokera kuvanhu vok-  
wake,  
mumwe nomumwe achatizira kunyika yake.
- 15 Mumwe nomumwe achabatwa achabayiwa,  
vose vanobatwa vachaurayiwa nomunondo.
- 16 Vacheche vavo vacharoverwa pasi  
vagobvamburwa-bvamburwa  
vachizviona;  
dzimba dzavo dzichapambwa uye vakadzi  
vavo vachachinyiwa.
- 17 Tarirai, ndichavamutsira vaMedhia  
vasina hanya nesirivha,  
uye vasingafariri goridhe.
- 18 Uta hwavo huchabaya majaya;  
havazovi nengoni navacheche  
kana kutarira vana netsitsi.
- 19 Zvino Bhabhironi rembiri paumambo,  
kubwinya kwokuzvikudza kwavaBhabhi-  
roni,  
richaparadzwa naMwari  
kufanana neSodhomu neGomora.
- 20 Haringatongogarwizve navanhu  
uye hakuna vachazogaramo kusvikira  
kuzvizvarwa zvose;  
hapana muArabhu achadzika tende rake ikoko,  
hakuna mufudzi achazorodza makwai ake  
ikoko.
- 21 Asi zvisikwa zvomugwenga ndizvo zvichagara  
ikoko,

makava achazadza dzimba dzavo;  
 mazizi achagara ikoko,  
 uye imomo ngururu dzichakwakuka-  
 kwakuka.  
 22 Mapere achachema ari munhare dzavo,  
 makava mudzimba dzavo dzinoyevedza dza-  
 madzimambo.  
 Nguva yake yaswedera,  
 uye mazuva aro haazowedzerwi.

## 14

1 Jehovha achanzwira Jakobho tsitsi;  
 achasarudza Israeri zvakare  
 uye achavagarisa munyika yavo.  
 Vatorwa vachabatana navo  
 vachanamatirana neimba yaJakobho.  
 2 Ndudzi dzichavatora  
 dzigovadzoseru kunzvimbo yavo chaiyo.  
 Uye imba yaIsraeri ichatora ndudzi  
 kuti vave varandarume navarandakadzi  
 munyika yaJehovha.  
 Vachaita nhapwa vava vaimbova vatapi vavo,  
 uye vachabata ushe pamusoro pavaya vaim-  
 bova vamanikidzi vavo.  
 3 Pazuva ramuchapiwa rusununguko  
 naJehovha kubva pakutambudzika,  
 nokusagadzikana, nokubatwa noutsinye,  
 4 uchasveeredza mambo weBhabhironi uchiti:  
 Haiwa, mumanikidzi apera sei!  
 Haiwa, hashu dzake dzapera sei!  
 5 Jehovha akavhuna tsvimbo yavakaipa  
 netsvimbo yamadzimambo,  
 6 yaakarova nayo marudzi  
 mukutsamwa nokurova kusingaperi,

- uye akakunda ndudzi  
nehasha nokurwisa kusingaperi.
- <sup>7</sup> Nyika dzose dzazorora uye dzava norugare;  
votanga kufara nokuimba.
- <sup>8</sup> Kunyange nemiti yemisipuresi nemisidhari  
yokuRebhanoni  
inofara pamusoro pako ichiti,  
“Zvino zvawaparadzwa,  
hakuna varume vanotsvaka huni vachauya  
kuzotitema.”
- <sup>9</sup> Pasi, iro sheori razungunuka  
kuti rinangane newe pakuuya kwako;  
riri kumutsa mweya yavakaenda kuti izokuk-  
wazisai,  
vose vakaenda vari vatungamiri munyika;  
rinoita kuti vasimuke pazvigaro zvavo zvoushe,  
vose vakanga vari madzimambo endudzi.
- <sup>10</sup> Vose vachapindura,  
vachati kwauri,  
“Newewo hauchisina simba, sesu;  
wangofanana nesu.”
- <sup>11</sup> Kuzvikudza kwako kwose kwaderedzwa  
kusvika muguva,  
pamwe chete nokurira kworudimbwa  
rwako;  
honye dzawarirwa pasi pako  
uye makonye anokufukidza.
- <sup>12</sup> Haiwa, wawa seiko, uchibva kudenga,  
iwe nyamasase yamangwanani, mwanako-  
mana wamambakwedza!  
Wakakandwa panyika,



iyewe wakambowisira ndudzi pasi!

- 13 Wakati mumwoyo mako,  
 “Ndichakwira kudenga;  
 ndichasimudzira chigaro changu choushe  
 pamusoro penyeredzi dzaMwari;  
 ndichagara pachigaro changu choushe pagomo  
 reungano,  
 pamusoro pegomo dzvene.  
 14 Ndichakwira pamusoro-soro pamakore;  
 ndichazviita seWokumusoro-soro.”  
 15 Asi waderedzwa kusvika kuguva,  
 kwakadzika dzika kwegomba.

- 16 Vose vanokuona vanokunan’anidza,  
 vachafungisisa zvamagumo ako vachiti,  
 “Ndiye here murume  
 uya akazungunutsa nyika, akadederes  
 ushe,  
 17 murume akaita kuti nyika ive gwenga,  
 akaparadza maguta ayo,  
 akasatendera vasungwa vake kudzokera ku-  
 musha?”

- 18 Madzimambo ose endudzi ave mukukudzwa,  
 mumwe nomumwe muguva rake.

- 19 Asi iwe warasirwa kunze kweguva rako,  
 kufanana nedavi rakaraswa;  
 wakafukidzwa navakaurayiwa,  
 naavo vakabayiwa nomunondo,  
 avo vakadzika kumatombo egomba.  
 Kufanana nechitunha chinotsikwa-tsikwa net-  
 soka,  
 20 hauzobatani navo pakuvigwa kwako,  
 nokuti wakaparadza nyika yako

ukauraya vanhu vako.

Vana vowakaipa

havazotaurwi nezvavozve.

<sup>21</sup> Gadzirirai nzvimbo yokuurayira vanakomana  
vake  
nokuda kwezvivi zvamadzitateguru avo;  
havazosimuki kuti vagare nhaka yenyika  
vagozadza nyika namaguta avo

<sup>22</sup> “Ndichavamukira ini,”

ndizvo zvinotaura Jehovha Wamasimba Ose.

“Ndichabvisa zita rake navakasara vake kubva  
kuBhabhironi,

vana vake navana vavana vake,”

ndizvo zvinotaura Jehovha.

<sup>23</sup> “Ndichaishandura kuti ive nzvimbo yamazizi  
nenyika yamachawi;

ndicharitsvaira nomutsvairo wokuparadza,”

ndizvo zvinotaura Jehovha Wamasimba Ose.

*Chiprofita pamusoro peAsiria*

<sup>24</sup> Jehovha Wamasimba Ose akapika achiti:

“Zvirokwazo sezvandakafunga ndizvo

zvichaitika,

uye sezvandakarangarira ndizvo

zvichaitika.

<sup>25</sup> Ndichapwanya muAsiria munyika yangu;

ndichamutsikirira pasi pamusoro pegomo  
rangu.

Joko rake richabviswa kubva pavanhu vangu,  
nomutoro wake wokubva pamabvudzi avo.”

<sup>26</sup> Iyi ndiyo pfungwa yakarongerwa nyika yose;

urwu ndirwo ruoko rwakatambanudzirwa  
pamusoro pamarudzi ose.

- <sup>27</sup> Nokuti Jehovha Wamasimba Ose akazvironga  
zvino ndianiko angamukonesa?  
Ruoko rwake rwakatambanudzwa ndianiko  
angarudzora?

*Chiprofita pamusoro peFiristia*

- <sup>28</sup> Shoko iri rakauya mugore rakafa Mambo  
Ahazi richiti:  
<sup>29</sup> Musafara imi mose vaFiristia,  
muchiti shamhu yakakurovai imi, yavhu-  
nika;  
nokuti kubva pamudzi wenyoka iyo pachabuda  
mvumbi,  
chibereko chayo chichava nyoka ino uturu  
hunobaya.

- <sup>30</sup> Murombo wavarombo achawana mafuro,  
uye vanoshayiwa vacharara pasi murugare.  
Asi ndichaparadza mudzi wako nenzara;  
ichauraya vakasara vako.

- <sup>31</sup> Ungudza iwe suo! Chema, iwe guta!  
Nyungudukai, imi vaFiristia mose!  
Gore routsi riri kuuya richibva kumusoro,  
uye hapana achatiza pasimba raro.

- <sup>32</sup> Ko, imhinduroi ichapiwa  
kunhume dzorudzi urwo?  
“Jhovha akasimbisa Zioni,  
uye mariri vanhu vake vanotambudzika  
vachawana pokuvanda.”

## 15

*Chiprofita pamusoro peMoabhu*

- <sup>1</sup> Chirevo chaJehovha maererano neMoabhu:  
 Ari romuMoabhu rava dongo,  
     rakaparadzwa usiku!  
 Kiri romuMoabhu rava dongo,  
     rakaparadzwa usiku!
- <sup>2</sup> Dhibhoni rakwira kutemberi yaro,  
     kunzvimbo        dzaro        dzakakwirira  
     kundochema;  
 Moabhu ari kuungudza pamusoro peNebho  
     napamusoro peMedhebha.  
 Misoro yose yaveurwa  
     ndebvu dzose dzabviswa.
- <sup>3</sup> Munzira dzomuguta vakapfeka masaga:  
     pamusoro pamatenga edzimba  
 uye nomumatara, vanoungudza vose,  
     vakazvambarara vachichema.
- <sup>4</sup> Heshibhoni neErieri dzinodanidzira,  
     manzwi avo anonzwika kusvikira kuJahazi.  
 Naizvozvo varwi veMoabhu vanodanidzira,  
     uye mwoyo yavo yaziya.
- <sup>5</sup> Mwoyo wangu unodanidzira pamusoro pe-  
     Moabhu;  
     vatizi varo vanotiza kusvikira kuZoari,  
     kusvikira kuEgirati-Sherishiya.  
 Vanokwidza nenzira yokuRuhiti,  
     vanofamba vachichema,  
 munzira yokuHoronaimi  
     vanochema kuparadzwa kwavo.
- <sup>6</sup> Mvura yokuNimirimi yakapwa  
     uye uswa hwaoma;  
 bumhudza rapera  
     uye hapachina chakasvibirira chakasara.
- <sup>7</sup> Saka pfuma yavakawana neyavakaunganidza

vanoiyambutsira mhiri kworukova  
rwemikonachando.

8 Kudanidzira kwavo kwaita maungira kuchevedza muganhu weMoabhu; kuungudza kwavo kunosvikira kuEgiraimi, kuchema kwavo kunosvikira kuBheeri Erimi.

9 Mvura yapaDhimoni yakazara neropa, asi ndichauyisazve zvakawanda pamusoro peDhimoni,

shumba pamusoro pavatizi veMoabhu  
uye napamusoro pavaya vakasara munyika.

## 16

1 Tumirai mutero wamakwayana kumutongi wenyika, kubva kuSera, zvichiyambukira kurenje, kugomo roMwanasikana weZioni.

2 Kufanana neshiri dzadzungaira dzichisundidzirwa kubva mudendere, ndizvo zvakaita vakadzi veMoabhu pamazambuko eAmoni.

3 “Tipeiwo zano, ruramisirai. Ita mumvuri wako kuti ufanane nousiku, pamasikati makuru.

Viga vatizi, usapandukira vapoteri.

4 Rega vatizi veMoabhu vagare newe, iva utiziro hwavo kubva kumuparadzi.”

Mutambudzi achasvika kumagumo, uye kuparadza kuchapera; mudenhi achatsakatika panyika.

<sup>5</sup> Murudo, chigaro choushe chichasimbiswa;  
 mukutendeka, munhu achagarapo, mumwe  
 anobva kuimba yaDhavhidhi,  
 uyo anoti achitonga anotsvaka kururamisira,  
 uye achikurumidza kuita zvakarurama.

<sup>6</sup> Takanzwa nezvokuzvikudza kwaMoabhu,  
 namanyawi ake makuru uye kuzvida kwake,  
 kuzvikudza kwake nokuvirima kwake,  
 asi kuzvirumbidza kwake hakuna maturo.

<sup>7</sup> Naizvozvo vaMoabhu vounyudza,  
 vanounyudzira Moabhu pamwe chete.

Chemai musuwe  
 nokuda kwavarume veKiri Hareseti.

<sup>8</sup> Minda yeHeshibhoni yaoma  
 uye mazambiringa eSibhima aomawo.

Vatongi vendudzi vatsika-tsika  
 mizambiringa yakaisvonaka,  
 iyo yaimbosvika kuJazeri  
 uye yaitandira yakananga kurenje.

Mabukira ayo  
 aitandira kusvika kugungwa.

<sup>9</sup> Saka ndinochema, sokuchema kweJazeri,  
 nokuda kwemizambiringa yeSibhima.

Haiwa Heshibhoni, haiwa Ereare,  
 ndichakudiridza nemisodzi!  
 Ruzha rwomufaro pamusoro pemizambiringa  
 yakaibva napamusoro pezvamakakohwa  
 rwanyaradzwa.

<sup>10</sup> Mufaro nokufarisisa zvabviswa paminda yem-  
 izambiringa;  
 hapana anoimba kana kuita ruzha muminda  
 yemizambiringa;  
 hapana anosvina waini pazvisviniro,

nokuti ndagumisa ruzha rwacho.

<sup>11</sup> Mwoyo wangu unorira nokuda kwaMoabhu, kufanana nokurira kwembira, mukati kati mangu munorira nokuda kweKiri Hareseti.

<sup>12</sup> Zvino kana Moabhu achizviratidza panzvimbo dzake dzakakwirira, anenge achingozvinetsa pachake; paanoenda kuimba yake kunonyengetera, zvinenge zvisina chazvinobatsira,

<sup>13</sup> Iri ndiro shoko rakataurwa kare naJehovha pamusoro peMoabhu. <sup>14</sup> Asi zvino Jehovha anoti, “Makore matatu asati apfuura, sokuverengwa kwaangaitwa nomuranda akazvisunga kubatira mubayiro, kukudzwa kweMoabhu navanhu vake vose vakawanda kuchazvidzwa, uye vakapunyuka vake vachava vashoma kwazvo uye vasina simba.”

## 17

### *Chirevo pamusoro peDhamasiko*

<sup>1</sup> Chirevo pamusoro peDhamasiko:  
“Tarirai, Dhamasiko harichazovazve guta, asi richava murwi wamatongo.

<sup>2</sup> Maguta eAroeri achasiyiwa uye achava mafuro ezvipfuyo, izvo zvichavata pasi, pasina anozvivhundutsa.

<sup>3</sup> Maguta akakomberedzwa namasvingo achanyangarika achibva pana Efuremu, uye simba roushe kubva paDhamasiko; vakasara veAramu vachava sembiri yavaIsraeri,”

ndizvo zvinotaura Jehovha  
Wamasimba Ose.

4 “Pazuva iro kukudzwa kwaJakobho kuchapera;  
mafuta omuviri wake achapera.

5 Zvichafanana nomukohwi anokohwa  
madzinde akamira,  
uyo anokohwa zviyo noruoko rwake,  
sezvinoita murume anononga hura  
dzezviyo muMupata weRefaimi.

6 Kunyange zvakadaro dzimwe tsanga  
dzichasara,  
sezvinoita muorivhi kana wazunzwa,  
uchisiya maorivhi maviri kana matatu pamatavi  
okumusoro-soro,  
mana kana mashanu pamatavi makuru  
anobereka,”  
ndizvo zvinotaura Jehovha Mwari  
waIsraeri.

7 Pazuva iro vanhu vachatarira kuMusiki wavo,  
vagodzorerera meso avo kuMutsvene waIs-  
raeri.

8 Havachazotarisi kuaritari,  
iro basa ramaoko avo,  
uye havachazovi nehanya nematanda aAshera  
nearitari  
dzezvinonhuhwira dzakaitwa neminwe  
yavo.

9 Pazuva iro maguta avo akasimba avakasiya  
nokuda kwawaIsraeri, achafanana nenzvimbo  
dzakaregerwa kuti dzive matenhere nezvi-  
nomera pasi pavo. Uye ose achava matongo.

10 Nokuti wakanganwa Mwari Muponesi wako,  
hauna kurangarira Dombo, iyo nhare yako.



Naizvozvo, kunyange ukazvisimira miti  
yakanakisisa,  
uye ukadyara mizambiringa inobva kune  
dzimwe nyika,

<sup>11</sup> kunyange pazuva raunoisima, ugoita kuti  
ikure,  
ugoita kuti ive namaruva,  
asi mukohwo uchava sapasina  
pazuva rehosha nokurwadziwa kusingara-  
piki.

<sup>12</sup> Haiwa, kutinhira kwendudzi zhinji,  
dzinotinhira sokutinhira kwegungwa!  
Haiwa, kuomba kwamarudzi  
anoomba kufanana nokutinhira kwemvura  
zhinji!

<sup>13</sup> Kunyange vanhu vakaomba sokutinhira kwa-  
mafungu emvura,  
paanovatuka vachatizira kure,  
vachidzingirirwa nemhepo sehundi pamusoro  
pezvikomo,  
kufanana nouswa hunozungunuswa pam-  
beri pedutu guru.

<sup>14</sup> Munguva yamadekwana,  
pachava nokutyisa! Kusati kwaedza,  
havachipo!  
Uyu ndiwo mugove wavaya vanotibira,  
nomubayiro wavanotipamba.

## 18

### *Chiprofita pamusoro peEtiopia*

<sup>1</sup> Ine nhamo nyika yokutinhira  
kwamapapiro inotevedza nzizi dzeEtiopia,

<sup>2</sup> inotuma nhume nenzira yomugungwa,  
 muzvikepe zvenhokwe pamusoro pemvura.  
 Endai, imi nhume dzinokurumidza,  
 kuvanhu vakareba uye vane ganda rinotsvedz-  
 erera,  
 kuvanhu vanotyiswa kure napedyo,  
 rudzi rune hashu nomutauro usinganzwisiki,  
 rune nyika yakakamurwa nenzizi.

<sup>3</sup> Imi mose muri pasi pose,  
 imi munogara panyika,  
 kana mureza wasimudzwa pamusoro  
 pamakomo,  
 muchauona,  
 uye kana hwamanda yarira,  
 muchainzwa.

<sup>4</sup> Zvanzi naJehovha kwandiri:  
 “Ndicharamba ndinyerere uye ndichatarira  
 ndiri paugaro hwangu,  
 samanyirinyiri omushana unopisa,  
 segore redova mukupisa kwokukohwa.”

<sup>5</sup> Nokuti, kukohwa kusati kwasvika,  
 kana kutungira kwamaruva kwaguma, uye  
 ruva rova muzambiringa woibva,  
 achagura mabukira namapanga okuran-  
 gura,  
 achatemera pasi uye agorasira kure matavi  
 akatandavara.

<sup>6</sup> Zvose zvichasiyirwa magora omugomo  
 nokuzvikara zvesango;  
 shiri dzichazvidya chirimo chose,  
 uye zvikara zvesango  
 zvichazvidya muchando chose.

<sup>7</sup> Panguva iyoyo, zvipo zvichavigirwa Jehovha Wamasimba Ose,  
 zvichibva kuanhu vakareba vane ganda rinotsvedzerera,  
 kubva kuanhu vanotyiwa kwose kwose,  
 rudzi rune hashu nomutauro usinganzwisiki,  
 rudzi rune nyika yakakamurwa nenzizi,  
 zvipo zvichauyiswa kuZioni, nzvimbo yeZita raJehovha Wamasimba Ose.

## 19

### *Chiprofita pamusoro peIjipiti*

- <sup>1</sup> Chirevo pamusoro peIjipiti:  
 Tarirai, Jehovha akatasva gore rinomhanya,  
 uye ari kuuya kuIjipiti.  
 Zvifananidzo zveIjipiti zviru kudedera pamberu pake,  
 uye mwoyo yavaIjipita yonyungudika mukati mavo.
- <sup>2</sup> “Ndichakuchidzira kumukirana pakati pavaIjipita,  
 munun’una acharwa nomukoma,  
 muvakidzani acharwa nowaakavakidzana naye,  
 guta richarwisana nerimwe guta,  
 umambo hucharwisana nohumwe umambo.
- <sup>3</sup> VaIjipita vachaora mwoyo,  
 uye ndichaita kuti zvavanoronga zvive pasina;  
 vachabvunza zvifananidzo nemweya yavakafa,  
 nokumasvikiro navavuki.

4 Ndichaisa valjipita mumaoko amambo ano  
utsinye  
uye mambo anotyisa achatonga pamusoro  
pavo,”

ndizvo zvinotaura Ishe,  
Jehovha Wamasimba Ose.

5 Mvura yomurwizi ichapwa,  
uye mahombekombe erwizi achapwa agova  
akaoma.

6 Migero ichanhuhwa;  
hova dzeIjipiti dzichaderera uye dzichapwa.  
Tsanga nenhokwe zvichauna,

<sup>7</sup> uyewo zvinomera zvichitevedza Nairi,  
pamuromo werwizi.

Minda yose yakadyarwa mujinga meNairi  
ichaoma,  
mbesa dzichapeperetswa nemhepo,  
hazvingazovapozve.

8 Vabati vehove vachagomera uye vagorira,  
vose vanokanda zviredzo muna Nairi;  
vaya vanokanda mimbure pamusoro pemvura  
vacharukutika.

9 Vanobata neshinda yakanaka vachapera  
simba,  
varuki vemicheka yakanaka vachashaya  
tariro.

10 Vanobata nemicheka vachaora mwoyo,  
uye vose vanobatira mubayiro vachar-  
wadziwa mwoyo.

11 Machinda eZoani haasi chinhu asi mapenzi;  
makurukota aFaro akachenjera anopa zano  
risina mano.

Mungareva sei kuna Faro, kuti,  
 “Ndini mumwe wavakachenjera,  
 mudzidzi wamadzimambo akare?”

<sup>12</sup> Zvino vakachenjera venyu varipiko?  
 Ngavakuratidzei uye vakuzivisei  
 zvakafungwa naJehovha Wamasimba Ose  
 pamusoro peIjipiti.

<sup>13</sup> Machinda eZoani ava mapenzi,  
 vatungamiri veMemufisi vanyengerwa;  
 mabwe ekona amarudzi  
 avo atsausa Ijipiti.

<sup>14</sup> Jehovha akadururira mavari mweya  
 wedzungu;  
 vanoita kuti Ijipiti idzedzereke mune zvose  
 zvainoita,  
 sezvinoita chidhakwa  
 chinodzedzereka mumarutsi acho.

<sup>15</sup> Hapana chingaitwa neIjipiti, musoro kana  
 muswe,  
 davi romuchindwe kana rushanga.

<sup>16</sup> Pazuva iro, vaIjipita vachafanana  
 navakadzi. Vachadedera nokutya  
 panosimudzwa ruoko rwaJehovha Wamasimba  
 Ose pamusoro pavo. <sup>17</sup> Uye nyika yeJudha  
 ichava chinhu chinotyisa kuvaIjipita;  
 mumwe nomumwe achanzwa nezvaJudha  
 achatya, nokuda kwezvinofungwa naJehovha  
 Wamasimba Ose pamusoro pavo.

<sup>18</sup> Pazuva iro, maguta mashanu omuIjipiti  
 achataura mutauro weKenani uye vachapikira  
 vachazvipira kuna Jehovha Wamasimba Ose.  
 Rimwe racho richanzi Guta roKuparadza.

<sup>19</sup> Pazuva iro, pachava nearitari kuna Jehovha mukati chaimo meljipiti, nembiru kuna Jehovha pamuganhu wayo. <sup>20</sup> Ichava chiratidzo nechapupu kuna Jehovha Wamasimba Ose munyika yeIjipiti. Pavanodanidzira kuna Jehovha nokuda kwavamanikidzi vavo, achavatumira muponesi nomurwiri, ipapo achavanunura. <sup>21</sup> Saka Jehovha achazviratidza kuvaljipita, uye pazuva iro vachaziva Jehovha. Vachanamata nezvibayiro uye nezvipiriso zvezviyo; vachaita mhiko kuna Jehovha uye vagodzichengeta. <sup>22</sup> Jehovha acharova Ijipiti nehosha; acharova agovara-pazve. Vachatendeukira kuna Jehovha, uye achapindura mikumbiro yavo nokuvarapa.

<sup>23</sup> Pazuva iro, pachava nenzira huru ichabva kuljipiti ichienda kuAsiria. VaAsiria vachaenda kuljipiti uye valjipita vachaendawo kuAsiria. Valjipita navaAsiria vachanamata pamwe chete. <sup>24</sup> Pazuva iro Israeri ichava yechitatu, ichitevera Ijipiti neAsiria, ichava ropafadzo panyika. <sup>25</sup> Jehovha Wamasimba Ose achavaropafadza achiti, “Ngavaropafadzwe valjipita vanhu vangu, navaAsiria, basa ramaoko angu, navaIsraeri, nhaka yangu.”

## 20

### *Chiprofita pamusoro peIjipiti neEtiopia*

<sup>1</sup> Mugore rokusvika kwomutungamiri mukuru, kuAshidhodhi, atumwa naSarigoni mambo weAsiria, akairwisa uye akaitapa, <sup>2</sup> panguva iyoyo Jehovha akataura kubudikidza naIsaya mwanakomana waAmozi. Akati kwaari,

“Bvisa nguo yesaga pamuviri wako neshangu mumakumbo mako.” Iye akaita saizvozvo, akafamba asina nguo uye asina shangu.

<sup>3</sup> Ipapo Jehovha akati, “Sezvakaita Isaya muranda wangu akafamba asina nguo, uye asina shangu kwamakore matatu, sechiratidzo nechishamiso pamusoro peIjipiti neEtiopia, <sup>4</sup> saizvozvo mambo weAsiria achaenda navatapwa veIjipiti, navakadzvingwa veEtiopia, vadiki navakuru, uye magaro ari panze, kuti chive chinyadziso kuIjipiti. <sup>5</sup> Avo vaivimba neEtiopia uye vaizvikudza neIjipiti vachatya uye vachanyadziswa. <sup>6</sup> Pazuva iro, vanhu vaigara pamhenderekedzo ino vachati, ‘Tarirai zvaitika kuna vaya vataivimba navo, vaya vataitizira kwavari kuti vatibatsire uye vatinunure kubva kuna mambo weAsiria! Zvino isu tichapunyuka sei?’ ”

## 21

### *Chiprofita pamusoro peBhabhironi*

<sup>1</sup> Chirevo pamusoro peRenje riri pedyo ne-Gungwa:

Kufanana nechamupupuri chinovhuvhuta no-munyika yezasi,  
mupambi anouya achibva kurenje,  
kubva kunyika inotyisa.

<sup>2</sup> Ndaratidzwa chiratidzo chinorwadza.

Mupanduki anopanduka, muparadzi an-  
otora zvokupamba  
Eramu, rwisa! Medhia, vandira!

Ndichagumisa kugomera kwose kwaakaita  
kuti kuvapo.

<sup>3</sup> Naizvozvo muviri wangu wakazara nokur-  
wadziwa;  
marwadzo akandibata, kufanana  
nomukadzi ari kusununguka;  
ndiri kudzedzereka nezvandinonzwa,  
ndakanganisika nezvandinooona.

<sup>4</sup> Mwoyo wangu woziya,  
kutywa kwondidedereswa;  
rubvunzavaeni rwandaishuva  
rwava chinyangadzo kwandiri.

<sup>5</sup> Vanogadzira matafura,  
vanowaridza micheka pasi,  
vanodya, vanonwa!  
Simukai, imi machinda,  
zodzai nhoo!

<sup>6</sup> Zvanzi nalshe kwandiri:  
“Endai, mundogadza nharirire  
uye muite kuti azivise zvaanoona.

<sup>7</sup> Kana achiona ngoro namapoka amabhiza,  
navatasvi vari pamusoro pembongoro  
kana vatasvi vari pamusoro pengamera,  
ngaave akachenjera, akachenjera zvizere.”

<sup>8</sup> Ipapo nharirire yakadanidzira ichiti,  
“Zuva nezuva, tenzi wangu, ndinomira pamu-  
soro peshongwe yomurindi;  
usiku hwoga hwoga ndinogara panzvimbob-  
yangu.

<sup>9</sup> Tarirai, hoyo murume ari kuuya ari mungoro  
neboka ramabhiza.  
Uye anopa mhinduro achiti,



‘Bhabhironi rawa, rawa!  
Zvifananidzo zvose zvavamwari  
varo zvaputsirwa pasi!’ ”

<sup>10</sup> Haiwa, vanhu vangu vapwanyirwa paburiro,  
ndinokuudzai zvandanzwa kubva kuna  
Jehovha Wamasimba Ose,  
kubva kuna Mwari waIsraeri.

*Chiprofita pamusoro peEdhomu*

<sup>11</sup> Chirevo pamusoro peDhuma:  
Mumwe anodana kwandiri ari kuSeiri, achiti,  
“Nharirire iwe, inguvaiko ino yousiku?  
Nharirire iwe, inguvaiko ino yousiku?”

<sup>12</sup> Nharirire inopindura ichiti,  
“Mambakwedza achauya, asi nousikuwo.  
Zvino kana uchida kubvunza, bvunza;  
uye ugodzokazve.”

*Chiprofita pamusoro peArabhia*

<sup>13</sup> Chirevo pamusoro peArabhia:  
Imi ngoro dzavaDhedhani,  
munodzika misasa mumatenhere eArabhia,  
<sup>14</sup> vigirai vane nyota mvura;  
imi munogara muTema,  
uyai nezvokudya zvavanotiza.

<sup>15</sup> Vari kutiza munondo,  
kubva kumunondo wavhomorwa,  
nokuuta hwawemburwa,  
uye nokupisa kwehondo.

<sup>16</sup> Zvanzi naJehovha kwandiri: “Pachinguva  
chegore rimwe chete, sokuverenga kungaita  
mushandi akabatwa nechibvumirano,  
kuzvikudza kwose kweKedhari kuchapera.

<sup>17</sup> Varume vouta vachapunyuka, ivo mhare

dzeKedhari vachava vashoma.” Jehovha, Mwari weIsraeri ataura.

## 22

### *Chiprofita pamusoro peJerusarema*

- <sup>1</sup> Chirevo pamusoro poMupata weChiratidzo:  
Chii chinokutambudzai zvino,  
zvokuti mose makwira pamusoro  
pamatenga edzimba?
- <sup>2</sup> Haiwa guta rizere nemheremhere,  
haiwa guta renyonganyonga nokupembera?  
Vakaurayiwa venyu havana kubayiwa  
nomunondo,  
kana kufira muhondo.
- <sup>3</sup> Vatungamiri vako vose vatiza pamwe chete;  
vabatwa pasina kushandiswa uta.  
Mose imi makabatwa mukaitwa vasungwa  
pamwe chete,  
kunyange makanga matiza muvengi achiri  
kure.
- <sup>4</sup> Naizvozvo ndakati, “Endai kure neni;  
regai ndicheme kwazvo.  
Musaedza kundinyaradza  
pamusoro pokuparadzwa kwavanhu  
vangu.”
- <sup>5</sup> Ishe, Jehovha Wamasimba Ose,  
ane zuva renyonganyonga nerokutsikira  
pasi nokutyisa muMupata woKuratidza,  
zuva rokukoromorera masvingo  
pasi nerokudanidzira kumakomo.
- <sup>6</sup> Eramu anotora goba,  
pamwe chete navatasvi vamabhiza nengoro;

Kiri anofudugura nhoo.

<sup>7</sup> Mipata yako yakaisvonaka yakazara nengoro,  
 uye vatasvi vamabhiza vakaiswa pamasuo  
 eguta;

<sup>8</sup> kudzivirirwa kweJudha kwakabviswa.

Uye pazuva iro makatarira,  
 kuzvombo muMuzinda weSango;

<sup>9</sup> makaona kuti Guta raDhavhidhi  
 raiva napakakoromoka pakawanda  
 munzvimbo dzokudzivirira;  
 makazvichengetera mvura muDziva reZasi.

<sup>10</sup> Makaverenga dzimba muJerusarema,  
 mukaondomora dzimba kuti musimbise  
 rusvingo.

<sup>11</sup> Makavaka gungwa pakati pamasvingo maviri,  
 kuti muchingidzire mvura yomudziva  
 rakare,  
 asi hamuna kutarira kuna Iye akariita,  
 kana kuva nehanya naIye akazvironga kare.

<sup>12</sup> Ishe, Jehovha Wamasimba Ose,  
 akakudaidzai pazuva iro  
 kuti mucheme uye muungudze,  
 kuti mudzure bvudzi renyu uye mufuge  
 masaga.

<sup>13</sup> Asi tarirai, kune mufaro nokupembera,  
 kubayiwa kwemombe nokuurayiwa kwa-  
 makwai,  
 kudyiwa kwenyama nokunwiwa kwewaini!  
 Munoti, “Ngatidyei uye tinwe,  
 nokuti mangwana tichafa!”

14 Jehovha Wamasimba Ose akazivisa izvi munzeve dzangu achiti, “Kusvikira pazuva rok- ufa kwako, chivi ichi hachizokanganwirwi,” ndizvo zvinotaura Ishe, Jehovha Wamasimba Ose.

15 Zvanzi naIshe, Jehovha Wamasimba Ose: “Enda, undoti kumutariri uyu, kuna Shebhina, mutariri womuzinda, uti kwaari:

16 Uri kuitei pano uye ndiani akakupa mvumo yokuti uzvicherere rinda pano, uchizvivezera rinda rako pakakwirira nokuzvivezera nzvimbo yako yokuzorora mudombo?

17 “Hokoyo, Jehovha ava kuda kukuti dzvi, agokurasira kure, iwe murume wesimba.

18 Achakupomba-pomba sebhora agokukanda munyika yakakura.

Ndimo mauchafira, uye ngoro dzako dzine mbiri dzichasara imomo, iwe wokunyadzisa imba yatenzi wako!

19 Ndichakudzinga pabasa rako, uye uchatandaniswa panzvimbo yako.

20 “Pazuva iro ndichadana muranda wangu, Eriakimi mwanakomana waHirikia.

21 Ndichamupfekedza nguho yako ndigo- musimbisa nebhanhire rako uye ndigoisa masimba ako pamusoro pake. Achava baba kuna vagere muJerusarema nokuimba yaJudha. 22 Ndichaisa papfudzi rake kiyi yeimba yaDhavhidhi; chaanenge azarura hapana angapfiga, uye chaanenge apfiga

hapana angazarura. <sup>23</sup> Ndichamuroverera sembambo panzvimbo yakasimba; achava chigaro chinokudzwa paimba yababa vake. <sup>24</sup> Mbiri yeimba yababa vake ichaturikwa paari; matavi namabukira, nemidziyo midiki yose, kubva pamikombe kusvikira pamakate ose.

<sup>25</sup> “Pazuva iro,” ndizvo zvinotaura Jehovha Wamasimba Ose, “mbambo yakarovererwa panzvimbo yakasimba ichabva; ichatemwa igowisirwa pasi, uye mutoro wakaremba paari uchatemerwa pasi.” Jehovha ataura izvozvo.

## 23

### *Chiprofita pamusoro peTire*

- <sup>1</sup> Chirevo pamusoro peTire:  
 Ungudzai imi zvikepe zveTashishi!  
 Nokuti Tire raparadzwa  
 uye rasiyiwa risina imba kana pangamira  
 zvikepe.  
 Shoko rakasvika kwavari richibva  
 kunyika yeSaipurasi.
- <sup>2</sup> Nyararai, imi vanhu vagere pachiwi  
 nemi vatengesi veSidhoni,  
 imi makapfumiswa navashambadzi vomun-  
 yanza.
- <sup>3</sup> Pamusoro pemvura  
 zhinji zviyo zveShihori zvakayambutswa;  
 mukoho weNairi ndiwo waiva pfuma yeTire,  
 uye ikazova nzvimbo yokutengesera ya-  
 marudzi.
- <sup>4</sup> Nyara, iwe Sidhoni, uye newe nhare yegungwa,

- nokuti gungwa rataura richiti,  
“Handina kumborwadiwa kana kubereka;  
handina kumborera vanakomana kana  
kukurisa vanasikana.”
- <sup>5</sup> Panosvika shoko kuJipiti,  
vacharwadiwa pamusoro peshoko rinobva  
kuTire.
- <sup>6</sup> Yambukirai kuTashishi;  
ungudzai, imi vanhu vagere pachiwi.
- <sup>7</sup> Ko, iri ndiro guta renyu ramafaro here,  
guta rakare kare,  
rakaendeswa kure kure netsoka dzaro  
kundogara kunyika iri kure?
- <sup>8</sup> Ndianiko akarongera Tire izvozvi,  
iro raipa korona,  
vatengesi varo vari machinda,  
vashambadziri varo vane mukurumbira  
munyika?
- <sup>9</sup> Jehovha Wamasimba Ose akaronga izvozvo,  
kuti adzikise kuzvikudza kwekukudzwa  
kwose,  
uye kuti aninipise vose vane mukurumbira  
panyika.
- <sup>10</sup> Rima nyika yako sezvinoitwa mujinga  
meNairi,  
iwe mwanasikana weTashishi,  
nokuti hauchina panomira zvikepe.
- <sup>11</sup> Jehovha akatambanudza ruoko rwake pamu-  
soro pegungwa,  
uye akaita kuti ushe hwaro hudedere.  
Akarayira pamusoro peKenani,  
kuti nhare dzayo dziparadzwe.

12 Akati, “Mafaro ako haachazovapozve,  
iwe mhandara yeSidhoni, yaparadzwa!

“Simuka uyambukire kuSaipurasi;  
Kunyange naikoko haundowani zororo.”

13 Tarira nyika yavaBhabhironi,  
rudzi urwo haruchaverengwi zvino!

VaAsiria vakaiita  
nzvimbo yemhuka dzerenje;  
vakamisa shongwe dzavo dzokurwa,  
vakakoromora nhare dzaro dzikava pasina,  
uye vakarishandura rikava dongo.

14 Ungudzai, imi zvikepe zveTashishi;  
nhare yenyu yaparadzwa!

15 Panguva iyoyo Tire ichakanganwikwa kwa-  
makore makumi manomwe, zvakaenzana na-  
makore oupenyu hwamambo. Asi shure kwa-  
makore makumi manomwe aya, Tire richaitirwa  
sezvinoimbwa rwiyo rwechifeve runoti:

16 “Tora rudimbwa, ufambe nomuguta,  
iwe chifeve chakakanganikwa;  
ridza rudimbwa zvakanaka, imba nziyo zhinji,  
kuitira kuti ugorangarirwa.”

17 Panopera makore makumi manomwe, Je-  
hovha achashanyira Tire. Richadzokerazve  
kubasa raro sechifeve rigofeva noushe hwose  
huri pamusoro penyika. 18 Asi zvarakasham-  
badzira uye nomubayiro waro zvichatsaurirwa  
Jehovha; hazvingachengetwi kana kuvigwa.  
Zvarakashambadzira zvichaendeswa kuna avo  
vanogara pamberi paJehovha, kuti vave nez-  
vokudya zvakawanda nenhumbi dzakanaka.

## 24

### *Kuparadzwa kweNyika naJehovha*

- <sup>1</sup> Tarirai, Jehovha ari kuzoparadza nyika  
 achiiparadza zvachose;  
 achanyangadza kutarisika kwayo  
 uye achaparadzira vanogaramo,
- <sup>2</sup> zvichangofanana,  
 zvinoitirwa muprista nezvinoitirwa vanhu,  
 zvinoitirwa vatenzi nezvinoitirwa muranda,  
 zvinoitirwa vahosi nezvinoitirwa  
 mushandiri,  
 zvinoitirwa mutengesi nezvinoitirwa  
 mutengi,  
 zvinoitirwa anokwereta nezvinoitirwa akw-  
 eretwa,  
 zvinoitirwa anoripa mhindu nezvinoitirwa  
 anoreva mhindu.
- <sup>3</sup> Nyika ichaparadzwa zvachose  
 uye ichatorerwa zvayo zvose.  
 Jehovha ataura shoko irori.
- <sup>4</sup> Nyika inooma uye inosvava,  
 pasi pose panorwadziwa uye panounyana,  
 vanokudzwa venyika vanopera simba uye  
 vanorwadziwa.
- <sup>5</sup> Nyika inosvibiswa navanhu vayo;  
 havana kuteerera mirayiro,  
 vakapandukira mitemo  
 uye vakaputsa sungano isingaperi.
- <sup>6</sup> Naizvozvo chituko chinoparadza nyika,  
 vanhu vayo vanofanira kuzvitakurira  
 mhosva dzavo.  
 Naizvozvo vagari vomunyika vapiswa,  
 uye vashoma ndivo vasara.



- 7 Waini itsva inopera uye muzambiringa unos-  
vava;  
vose vanoda mafaro vanogomera.
- 8 Kufadza kwamakandira kwanyaradzwa,  
kupembera kwavapururudzi kwapera,  
rudimbwa rwomufaro rwanyaradzwa.
- 9 Havangazonwi waini vachiimba rwiyo;  
doro rava kuvava kuanwi varo.
- 10 Guta rakoromorwa rava dongo;  
mukova wokupinda mudzimba dzose wap-  
figwa.
- 11 Vochemera waini mumigwagwa;  
mufaro wose washanduka wava kusuwa,  
mupururu wabviswa panyika.
- 12 Guta rasara rava dongo,  
masuo aro aputswa-putswa.
- 13 Ndizvo zvazvichaita munyika  
napakati pendudzi,  
zvichafanana nokuzunzwa kwomuorivhi,  
kana sezvinosara pakunongwa shure kwego-  
hwo ramazambiringa.
- 14 Vanosimudza manzwi avo, vanopururudza  
nomufaro;  
kubva kumavirira vanoparidza zvoukuru  
hwaJehovha.
- 15 Naizvozvo kumabvazuva, mbiri kuna Jehovha;  
kudzai zita raJehovha Mwari waIsraeri  
pazviwi zvegungwa.
- 16 Kubva kumigumo yenyika tinonzwa kuimba  
kunoti:  
“Ngaakudzwe iye Akarurama.”

Asi ini ndakati, “Ndiri kupera muviri, ndiri  
kupera muviri!

Ndine nhamo!

Vanyengeri vakaita zvinhu nokunyengera!

Vanyengeri vakaita zvinhu nokunyengera  
kukuru!”

17 Kutya negomba zvakakumirirai,  
imi vanhu vapanyika.

18 Ani naani anotiza kutinhira kunotyisa,  
achawira mugomba;  
ani naani anokwira achibuda mugomba  
achabatwa mumusungo.

Nokuti mawindo okudenga azaruka,  
uye nheyo dzapanyika dzozungunuka.

19 Nyika yaputswa-putswa,  
nyika yakamurwa napakati,  
nyika yozungunuswa chose.

20 Nyika yodzedzereka sechidhakwa,  
inozengaira semba iri mumhepo;  
kudarika nokumukira kwayo kwairempera  
kwazvo,  
zvokuti inowa, ikasazomukazve.

21 Pazuva iro Jehovha acharanga masimba  
omuchadenga kumusoro,  
uye namadzimambo ari pamusoro penyika  
pasi.

22 Vachaunganidzwa pamwe chete  
kufanana navasungwa vakasungwa mu-  
gomba;  
vachapfigirwa mutorongo  
vagozorangwa kwamazuva mazhinji.

<sup>23</sup> Mwedzi uchanyadzi swa, zuva richanyara;  
 nokuti Jehovha Wamasimba Ose achatonga  
 pamusoro peGomo reZioni nomuJerusarema,  
 napamberi pavakuru varo, nokubwinya  
 kukuru.

## 25

### *Rumbidzo kuna Jehovha*

<sup>1</sup> Haiwa, Jehovha ndimi Mwari wangu;  
 ndichakukudzai uye ndicharumbidza zita  
 renyu,  
 nokuti nokutendeka kukuru  
 makaita zvinhu zvinoshamisa,  
 zvinhu zvamakaronga kare kare.

<sup>2</sup> Makaita kuti guta rive dutu ramarara,  
 guta rakakomberedzwa rikava dongo,  
 nhare yavatorwa haichazova gutazve;  
 haichazovakwazve.

<sup>3</sup> Naizvozvo vanhu vane simba vachakukudzai;  
 maguta endudzi dzine utsinye achakure-  
 mekedzai.

<sup>4</sup> Manga muri utiziro hwavarombo,  
 utiziro hwaanoshayiwa mukutambudzika  
 kwake,  
 uye dumba panguva yemvura zhinji  
 nomumvuri pakupisa kwezuva.  
 Nokuti kufema kwavano utsinye  
 kwakafanana nemvura zhinji inoroverta  
 parusvingo,

<sup>5</sup> uye kwakafanana nokupisa kwerenje.  
 Munonyaradza bope ravatorwa;  
 sokupisa kunotonhodzwa nomumvuri we-  
 gore,

naizvozvo rwiyo rwavane utsinye rwan-  
yaradzwa.

<sup>6</sup> Pamusoro pegomo iri, Jehovha Wamasimba Ose  
achagadzirira

vanhu vose mutambo wezvakanakora,  
namabiko ewaini yakare,  
nyama yakanakisa uye newaini yakaisvon-  
aka.

<sup>7</sup> Pamusoro pegomo iri,  
achaparadza chifukidziro chinoputira  
marudzi ose,

mucheka unofukidza ndudzi dzose;

<sup>8</sup> iye achamedza rufu nokusingaperi.

Wamasimba Ose achapisika misodzi

kubva pazviso zvose;

achabvisa kunyadziswa kwavanhu vake

panyika yose.

Jehovha ataura.

<sup>9</sup> Pazuva iro vachati,

“Zvirokwazvo uyu ndiye Mwari wedu;

takavimba naye, iye akatiponesa.

Uyu ndiye Jehovha, takavimba naye;

ngatifarei tifarise muruponeso rwake.”

<sup>10</sup> Ruoko rwaJehovha ruchagara pagomo iri,  
asi Moabhu achatsikwa-tsikwa pasi pake,  
samashanga anotsikwa-tsikwa mumup-  
fudze.

<sup>11</sup> Vachatambanudza maoko avo mariri,  
somushambiri anotambanudza maoko ake  
kuti ashambire.

Mwari achaderedza kuzvikudza kwavo,

kunyange vachigona kuita zvakanaka na-  
maoko avo,

12 Achakoromora nhare yako yamasvingo  
 akakwirira agoaputsira pasi;  
 achaakoromorera pasi,  
 muguruva chaimo.

## 26

### *Rwiyo rwoKurumbidza*

1 Pazuva iro rwiyo urwu ruchaimbwa munyika  
 yaJudha:

Tine guta rakasimba;

Mwari anoita kuti ruponeso  
 ruve masvingo nenhare dzaro.

2 Zarurai masuo kuti rudzi  
 rwakarurama rupinde,  
 rudzi runochengeta kutenda.

3 Muchachengeta murugare  
 rwakakwana munhu ane mufungo  
 wakasimba,  
 nokuti anovimba nemi.

4 Vimba naJehovha nokusingaperi,  
 nokuti Jehovha, iye Jehovha ndiye Dombo  
 rokusingaperi.

5 Anoderedza avo vagere pakakwirira,  
 anodzikisa pasi guta rapamusoro;  
 anorideredza kusvikira pavhu  
 uye anorikanda muguruva.

6 Tsoka dzicharitsikirira pasi,  
 tsoka dzavakamanikidzwa,  
 idzo tsoka dzavarombo.

7 Nzira yavakarurama yakati checheterere;  
 imi Akarurama, munoita kuti nzira  
 yavakarurama iti checheterere.

- 8 Hongu, Jehovha tichifamba munzira yomurayiro wenyu,  
tinokumirirai;  
zita renyu nemukurumbira  
wenyu ndizvo chishuwo chemwoyo yedu.
- 9 Mwoyo wangu unokushuvai pausiku;  
mangwanani, mweya wangu unokupangai.  
Kutonga kwenyu pakunouya panyika,  
vanhu vanogara panyika vanodzidza zvokururama.
- 10 Kunyange nyasha dzichiratidzwa kuna  
vakaipa, ivo havadzidzi kururama;  
kunyange munyika yokururama,  
vanongoramba vachiita zvakaipa,  
uye havana hanya noukuru hwaJehovha.
- 11 Haiwa Jehovha, ruoko rwenyu  
rwakasimudzirwa kumusoro,  
asi havaruoni.  
Ngavaone kushingaira kwenyu pamusoro pa-  
vanhu venyu vagonyadziswa;  
moto wakachengeterwa vavengi venyu  
ngauvaparadze.
- 12 Jehovha, imi munotigadzirira rugare;  
zvose zvatakakwanisa ndimi makatiitira.
- 13 Haiwa Jehovha Mwari wedu, mamwe  
madzishe kunze kwenyu akatitonga,  
asi zita renyu ndiro ratinokudza chete.
- 14 Ivo vakafa zvino, havacharamizve;  
mweya yavakafa haimuki.  
Makavaranga mukavaparadza;  
makabvisa chirangaridzo chavo.
- 15 Makakurisa rudzi, imi Jehovha;  
makakurisa rudzi.

Makazviwanira mukurumbira;  
mukakurisa miganhu yose yenyika.

16 Jehovha, vakauya kwamuri mumatambudziko  
avo;  
pamakavarova,  
havana kugona kuzevezera munyengetero.

17 Sezvinoita mukadzi ane mimba oda kusununguka,  
anomonyoroka mukurwadziwa kwake,  
agochema kwazvo,  
ndizvo zvatakanga takaita pamberi penyu,  
imi Jehovha.

18 Takanga tine mimba, tichimonyoroka mukurwadziwa,  
asi takabereka mhupo.

Hatina kuvigira nyika ruponeso;  
hatina chatakaberekera vanhu venyika.

19 Asi vakafa venyu vachararama;  
miviri yavo ichamuka.

Imi mugere muguruva,  
mukai mupembere.

Dova renyu rakaita sedova ramangwanani;  
nyika ichabudisa vakafa vayo.

20 Chiendai, vanhu vangu,  
pindai mumakamuri enyu,  
mugopfiga mikova shure kwenyu;  
muvande kwechinguva kusvikira kutsamwa  
kwake kwapfuura.

21 Tarirai, Jehovha ari kubuda muugaro hwake,

kuti arange vanhu venyika nokuda kwezvivi  
zvavo.  
Nyika ichafukura ropa rakateurwa pamusoro  
payo;  
haichazovanzizve vakaurayiwa vayo.

## 27

### *Kusunungurwa kwaIsraeri*

- <sup>1</sup> Pazuva iro,  
Jehovha acharanga nomunondo wake,  
iwo munondo wake mukuru une simba uye  
unotyisa,  
Revhiatani nyoka inokurumidza,  
Revhiatani nyoka inogonyana;  
achauraya chikara chomugungwa.
- <sup>2</sup> Pazuva iro,  
“Imbai nezmuzambiringa unobereka:  
<sup>3</sup> Ini Jehovha ndini ndinouchengeta;  
ndinoramba ndichiudiridzira.  
Ndinourinda masakati nousiku  
kuitira kuti parege kuva neanoukanganisa.
- <sup>4</sup> Handina kutsamwa.  
Dai paingova nerukato neminzwa zvinorwa  
neni!  
Ndaienda kundorwa nazvo;  
ndaizvipisa zvose nomoto.
- <sup>5</sup> Kana kuti ngazviuye zvizovanda kwandiri;  
ngazviyanane neni, hongu, ngazviyanane  
neni.”
- <sup>6</sup> Mumazuva anouya, Jakobho achadzika midzi,  
Israeri achabukira uye achatunga maruva,  
agozadza nyika yose nomuchero,



- 7 Ko, Jehovha akamurova here  
sezvaanorova avo vakamurova?  
Akaurayiwa here  
sokuurayiwa kwakaitwa avo vakamuuraya?
- 8 Muhondo makarwa naye mukamudzinga,  
nokurwisa kwake kunotyisa akamudzinga,  
sezvinoitika pazuva rinovhuvhuta mhengo  
yokumabvazuva.
- 9 Zvino nenzira iyi, mhosva yaJakobho ichadzik-  
inurwa,  
uye izvi zvichava chibereko chakazara  
chokubviswa kwechivi chake:  
Paanoita kuti aritari dzose dzifanane namabwe  
omunyaka akaputswa-putswa,  
hapana matanda aAshera kana aritari  
dzezvinonhuhwira zvichasiyiwa  
zvakanamira.
- 10 Guta rakakomberedzwa norusvingo rasiyiwa  
rava dongo,  
hwava ugaro hwakasiyiwa,  
kufanana nerenje;  
mhuru dzofura ikoko, uye ikoko ndiko  
kwadzinovata;  
dzinosiya matavi asisina chinhu.
- 11 Panooma matavi acho, anovhuniwa,  
uye vakadzi vanouya vovesa moto nawo.  
Nokuti vanhu ava havana njere;  
nokudaro Muiti wavo haachina tsitsi pamu-  
soro pavo,  
uye Musiki wavo haangavaitiri nyasha.
- 12 Pazuva iro Jehovha achapura kubva panoy-  
erera Yufuratesi kusvikira paRukova rweIjipiti,  
uye imi vaIsraeri, muchaunganidzwa muchiita  
mumwe mumwe. 13 Uye pazuva iro hwamanda

huru icharira. Vakanga vofira muAsiria uye navaya vakanga vatizira kuJipiti vachauya ku-zonamata Jehovha pamusoro pegomo dzvene riri muJerusarema.

## 28

### *Nhamo kuna Efiremu*

- 1 Ine nhamo korona yokuzvikudza, yezvidhakwa zveEfiremu,  
neruva rosvava pakubwinya kworunako rwaro,  
riri pamusoro pemipata yakaorera  
yaavo vakurirwa newaini!
- 2 Tarira, Ishe ano mumwe ane simba uye anokurira.  
Sechimvuramabwe uye nedutu rinoparadza,  
sedutu remvura zhinji uye samafashamu emvura inonaya,  
achaiwisira pasi nesimba guru.
- 3 Iya korona, yokuzvikudza yezvidhakwa zveE-  
firemu,  
ichatsikwa-tsikwa pasi petsoka.
- 4 Ruva riya rosvava pakubwinya kworunako rwaro,  
riri pamusoro pomupata wakaorera,  
richafanana neonde raibva gohwo risati rasvika,  
munhu achingoriona, anoritanha noruoko rwake,  
obva aridya pakarepo.
- 5 Pazuva iro Jehovha Wamasimba Ose achava korona inobwinya,

chishongo chakanaka chavanhu vake  
vakasara.

<sup>6</sup> Achava mweya wokururamisira  
kuna iye anogara pakutonga,  
chitubu chesimba kuna avo  
vanodzoseera shure vanorwa pasuo.

<sup>7</sup> Ivavawo vanodzedzereka newaini  
uye vanozengaira nedoro:  
Vaprista navaprofita vanodzedzereka nedoro,  
uye vanonyonganiswa newaini;  
vanozengaira nedoro,  
vanodzedzereka pavanoona zviratidzo,  
vanogumburwa pakutonga.

<sup>8</sup> Tafura dzose dzazara marutsi  
uye hapachina nzvimbo isina tsvina.

<sup>9</sup> “Ndianiko waachadzidzisa ruzivo?  
Ndianiko waanotsanangurira shoko?  
Kuvana vakarumurwa pamukaka,  
kuna avo vachangobva pazamu here?”

<sup>10</sup> Nokuti zvinoti:  
Chirevo pamusoro pechirevo, chirevo pamu-  
soro pechirevo,  
mutsara pamusoro pomutsara, mutsara pa-  
musoro pomutsara,  
apa zvishoma, apo zvishoma.”

<sup>11</sup> Zvirokwazvo, Mwari achataura kurudzi urwu  
nemitauro yavatorwa,  
nendimi dzokumwe,

<sup>12</sup> kwavari akati, “Iyi ndiyo nzvimbo yokuzorora,  
vakaneta ngavazorore,”  
uye, “Iyi ndiyo nzvimbo yorunyararo,”

- asi havana kumboteerera.  
 13 Saka zvino, shoko raJehovha kwavari richava:  
 Chirevo pamusoro pechirevo, chirevo pamu-  
 sororo pechirevo,  
 mutsara pamusoro pomutsara, mutsara pa-  
 musoro pomutsara,  
 apa zvishoma, apo zvishoma,  
 kuitira kuti vaende vagondowa, vavhunike,  
 vabatwe nomusungo vagotapwa.
- 14 Naizvozvo inzwai shoko raJehovha, imi vaseki,  
 imi vanotonga rudzi urwu muJerusarema.
- 15 Munozvirumbidza muchiti, “Takaita sungano  
 norufu,  
 takatenderana neguva.  
 Shamhu inokukura painouya,  
 haizotibati,  
 nokuti nhema takadziita utiziro hwedu,  
 uye kunyengera takakuita nzvimbo yedu  
 yokuvanda.”
- 16 Saka zvanzi naJehovha Wamasimba Ose:  
 “Tarirai ndinoisa ibwe muZioni,  
 ibwe rakaedzwa,  
 ibwe rinokosha rapakona kuti rive nheyo  
 yakasimba;  
 anovimba naro haangavhunduki.
- 17 Ndichaita kuti kururamisira kuve rwodzi  
 rwokururamisira,  
 uye kururama ndichakuita chokururamisa  
 nacho;  
 chimvuramabwe chichakukura utiziro hwenyu,  
 idzo nhema,  
 uye mvura ichafukidza nzvimbo yenyu  
 yokuvanda.

- 18 Sungano yenyu norufu ichadzimwa;  
 chitenderano chenyu neguva hachingamiri.  
 Shamhu inokukura painouya,  
 muchakundwa nayo.
- 19 Nguva nenguva painouya ichakutakurai  
 ichikuendesai kure;  
 mangwanani achitevera mamwe  
 mangwanani, panguva dzamasikati  
 nenguva dzousiku,  
 ichakukura.”

Kunzwisisa shoko iri  
 kuchauyisa kutya.

- 20 Nokuti mubhedha uchava mupfupi pakutan-  
 davara,  
 uye jira richava diki zvokuti munhu haan-  
 gagoni kufukidzwa naro.
- 21 Nokuti Jehovha achasimuka sezvaakaita  
 paGomo rePerazimi,  
 achatsamwa sezvaakaita muMupata weGib-  
 heoni,  
 kuti aite basa rake, iro basa risinganzwisiki,  
 uye azadzise basa rake, basa risinganzwi-  
 sisiki.
- 22 Zvino chiregai kudada kwenyu,  
 nokuti ngetani dzenyu dzichanyanya  
 kukuremerai;  
 Ishe, iye Jehovha Wamasimba Ose,  
 andiudza pamusoro pokuparadzwa  
 kwakatemwa pamusoro penyika yose.
- 23 Teerera iye munzwe inzwi rangu;  
 rerekai nzeve dzenyu munzwe zvandi-  
 noreva.

- 24 Murimi paanorimira kuti agodyara, anoramba  
achingorima here?  
Ko, anoramba achingorima kana kuhara  
here?
- 25 Paanoenzanisa munda wake kuti uti  
chechetere,  
haangadyari karawe uye agokusha kumini  
here?  
Haangadyari gorosi munzvimbo yaro,  
nebhari mumunda wayo,  
nesipereti mumunda wayo here?
- 26 Nokuti Mwari wake anomurayiridza  
uye achamudzidzisa nzira yakanaka.
- 27 Karawe haipurwi nechireyi,  
uye vhiri rengoro harikunguruswi pamu-  
soro pekumini;  
karawe inopurwa nemhuro  
uye kumini inopurwa norumuti.
- 28 Zviyo zvinofanira kukuyiwa kuti zviitiswe  
chingwa;  
saka munhu haafaniri kuramba achin-  
gopura nokusingaperi.  
Kunyange achifambisa mavhiri engoro yake  
yokupura pamusoro pazvo, mabhiza ake  
haazvikuyi.
- 29 Izvi zvose zvinobvawo kuna Jehovha Wa-  
masimba Ose,  
anoshamisa mukurayira uye mukuru  
kwazvo muuchenjeri.

## 29

*Nhamo kuGuta raDhavhidhi*

- <sup>1</sup> Une nhamo iwe Arieri, Arieri,  
 guta raigara Dhavhidhi!  
 Wedzera gore pagore;  
 uye regai nguva dzemitambo yenyu dzi-  
 rambe dziripo.
- <sup>2</sup> Kunyange zvakadaro, ndichakomba Arieri;  
 pachava nokuungudza uye nokuchema,  
 richafanana nechoto chearitari kwandiri.
- <sup>3</sup> Ndichakukomba kumativi ose;  
 ndichakukomberedza neshongwe  
 uye ndichavaka nhare dzokurwa newe.
- <sup>4</sup> Uchadzikisirwa pasi, uchataura uri pasi;  
 kutaura kwako kuchabva muguruva.  
 Inzwi rako richava seresvikiro rinobva pasi  
 muvhu;  
 kutaura kwako kuchaita zevezeve kuchibva  
 muguruva.
- <sup>5</sup> Asi vavengi vako vazhinji vachava seguruva  
 rakatsetseka,  
 vane utsinye vachafanana nehundi in-  
 opepereswa.
- Pakarepo, nokukurumidza  
<sup>6</sup> Jehovha Wamasimba Ose achauya  
 nokutinhira nokudengenyeka kwenyika, uye  
 nemheremhere huru,  
 nechamupupuri, nedutu guru uye nomu-  
 razvo womoto unoparadza zvose.
- <sup>7</sup> Ipapo mhomho dzendudzi dzose dzakawanda  
 dzinorwa neArieri,  
 dzinorirwisa iro nenhare dzaro uye dzi-  
 norikomba,  
 zvichaita sokurota,  
 nechiratidzo chinoonekwa usiku,

8 sezvinoitwa nomunhu ane nzara anorota  
 achidya,  
 asi apepuka, anowana nzara yake ichiripo;  
 sezvinoita munhu ane nyota anorota achinwa  
 mvura,  
 asi omuka achiziya, nyota yake isina kupera.  
 Naizvozvo ndizvo zvichaitawo marudzi ose  
 akawanda  
 anorwa neGomo reZioni.

9 Katyamarai uye mushamiswe,  
 zvipofumadzei muve vasingaoni;  
 dhakwai asi kwete newaini;  
 dzedzerekai asi kwete nedoro.

10 Jehovha akauyisa pamusoro penyu hope huru;  
 Akafukidza meso enyu, vaprofita;  
 akafukidza misoro yenyu, vaoni.

11 Nokuti kwamuri, chiratidzo ichi hachizi  
 chinhu asi mashoko akanamirwa murugwaro.  
 Uye kana mukapa rugwaro kuno mumwe  
 munhu anogona kuverenga, mukati kwaari,  
 “Ndapota, verenga izvi,” achapindura achiti,  
 “Handikwanisi, nokuti rwakanamirwa.” 12 Kana  
 kuti mukapa rugwaro kuno mumwe asin-  
 gagoni kuverenga, mukati kwaari, “Ndapota,  
 verenga izvi,” achapindura achiti, “Handigoni  
 kuverenga.”

13 Ishe anoti:  
 “Vanhu ava vanoswedera kwandiri nemiromo  
 yavo,  
 uye vanondikudza nemiromo yavo,  
 asi mwoyo yavo iri kure neni.

Kundinamata kwavo



kwangova kwemitemo inodzidziswa na-  
vanhu chete.

14 Naizvozvo ndichashamisa vanhu ava zvakare  
nechishamiso pamusoro pechishamiso;  
uchenjeri hwavakachenjera huchaparadzwa,  
zivo yavane zivo ichapera.”

15 Vane nhamo avo vanosvika kwakadzika dzika  
kuti vavanzire Jehovha mano avo,  
vanoita mabasa avo murima vachifunga mum-  
woyo yavo kuti,  
“Ndiani anotiona? Ndiani achaziva?”

16 Munoshandura mamiriro ezvinhu,  
sezvinonzi muumbi wehari anonzi ndiye  
ivhu!

Ko, chakaumbwa chingati kuna iye akachiumba,  
“Iye haana kundiita?”

Ko, hari ingati kumuumbi,  
“Iye haana chaanoziva?”

17 Ko, Rebhanoni haingashandurwi ikava munda  
wakaorera muchinguva chidiki,  
uye munda wakaorera ugoita kunge dondo?

18 Pazuva iro vanamati vachanzwa shoko rorug-  
waro,  
uye meso amapofu achaona  
ari pakasviba naparima.

19 Zvakare vanozvinipisa vachafara muna Je-  
hovha;  
vanoshayiwa vachafara muMutsvene waIs-  
raeri.

20 Vane utsinye vachaparadzwa,  
vaseki vachanyangarika,  
uye vose vane ziso rinofarira zvakaipa  
vachaurayiwa,

- 21 avo vanopomera munhu mhosva neshoko chete,  
 vanoisira musungo kuna anoruramisira mudare,  
 uye nouchapupu hwenhema, vanokonesa kururamisirwa kwavasina mhosva.
- 22 Naizvozvo izvi ndizvo zvinotaura Jehovha, akadzikinura Abhurahama, achiti kuimba ya-Jakobho:  
 “Jakobho haachazonyadziswizve; zviso zvavo hazvichazocheneruki.
- 23 Pavachaona vana vavo pakati pavo, iro basa ramaoko angu, vachachengeta zita rangu muutsvene; vachaziva utsvene hwoMutsvene wajakobho,  
 uye vachamira vachitya Mwari waIsraeri.
- 24 Vakarasika pamweya vachawana njere; vanonyunyuta vachagamuchira kurayirwa.”

## 30

### *Rune Nhamo Rudzi Rwakasindimara*

- 1 “Vane nhamo vana vakasindimara,” ndizvo zvinotaura Jehovha,  
 “kuna avo vanoita urongwa husati huri hwangu, vanoita sungano, asi vasingaiti noMweya wangu,  
 vachiunganidza chivi pamusoro pechivi;
- 2 vanoenda kuljipiti vasina kundibvunza;  
 vanotsvaka rubatsiro rworudziviriro rwaFaro, vanotsvaka utiziro kumumvuri weIjipiti.
- 3 Asi kudzivirira kwaFaro kuchava kunyadziswa kwenyu,

mumvuri           welJipiti           uchakuvigirai  
 kunyadziswa,  
<sup>4</sup> kunyange vaine machinda muZoani  
     uye nhume dzavo dzasvika muHanesi,  
<sup>5</sup> mumwe nomumwe wavo achanyadziswa  
     nokuda kwavanhu vasina betsero kwavari,  
 vasingavavigiri rubatsiro kana ruyamuro,  
     asi kunyadziswa chete nokuzvidzwa.”  
<sup>6</sup> Chirevo pamusoro pemhuka dzeNegevhi:  
 nomunyika yenhamo namatambudziko,  
     yeshumba neshumbakadzi,  
     yemvumbi nenyoka dzine hashu uye dzinob-  
     hururuka,  
 nhume dzinotakura pfuma yadzo pamusoro  
     pembongoro,  
     noupfumi hwadzo pamusoro penyundwa  
     dzengamera,  
 dzichihuendesha kurudzi rusingabatsiri,  
<sup>7</sup> kuJipiti kuno rubatsiro rusina maturo  
     chose.  
 Naizvozvo ndinomutumidza zita rokuti  
     Rahabhi Asina Chaanoita.  
<sup>8</sup> Chienda iye zvino, unovanyorera pahwendefa  
     izvozvo,  
     uzvinyore murugwaro,  
 kuti pamazuva anouya  
     chigova chapupu nokusingaperi.  
<sup>9</sup> Ava ndivo vanhu vakapanduka, vana vokun-  
     yengera,  
     vana vasingadi kunzwa kurayira kwaJe-  
     hovha.  
<sup>10</sup> Vanoti kuvaoni,  
     “Regai kuonazve zviratidzo!”

nokuvaprofita,

“Regai kutipazve zviratidzo zvezvakanaka!

Tiudzei zvinhu zvinofadza,  
muprofite zvinonyengera.

<sup>11</sup> Siyai nzira iyi,

ibvai mugwara iri,

murege kuita kuti timisidzane  
noMutsvene waIsraeri!”

<sup>12</sup> Naizvozvo zvanzi naMutsvene waIsraeri:

“Nokuti makaramba shoko rangu iri,  
mukasendamira pakumanikidza  
uye mukavimba nokunyengera,

<sup>13</sup> chivi ichi chichava kwamuri

sorusvingo, rwakatsemuka nokufutunuka,  
runoondomoka pakarepo uye nokukuru-  
midza.

<sup>14</sup> Ruchaputsika kuita zvimedu zvimedu sehari,  
yakaputswa noutsinye

zvokuti pakati pezvimedu zvayo hapana  
kuwanikwa chaenga chakasara,  
chokugoka mazimbe omoto pachoto  
kana chokuchera nacho mvura kubva mu-  
chitubu.”

<sup>15</sup> Zvanzi naIshe Jehovha, Mutsvene waIsraeri:

“Mukutendeuka nezororo ndimo mune  
ruponeso rwenyu,

murunyararo nomukuvimba ndimo mune  
simba renyu,

asi imi makaramba chimwe chazvo.

<sup>16</sup> Imi makati, ‘Kwete, tichatiza takatasva mab-  
hiza.’

Naizvozvo muchatiza!

Imi makati, ‘Tichatasva mabhiza anomhanya  
kwazvo.’

Naizvozvo vadzinganisi venyu  
vachamhanya kwazvo!

17 Chiuru chimwe chete chichatiza  
nokuvhundutsa kwomumwe chete;  
imi mose muchatiza  
kuvhundutsa kwavashanu,  
kusvikira masara  
maita sedanda romureza riri pamusoro pe-  
gomo,  
kuita somureza pamusoro pechikomo.”

18 Asi Jehovha anoshuva kukuitirai nyasha;  
anosimuka kuti akuratidzei tsitsi.  
Nokuti Jehovha ndiMwari wokururamisira.  
Vakaropafadzwa vose vanomurindira!

19 Haiwa imi vanhu veZioni, vanogara  
muJerusarema, hamuchazochemizve.  
Achava nenyasha sei pamunochemera  
rubatsiro! Achingozvinzwa, achakupindurai.

20 Kunyange Ishe achikupai chingwa chenhamo  
nemvura yokutambudzika, vadzidzi venyu  
havachazovanzwizve; muchavaona nameso  
enyu pachenyu. 21 Kunyange mukatendeukira

kurudyi kana kuruboshwe, nzeve dzenyu  
dzichanzwa inzwi mumashure menyu,  
richiti, “Iyi ndiyo nzira, fambai mairi.”

22 Ipapo muchasvibisa zvifananidzo zvenyu  
zvakafuludzwa nesirivha nezviumbwa zvenyu  
zvakafuludzwa negoridhe; muchazvirasira kure  
somucheka wakasvibiswa neropa romukadzi  
ari kumwedzi kwake muchiti kwazviri, “Ibvai  
pano!”

23 Achakutumiraiwo mvura yokumeresa  
mbeu dzamunodyara muvhu, uye zvokudya

zvichabva munyika zvichange zvakanyatsosvika uye zvakawanda kwazvo. Pazuva iro, nzombe dzenyu dzichafura mumafuro akafaranuka.

<sup>24</sup> Nzombe nembongoro dzinorima munda zvichadya mashanga noupfu, zvakaparadzirwa neforogo nefoshoro. <sup>25</sup> Pazuva rokuuraya

kukuru, panowira shongwe pasi, hova dzemvura dzichayerera pamusoro pamakomo ose akakwirira napamusoro pezvikomo zvakareba.

<sup>26</sup> Mwedzi uchapenya sezuva, uye zuva richapenya kakapetwa kanomwe, kufanana nechiedza chamazuva manomwe azere, Jehovha paanosunga mavanga avanhu vake agorapa maronda aakavakuvadza nawo.

<sup>27</sup> Tarirai, Zita raJhovha rasvika richibva kure, rine hasha dzinopfuta moto namakore outsi hwakasviba kuti ndo-o;

miromo yake yakazara nokutsamwa,  
uye rurimi rwake moto unoparadza.

<sup>28</sup> Kufema kwake kunofanana nokuyerera kwemvura ine simba zhinji, inokwira ichisvika mumutsipa.

Anozungura ndudzi murusero rwokuparadza;  
anoisa mushaya dzavanhu matomu anovatsausa.

<sup>29</sup> Uye muchaimba sapausiku hwamunopemberera mutambo mutsvene;

mwoyo yenyu ichafara  
sezvinoita vanhu vanokwira kugomo raJhovha,  
nokuDombo raIsraeri, vachiridza nyere.

- 30 Jehovha achaita kuti vanhu vanzwe inzwi rake  
roumambo,  
uye achaita kuti vaone ruoko rwake ruchibu-  
ruka pasi,  
nehasha zhinji nomoto wokuparadza,  
nokuputika kwamakore, kunaya kwemvura  
zhinji nechimvuramabwe.
- 31 Inzwi raJehovha richaparadza vaAsiria;  
achavarova netsvimbo yake.
- 32 Shamhu yoga yoga yavacharohwa nayo naJe-  
hovha  
netsvimbo yake yokuranga,  
ichaenderana nerwiyo rwamakandira  
norudimbwa,  
paacharwa navo muhondo noruoko rwake.
- 33 Tofeti yakanguri yagadzirira;  
yakagadzirirwa kare kugamuchira mambo.  
Gomba rayo romoto rakadzikiswa rika-  
pamhamiswa,  
uye pane moto wakawanda nehuni zhinji;  
kufema kwaJehovha,  
sorukova runopfuta nesafuri,  
kuchazvitungidza.

## 31

### *Vane Nhamo Vanovimba neIjipiti*

- 1 Vane nhamo avo vanoburukira kuIjipiti kun-  
dotsvaka rubatsiro,  
vanovimba namabhiza,  
vanovimba nokuwanda kwengoro dzavo  
uye nesimba guru ravatasvi vavo vamab-  
hiza,  
asi vasingatariri kuMutsvene waIsraeri,

kana kutsvaka rubatsiro runobva kuna Jehovahha.

<sup>2</sup> Kunyange zvakadaro naiyewo akachenjera uye anogona kuuyisa njodzi;

haangadzosi mashoko ake.

Iye achamukira imba yavakaipa,

naavo vanobatsira vanoita zvakaipa.

<sup>3</sup> Asi vaJipita vanhu uye havasi Mwari,

mabhiza avo inyama uye haasi mweya.

Zvino panotambanudza Jehovahha ruoko rwake,

uyo anobatsira achagumburwa,

uyo achabatsirwa achawa;

vose vachaparara pamwe chete.

<sup>4</sup> Zvanzi naJehovha kwandiri:

“Sezvinoita shumba inoomba,

shumba huru pamusoro pechayabata,

kunyange mhomho yose yavafudzi

ikakokerwa pamwe chete kuzorwa

neshumba iyi,

iyo haingavhundutswi noruzha rwavo,

kana kukanganiswa nemhere yavo,

saizvozvo Jehovahha Wamasimba Ose achabu-

rukira pamusoro peGomo reZioni

napazvikomo zvaro kuzorwa hondo.

<sup>5</sup> Seshiri dzinobhururuka napamusoro,

Jehovha Wamasimba Ose achadzivirira

Jerusarema;

acharidzivirira, acharirwira,

achadarika pamusoro paro uye acharisunungura.”

<sup>6</sup> Dzokerai kuna iye wamakamukira zvikuru,

imi vaIsraeri. <sup>7</sup> Nokuti pazuva iro mumwe

nomumwe wenyu acharamba zvifananidzo



zvesirivha negoridhe zvakaitwa namaoko enyu akaipa.

<sup>8</sup> “Asiria ichawisirwa pasi nomunondo usati uri womunhu; munondo, kwete wavanhu, uchavapedza.

Vachatiza pamberi pomunondo uye majaya avo achaiswa kuchibharo.

<sup>9</sup> Nhare dzavo dzakasimba dzichawa nokuda kwokutya; vatungamiri vavo vachavhundutswa pavachaona mureza wehondo,”

ndizvo zvinotaura Jehovha, ane moto wake paZioni choto chake chiri muJerusarema.

## 32

### *Umambo hwoKururama*

<sup>1</sup> Tarirai mambo achatonga nokururama, uye vatongi vachatonga nokururamisira.

<sup>2</sup> Munhu mumwe nomumwe achafanana nen-zvimbo yokuvanda kubva kumhepo, noutiziro kubva pakunaya kwemvura zhinji, sehova dzemvura mugwenga nomumvuri webwe guru munyika yafa nenyota.

<sup>3</sup> Ipapo meso avose vanoona haachazotsinzini, uye nzeve dzavanonzwa dzichateerera.

<sup>4</sup> Ndangariro dzavanokurumidzira zvinhu dzichaziva uye dzichanzwisisa, uye vanokakama vachataura zvakanaka uye zvinonzwika.

<sup>5</sup> Benzi harichazonzi munhu anokudzwa, munhu asina maturo haazoremekedzwi.

<sup>6</sup> Nokuti benzi rinotaura zvoupenzi,

ndangariro dzaro dzinofunga zvakaipa:  
 Zvaanoita hazvina umwari  
 uye anoparadzira zvinhu zvakararika zvisiri  
 zvaJehovha;  
 anosiya vane nzara vasina chinhu  
 uye anonyima mvura vane nyota.  
 7 Nzira dzousina maturo dzakaipa,  
 anoita rangano dzakaipa  
 kuti aparadze varombo nenhema,  
 kunyange chichemo chaanoshayiwa  
 chakanaka hacho.  
 8 Asi munhu anokudzwa anoita urongwa  
 hwakanaka,  
 uye namabasa anokudzwa.

*Vakadzi veJerusarema*

9 Imi vakadzi musina hanya,  
 simukai muteererere kwandiri;  
 imi vanasikana munoti makachengetedzeka,  
 inzwai zvandinoreva!  
 10 Gore risati rapera  
 muchabvunda iyemi munoti makachenget-  
 edzeka;  
 nokuti kuchekwa kwamazambiringa  
 kuchakundikana,  
 uye kutanhwa kwemichero hakuchasviki.  
 11 Dederai, imi vakadzi musina hanya;  
 dedera imi vanasikana munoti  
 makachengetedzeka!  
 Bvisai nguo dzenyu,  
 monerai masaga muzviuno zvenyu.  
 12 Muzvirove zvipfuva nokuda kweminda  
 yakanaka,  
 nokuda kwezvibereko zvemizambiringa,

- 13 uye nokuda kwenyika yavanhu vangu,  
nyika yamera minzwa norukato,  
hongu, mucheme nokuda kwedzimba dzose dza-  
mafaro,  
uye nokuda kweguta rinopururudza iri.
- 14 Nhare dzichasiyiwa,  
guta roruzha richasara risina munhu;  
nhare neshongwe zvichava dongo nokusin-  
gaperi,  
mufaro wembongoro, namafuro ezvipfuwo,
- 15 kusvikira Mweya wadururirwa pamusoro  
pedu uchibva kumusoro,  
uye gwenga rava nyika yakaorera,  
nemunda wakaorera wava sesango.
- 16 Kururamisira kuchagara kugwenga  
uye kururama kuchagara kumunda wakaor-  
era.
- 17 Chibereko chokururama chichava rugare;  
uye chibereko chokururama chichava run-  
yararo nokuvimba nokusingaperi.
- 18 Vanhu vangu vachagara munzvimbo dzoru-  
gare,  
mumisha yakachengetedzeka,  
munzvimbo dzokuzorora dzakadzikama.
- 19 Kunyange chimvuramabwe chikafukidza  
sango,  
neguta rikaparadzwa zvachose,
- 20 ucharopafadzwa zvakiniko,  
uchidyara mbeu dzako pedyo nehova dzose,  
uye uchirega mombe nembongoro dzako  
zvichifura zvakasununguka!

## 33

### *Kutambudzika noKubatsirwa*

- <sup>1</sup> Une nhamo iwe, muparadzi,  
iyewe usati wamboparadzwa!  
Une nhamo iwe, mupanduki,  
iyewe usati wambopandukirwa!  
Paunorega kuparadza,  
iwe uchaparadzwa;  
paunorega kupandukira,  
iwe uchapandukirwa.
- <sup>2</sup> Haiwa Jehovha, tinzwirei tsitsi;  
tinokupangai imi.  
Ivai simba redu mangwanani oga oga,  
noruponeso rwedu panguva yokutam-  
budzika.
- <sup>3</sup> Pakutinhira kwenzwi renyu, ndudzi dzinotiza;  
pamunosimuka, marudzi anopararira.
- <sup>4</sup> Haiwa imi ndudzi, zvakapambwa zvenyu  
zvachekwa kunge zvachekwa nemhashu  
diki;  
vanhu vanomhanyira kwazviri segwatak-  
wata remhashu.
- <sup>5</sup> Jehovha asimudzirwa, iye anogara kumusoro;  
achazadza Zioni nokururamisira nokuru-  
rama.
- <sup>6</sup> Achava nheyo yechokwadi yenguva yenyu,  
nedura repfuma yoruponeso, uchenjeri  
nezivo;  
kiyi yepfuma iyi ndiko kutya Jehovha.
- <sup>7</sup> Tarirai, mhare dzavo dzinodanidzira munzira  
dzomumisha;

- nhume dzorugare dzinochema zvikuru.  
<sup>8</sup> Migwagwa mikuru yasiyiwa,  
 vafambi havachisimo mumigwagwa.  
 Sungano yaputswa,  
 zvapupu zwayo zvazvidzwa,  
 hapachina anoremekedzwa.  
<sup>9</sup> Nyika inochema uye yoparara,  
 Rebhanoni yanyadziswa uye yasvava;  
 Sharoni yafanana neArabha,  
 uye Bhashani neKarimeri dzakurumuka  
 mashizha adzo.
- <sup>10</sup> “Zvino ini ndichasimuka,” ndizvo zvinotaura  
 Jehovha.  
 “Zvino ini ndichakudzwa;  
 zvino ini ndichasimudzirwa pamusoro.
- <sup>11</sup> Munoita mimba yehundi,  
 munobereka mashanga;  
 kufema kwenyu ndiwo moto unoku-  
 paradzai.
- <sup>12</sup> Marudzi achapiswa kunge suko;  
 vacharirima kunge huni dzeminzwa dza-  
 katemwa.”
- <sup>13</sup> Imi vari kure, inzwai zvandakaita;  
 imi vari pedyo, bvumai kuti ndine simba!
- <sup>14</sup> Vatadzi vari muZioni vavhundutswa;  
 vasina Mwari vodedera:  
 “Ndianiko pakati pedu  
 angagare nomoto unopisa nokusingaperi?”
- <sup>15</sup> Iye anofamba nokururama  
 uye anotaura zvakanaka,  
 anoramba pfuma inobva pakumanikidza

uye anodzivisa ruoko rwake kugamuchira  
fufuro,  
anodzivisa nzeve dzake kunzwa rangano dzoku-  
uraya,  
uye anotsinzina meso ake kuti arege kuona  
zvakaipa,

<sup>16</sup> uyu ndiye munhu achagara pakakwirira,  
nhare dzegomo dzichava utiziro hwake.

Zvokudya zvake achazvipiwa,  
uye haangashayiwi mvura.

<sup>17</sup> Meso ako achaona mambo pakunaka kwake;  
uye achararira nyika yakakura kwazvo.

<sup>18</sup> Mundangariro dzako ucharangarira zvaim-  
bokutyisa ugoti:  
“Aripiko muchinda mukuru uya?  
Aripiko uya aimbora mutero?  
Aripiko muchinda aiva mutariri weshon-  
gwe?”

<sup>19</sup> Vanhu vaya vokuzvikudza hauchazovaonazve,  
ivo vanhu vomutauro wakavanzika,  
vorurimi rwavo, rusinganzwiki.

<sup>20</sup> Tarirai Zioni, iro guta remitambo yedu;  
meso enyu achaona Jerusarema,  
ugaro hworunyararo, tende risingazozun-  
gunuswi;

mbambo dzaro hadzingadzurwi,  
kana mabote aro kudamburwa.

<sup>21</sup> Asi Jehovha achava Wamasimba Ose kwatiri.  
Richafanana nenzvimbo yenzizi  
dzakapamhamha uye nehova.

Magwa anokwasviwa haangasvikiko,

- uye zvikepe zvikuru hazvingapfuuri.  
 22 Nokuti Jehovha ndiye mutongi wedu,  
 Jehovha ndiye anotipa murayiro,  
 Jehovha ndiye mambo wedu;  
 ndiye achatiponesa.
- 23 Mabote ako ava dembutembu:  
 Haagoni kusimbisa mbambo yechikepe,  
 sairi harina kutambanudzwa.  
 Ipapo zvakapambwa zvakawanda zvichagov-  
 erwa,  
 uye kunyange chirema chichawanawo  
 zvakapambwa.
- 24 Hapana agere muZioni ahati, “Ndinorwara,”  
 uye zvivi zvavanogaramo zvicharegererwa.

## 34

### *Kutongwa kweNdudzi*

- 1 Swederai pedyo, imi ndudzi dzavanhu, mun-  
 zwe.  
 Teererai, imi vanhu!  
 Nyika ngainzwe, nezvose zviri mairi,  
 pasi pose, nezvose zvinobudamo!
- 2 Jehovha akatsamwira ndudzi dzose;  
 hasha dzake dziri pamusoro pehondo dzavo  
 dzose.  
 Achavaparadza chose,  
 achaita kuti vaurayiwe.
- 3 Vakaurayiwa vavo vacharasirwa kunze,  
 mitumbi yavo ichanhuhwa;  
 makomo achanyorova neropa ravo.
- 4 Nyeredzi dzokudenga dzose dzichanyungudika,  
 uye denga richapetwa sorugwaro;

marudzi ose enyeredzi achawa  
 samashizha akaoma abva pamuzambiringa,  
 samaonde akasvava abva pamuonde.

5 Munondo wangu wakanwa ukaguta  
 kumatenga;  
 tarirai, unoburukira kuzotonga Edhomu,  
 vanhu vandakaparadza chose.

6 Munondo waJehovha wakanyura muropa,  
 wakafukidzwa namafuta,  
 iro ropa ramakwayana nerembudzi,  
 namafuta anobva paitsvo dzamakondobwe.  
 Nokuti Jehovha ane chibayiro muBozira  
 uye nokuuraya kukuru muEdhomu.

7 Nyati dzichawa pamwe navo  
 nehono dzemhuru nehando huru.  
 Nyika yavo ichanyorova neropa,  
 uye guruva richazara mafuta.

8 Nokuti Jehovha ane zuva rokutsiva  
 negore rokuripira kuti atsigire zvinodiwa  
 neZioni.

9 Hova dzeEdhomu dzichashanduka kuva namo,  
 guruva rayo richapisa sesafuri;  
 nyika yayo ichava namo inopfuta!

10 Haingadzimwi usiku namasikati;  
 utsi hwayo huchakwira nokusingaperi.  
 Richava dongo kubva kune chimwe chizvarwa  
 kusvikira kune chimwe chizvarwa;  
 hapana munhu achazopfuura napozve.

11 Asi zvichava zvezizi romugwenga nehukur-  
 wizi;  
 zizi guru negunguo zvichaita matenderemo.  
 Mwari achatambanudzira Edhomu



rwodzi rwokuyera,  
rwenyonganiso nerwokuparadza.

12 Makurukota ake haazovi nechinhu ikoko  
chingazonzi umambo,  
machinda ake ose achapera.

13 Minzwa ichatandira nhare dzayo,  
utumbambeva norukato munzvimbo dzayo  
dzakakomberedzwa.

Ichava ugaro hwamakava,  
nomusha wamazizi.

14 Zvikara zvomugwenga zvichasangana  
namapere,

uye ngururu dzichadaidzirana;

zvikara zvousiku zvichazororapo,  
uye zvichazviwanira nzvimbo yokuzorora.

15 Zizi richaita dendere rigokandira mazaipo,  
richaachochonyerapo, rigochengeta mazana  
aro pasi pomumvuri wamapapiro aro;

makondo achaunganapo,  
rimwe nerimwe neshamwari yaro.

16 Tarirai murugwaro rwaJehovha mugorava:  
Hapana chimwe chezvinhu izvi chichashayikwa,  
kana chichashaya shamwari.

Nokuti muromo wake ndiwo warayira izvozvo,  
uye Mweya wake uchavaunganidza pamwe  
chete.

17 Anozvigovera migove yazvo;  
ruoko rwake runozvigovera nechiyero.

Zvichava zvazvo nokusingaperi  
uye zvichagaramo kubva kune chimwe chiz-  
varwa kusvikira kune chimwe chizvarwa.

## 35

### *Mufaro waVakadzikinurwa*

<sup>1</sup> Gwenga nenyika yakaoma zvichafara;  
 sango richafara kwazvo uye richatumbuka;  
 seruva, <sup>2</sup> richatumbuka;  
 richafara zvikuru uye richapembera nomu-  
 faro.

Mbiri yeRebhanoni ichapiwa kwariri,  
 kunaka kweKarimeri neSharoni;  
 vachaona kubwinya kwaJehovha,  
 nokunaka kwaMwari wedu.

<sup>3</sup> Simbaisi maoko asina simba,  
 tsigirai mabvi anodendera;

<sup>4</sup> muti kuna avo vane mwoyo inotyia,  
 “Simbai, musatya;

Mwari wenyu achauya,  
 achauya nokutsiva,  
 nokuripira kutsvene  
 achauya kuzokuponesai.”

<sup>5</sup> Ipapo meso amapofu achasvinudzwa  
 uye nzeve dzematsi dzichazarurwa.

<sup>6</sup> Ipapo akaremara achakwakuka senondo,  
 uye rurimi rwechimumu ruchaimba nomu-  
 faro.

Mvura ichatubuka murenje,  
 uye nehova dzemvura mugwenga.

<sup>7</sup> Jecha rinopisa richashanduka rikava dziva,  
 ivhu rine nyota richava zvitubu zvemvura.

Maigara makava noumo maaimbovata,  
 muchamera uswa, netsanga nenhokwe.

<sup>8</sup> Ipapo pachava nomugwagwa;

uchanzi Nzira yoUtsvene.  
 Vane tsvina havangazofambi mairi;  
 ichava yaivavo vanofamba muNzira iyoyo;  
 vakaipa namapenzi havangazofambi mairi.  
<sup>9</sup> Hapangavi neshumba ipapo,  
 kana chikara chipi zvacho  
 chichawanikwapo.  
 Asi vakadzikinurwa voga ndivo vachafambamo,  
<sup>10</sup> uye vakasunungurwa vaJehovha vachadzoka.  
 Vachapinda muZioni vachiimba;  
 mufaro usingaperi uchava pamusoro pavo.  
 Vachawana mufaro nokufarisisa,  
 kusuwa nokuneta zvichatiza.

## 36

### *Senakeribhi anovhundutsira Jerusarema*

<sup>1</sup> Mugore regumi namana rokutonga kwa-Mambo Hezekia, Senakeribhi mambo weAsiria akarwisa maguta ose akakomberedzwa aJudha akaapamba. <sup>2</sup> Ipapo mambo weAsiria akatuma mukuru wehondo yake nehondo huru achibva kuRakishi kuna Mambo Hezekia muJerusarema. Mukuru wehondo akati amira pamugero weDziva roKumusoro, pamugwagwa unoenda kuMunda woMusuki, <sup>3</sup> ipapo Eriakimu mwanakomana waHirikia, mufambisi webasa mumuzinda wamambo, naShebhina munyori, naJoa mwanakomana waAsafi munyori wenhoroondo, akabuda kundosangana naye.

<sup>4</sup> Mukuru wehondo akati kwavari, “Udzai Hezekia kuti:

“Zvanzi namambo mukuru, iye mambo weAsiria: Uri kuvimba nei chaizvo? <sup>5</sup> Iwe unoti une urongwa nesimba rokurwa, asi uri kutaura mashoko asina maturo. Ko, unovimba naaniko, zvawandimukira? <sup>6</sup> Tarira zvino, unovimba neJipiti, ruya rushanga rwomudonzvo rwakavhunika, runobaya ruoko rwomunhu nokumupa vanga kana azendamira parwuri! Ndizvo zvakaita Faro mambo weJipiti kuna vose vanovimba naye. <sup>7</sup> Asi kana ukati kwandiri, “Isu tinovimba naJehovha Mwari wedu,” haasi iye here ane nzvimbo dzakakwirira nearitari dzakabviswa naHezekia, iye akati kuJudha neJerusarema, “Munofanira kumamata pamberi pearitari iyi”?

<sup>8</sup> “Zvino chiuya, ita sungano natenzi wangu, mambo weAsiria: Ndichakupa mabhiza anokwana zviuru zviviri, kana ukagona kuisa vatasvi pamusoro pawo! <sup>9</sup> Ungagona seiko kukunda mubati mumwe wavabati vadiki vatenzi vangu, kunyange uchivimba nengoro dzelipiti navatasvi vadzo vamabhiza? <sup>10</sup> Pamusoro pezvo, ndauya kuzorwa nenyika ino nokuiparadza ndisina Jehovha here? Jehovha pachake andiudza kuti ndiuye munyika ino ndizoiparadza.’”

<sup>11</sup> Ipapo Eriakimu, naShebhina, naJoa vakati kumukuru wehondo, “Tapota hedu, taurai kuvaranda venyu norurimi rwechiAramu, sezvo tichirunzwa. Musataura nesu nechiHebheru vanhu vari parusvingo vachinzwa.”

<sup>12</sup> Asi mukuru wehondo akapindura akati, “Ko, ndakatumwa natenzi wangu kuna tenzi wenyu

nemi chete ndisingatauriwo kuvarume vagere parusvingo, ivo vanofanira kudya tsvina yavo nokunwa mvura yavo kufanana nemi here?"

<sup>13</sup> Ipapo mukuru wehondo akasimuka akadanidzira nechiiHebheru achiti, "Inzwi mashoko amambo mukuru, mambo weAsiria!

<sup>14</sup> Zvanzi namambo: Musarega Hezekia achikunyengerai. Iye haangagoni kukurwirai!

<sup>15</sup> Musarega Hezekia achikunyengetedzai kuti muvimbe naJehovha achiti, 'Jehovha achakurwirai zvirokwazvo; guta rino harizoiswa muruoko rwamambo weAsiria.'

<sup>16</sup> "Musateerera Hezekia. Zvanzi namambo weAsiria: Itai rugare neni mugouya kwandiri. Ipapo mumwe nomumwe wenyu achadya zvinobva pamuzambiringa wake napamuonde wake uye achanwa mvura inobva muchitubu chake, <sup>17</sup> kusvikira ndauya ndizokutorai, ndigokuendesai kunyika yakaita seyenyu, nyika ine zviyo newaini itsva, nyika ine chingwa neminda yemizambiringa.

<sup>18</sup> "Musarega Hezekia achikutsausai achiti, 'Jehovha achatirwira.' Ndimwari weipi nyika zvayo akamborwira nyika yake muruoko rwamambo weAsiria? <sup>19</sup> Vamwari veHamati neAripadhi varipi? Vamwari veSefarivhaimi varipi? Vakarwira Samaria muruoko rwangu here? <sup>20</sup> Ndavapi pakati pavamwari vendudzi dzose vakambogona kuponesa nyika dzavo kubva kwandiri? Ko, Jehovha achagona seiko kurwira Jerusarema muruoko rwangu?"

<sup>21</sup> Asi vanhu vakaramba vanyererere, vakasapindura chinhu, nokuti mambo akanga arayira

achiti, “Musamupindura.”

<sup>22</sup> Ipapo Eriakimu mwanakomana waHirikia mutariri womuzinda wamambo, naShebhina munyori, naJoa mwanakomana waAsafi munyori wenhoroono vakaenda kuna Hezekia, nenguo dzavo dzakabvaruka, vakamuudza zvakanga zvataurwa nomukuru wehondo.

## 37

### *Kusunungurwa kweJerusarema kunoprofitwa*

<sup>1</sup> Mambo Hezekia akati anzwa izvi, akabvarura nguo dzake akafuka masaga akapinda mutemberi yaJehovha. <sup>2</sup> Akatuma Eriakimu mutariri womuzinda wamambo, naShebhina munyori, navakuru vavaprista, vose vakapfeka masaga, kumuprofitwa Isaya mwanakomana waAmozi. <sup>3</sup> Vakati kwaari, “Zvanzi naHezekia: Nhasi izuva renhamo nokutukwa uye kunyadziswa, sezvinoitika kana vana vakasvika pakuzvarwa asi simba rokusununguka pasina. <sup>4</sup> Zvimwe Jehovha Mwari wenyu achanzwa mashoko omukuru wehondo, akatumwa naishe wake, mambo weAsiria, kuzomhura Mwari mupenyu, uye kuti azomutuka pamusoro pamashoko aakanzwa iye Jehovha Mwari wenyu. Naizvozvo nyengeterera vakasara vari vapenyu.”

<sup>5</sup> Vabati vaHezekia vakati vasvika kuna Isaya, <sup>6</sup> Isaya akati kwavari, “Udzai ishe wenyu kuti, ‘Zvanzi naJehovha: Usatya hako zvawakanzwa, mashoko andakamhurwa nawo navaranda vamambo weAsiria. <sup>7</sup> Teererai! Ndichaisa mweya

maari wokuti akangonzwa rimwe guhu, achadzokera kunyika yake, uye ikoko, ndichaita kuti aurayiwe nomunondo.’”

<sup>8</sup> Mukuru wehondo akati anzwa kuti mambo weAsiria akanga abva kuBhakishi, akadzoka akawana mambo achirwa neRibhina.

<sup>9</sup> Zvino Senakeribhi akagamuchira mashoko okuti Tirihaka, muEtiopia mambo weJipiti, akanga achiuya kuzorwa naye. Akati anzwa izvozvo, akatuma nhume kuna mambo Hezekia neshoko iri rokuti: <sup>10</sup> “Udzai Hezekia mambo weJudha muti: Mwari waunovimba naye ngaarege kukunyengera achiti, ‘Jerusarema harizoiswa muruoko rwamambo weAsiria.’ <sup>11</sup> Zvirokwazvo wakanzwa zvakaitwa namadzimambo eAsiria kunyika dzose vachidziparadza chose. Zvino iwe ucharwirwa here? <sup>12</sup> Ko, vamwari vamamwe marudzi akaparadzwa namadzibaba angu vakavarwira here, vamwari veGezani, neHarani neRezezi navanhu vokuEdheni vakanga vari kuTeri Asari? <sup>13</sup> Mambo weHamati aripiko, namambo weArifadhi namambo weguta reSefarivhaimi, kana Hena kana Ivha?”

### *Munyengerero waHezekia*

<sup>14</sup> Hezekia akagamuchira tsamba kubva mu-maoko enhume, akaiverenga. Ipapo akakwidza kutemberi yaJehovha akaitambanudza pamberi paJehovha. <sup>15</sup> Uye Hezekia akanyengerera kuna Jehovha achiti, <sup>16</sup> “Haiwa Jehovha Wamasimba Ose, Mwari waIsraeri, mugere pakati pamakerubhimi, imi moga ndimi Mwari aripo pamusoro poumambo hwose hwenyika. Makasika

denga nepasi. <sup>17</sup> Rerekai nzeve yenyu, Jehovha, munzwe; zarurai meso enyu, Jehovha muone; teererai mashoko ose aSenakeribhi aakatuma kuzozvidza nawo Mwari mupenyu.

<sup>18</sup> “Ichokwadi, Jehovha, kuti madzimambo eAsiria akaparadza chose ndudzi idzi dzose nenyika dzadzo. <sup>19</sup> Vakakanda vamwari vavo mumoto vakavaparadza, nokuti vakanga vasiri vamwari asi matanda chete namatombo akaitwa namaoko avanhu. <sup>20</sup> Zvino, Jehovha Mwari wedu, tidzikinurei kubva muruoko rwake, kuitira kuti madzimambo ose enyika azive kuti imi moga, Jehovha, ndimi Mwari.”

*Kuwa kwaSenakeribhi*

<sup>21</sup> Ipapo Isaya mwanakomana waAmozi akatumira shoko kuna Hezekia achiti, “Zvanzi naJehovha, Mwari waIsraeri: Nokuda kwokuti wanyengetera kwandiri pamusoro paSenakeribhi mambo weAsiria, <sup>22</sup> heri shoko rakataurwa naJehovha pamusoro pake:

“Mhandara Mwanasikana weZioni  
anokuzvidza uye anokuseka.

Mwanasikana weJerusarema  
anokudzungudzira musoro wake paunenge  
uchitiza.

<sup>23</sup> Ndianiko wawatuka uye ukamhura?

Ndianiko wawasimudzira inzwi rako,  
uye ukasimudzira meso ako uchizvikudza?

Ndiye Mutsvene waIsraeri!

<sup>24</sup> Navaranda vako watutira  
kutuka pamusoro paIshe.

Uye wakati,

‘Nengoro dzangu zhinji



ndakakwira makomo marefu,  
 kumusoro-soro kweRebhanoni.  
 Ndakatema misidhari yayo mirefu refu,  
 nemisipuresi yayo yakanakisisa.  
 Ndakasvika kumusoro-soro kwayo,  
 nokumasango ayo akanakisisa.  
 25 Ndakachera matsime munyika yavamwe,  
 ndikanwa mvura imomo.  
 Netsoka dzangu  
 ndakapwisa hova dzose dzeIjipiti.'

26 "Hauna kunzwa here?  
 Izvi ndakazviita kare.  
 Ndakazvironga pamazuva akare;  
 zvino ndaita kuti zviitike,  
 nokuti wakaparadza maguta akakomberedzwa  
 akava mirwi yamatombo.

27 Vanhu vawo, vapererwa nesimba,  
 vavhundutswa uye vanyadziswa.  
 Vafanana nembeu mumunda,  
 namabukira manyoro,  
 sebundo ramera padenga remba,  
 ratsva risati rakura.

28 "Asi ndinoziva paunogara  
 uye nguva yaunouya neyaunoenda  
 uye kuti unondiitira hasha zvakadii.

29 Nokuda kwehasha dzako kwandiri  
 uye nokuda kwokuti kusateerera kwako  
 kwasvika munzeve dzangu,  
 ndichaisa chiredzo changu mumhuno dzako  
 namatomu angu mumuromo mako,  
 uye ndichaita kuti udzokere  
 nenzira yawakauya nayo.

30 “Ichi ndicho chichava chiratidzo kuvarwi,  
iwe Hezekia:

“Gore rino muchadya zvinomera zvoga,  
uye mugore rinotevera muchadya mabukira  
azvo.

Asi mugore rechitatu mudyare mugokohwa,  
mudyare minda yemizambiringa mugodya  
michero yayo.

31 Zvakare, vakasara veimba yaJudha vachava  
nemidzi pasi  
uye vachabereka michero kumusoro.

32 Nokuti muJerusarema muchabuda vachasara,  
uye muZioni muchabuda boka ravachapun-  
yuka.

Kushingaira kwaJehovha  
kuchazviita.

33 “Naizvozvo zvanzi naJehovha pamusoro pa-  
mambo weAsiria,

“Haazopindi muguta iri  
kana kupfura museve pano.

Haazosviki mberi kwaro nenhoo  
kana kuvaka gomo revhu pariri.

34 Achadzokera nenzira yaakauya nayo;  
haazopindi muguta rino,”  
ndizvo zvinotaura Jehovha.

35 “Ndichadzivirira guta rino uye  
ndichariponesa,  
nokuda kwangu uye nokuda kwaDhavhidhi  
muranda wangu!”

36 Ipapo mutumwa waJehovha akabuda  
akauraya varume zviuru zana namakumi  
masere nezvishanu pamusasa wavaAsiria.  
Vanhu vakati vachimuka mangwanani, onei  
mitumbi yavakafa! 37 Naizvozvo Senakeribhi

mambo weAsiria akaputsa musasa. Akadzokera kuNinevhe akandogara ikoko.

<sup>38</sup> Mumwe musi achinamata ari mutemberi yamwari wake Nisiroki, Adhiramereki naSharezeri, vanakomana vake vakamuuraya nomunondo, ndokutizira kunyika yeArarati. Mwanakomana waEsarihadhoni akamutevera paushe.

## 38

### *Kurwara kwaHezekia*

<sup>1</sup> Mumazuva iwayo Hezekia akarwara kusvikira oda kufa. Muprofiti Isaya mwanakomana waAmozi akaenda kwaari akati, “Zvanzi naJehovha: Gadzirisa zveimba yako, nokuti uri kuzofa; hausi kuzopona.”

<sup>2</sup> Hezekia akatendeukira kumadziro akanyengetera kuna Jehovha achiti, <sup>3</sup> “Rangarirai henyu, Jehovha, kuti ndakafamba sei nokutendeka pamberi penyu nomwoyo wose nechokwadi uye ndikaita zvakanaka pamberi penyu.” Hezekia akachema kwazvo.

<sup>4</sup> Ipapo shoko raJehovha rakauya kuna Isaya richiti, <sup>5</sup> “Enda undoti kuna Hezekia, ‘Zvanzi naJehovha, Mwari wababa vako Dhavhidhi: Ndanzwa munyengetero wako uye ndaona misodzi yako; ndichawedzera makore gumi namashanu paupenyu hwako. <sup>6</sup> Uye ndichakurwira iwe neguta rino kubva muruoko rwa mambo weAsiria. Ndicharwira guta rino.

<sup>7</sup> “‘Ichi ndicho chiratidzo chaJehovha kwauri kuti Jehovha achaita zvose zvaakavimbisa: <sup>8</sup> Ndichaita kuti mumvuri waitwa pazuva

udzokere shure nhambwe gumi pamutaro wawanga wafamba pamanera aAhazi.’” Saizvozvo zuva rakadzokera shure nhambwe gumi dzarakanga radzika.

<sup>9</sup> Chinyorwa chaHezekia mambo weJudha mushure mokurwara nokupora kwake:

<sup>10</sup> Ndakati, “Mazuva oupenyu hwangu achangotanga ndingafanira kupinda muma-suo orufu here?

Ndigotorerwa makore angu asara here?”

<sup>11</sup> Ndakati, “Handichazonizve Jehovha, iye Jehovha, munyika yavapenyu; handichazotarizive kuvanhu kana kuva naavo vagere munyika ino zvino.

<sup>12</sup> Setende romufudzi, imba yangu yakoromorwa uye yatorwa.

Somuruki ndapeta upenyu hwangu, uye iye andigura kubva pachirukiso; masikati namadekwana makaita kuti ndigume.

<sup>13</sup> Ndakamirira nomwoyo murefu kusvikira mambakwedza, asi iye akavhuna mapfupa angu ose kufanana nezvinoitwa neshumba; masikati namadekwana makaita kuti ndigume.

<sup>14</sup> Ndakarira senyenganyenga kana kondo. Ndakachema sokuchema kunoita njiva.

Meso angu akaneta nokutarisa kudenga. Haiwa Jehovha, ndine nhamo, uyai mundin-unure!”

<sup>15</sup> Asi ndingati kudiniko?

Iye ataura neni, uye iye ndiye aita izvi.

Ndichafamba nokuzvininipisa pamakore angu  
 ose,  
 nokuda kwokurwadziwa kwomwoyo  
 wangu.

16 Ishe, vanhu vanorarama nezvinhu zvakadai;  
 uye mweya wangu unowana upenyu  
 mazviriwo.

Makandiporesa  
 mukandiraramisa.

17 Zvirokwazvo kutambudzika kwangu kukuru  
 kwakandivigira rugare.

Murudo rwenyu makandirwira  
 pagomba rokuparadzwa;  
 makaisa zvivi zvangu zvose  
 shure kwenyu,

18 Nokuti guva haringagoni kukurumbidzai,  
 rufu harugoni kukurumbidzai nenziyo;  
 vanodzika kugomba  
 havangagoni kutarisira kutendeka kwenyu.

19 Vapenyu, ivo vapenyu,  
 ndivo vanokurumbidzai,  
 sezvandiri kuita iye nhasi;  
 madzibaba anoudza vana vavo nezvokuten-  
 deka kwenyu.

20 Jehovha achandiponesa,  
 uye tichaimba nemitengeranwa,  
 mazuva ose oupenyu hwedu  
 mutemberi yaJehovha.

21 Zvino Isaya akanga ati, “Gadzirai bundu  
 ramaonde mugoriisa pamota, uye achapora.”

22 Hezekia akanga abvunza achiti, “Chiratidzo  
 chichava chei chokuti ndiende kutemberi yaJe-  
 hovha?”

## 39

### *Nhume dzakabva kuBhabhironi*

<sup>1</sup> Panguva iyoyo Merodhaki-Bharadhani mwanakomana waBharadhani mambo weBhabhironi, akatumira matsamba nechipo kuna Hezekia, nokuti akanga anzwa nezvokurwara nokupora kwake. <sup>2</sup> Hezekia akagamuchira nhume nomufaro akavaratidza zvakanga zviru mumatura ake: sirivha, goridhe, zvinonhuhwira namafuta anokosha nenhumbi dzake dzose dzokurwa uye nezvose zvaiwanikwa papfuma yake. Hapana chinhu mumuzinda wake kana muumambo hwake chavasina kuratidzwa naHezekia.

<sup>3</sup> Ipapo muprofiti Isaya akaenda kuna Mambo Hezekia akabvunza achiti, “Varume avo vakati kudini, uye vakabvepi?”

Hezekia akapindura achiti, “Vakabva kunyika iri kure. Vakauya kwandiri vachibva kuBhabhironi.”

<sup>4</sup> Muprofiti akamubvunza achiti, “Vakaoneiko mumuzinda menyu?”

Hezekia akati, “Vakaona zvose zviru mumuzinda mangu. Pakati pepfuma yangu hapana chandisina kuvaratidza.”

<sup>5</sup> Ipapo Isaya akati kuna Hezekia,

“Inzwa shoko raJehovha Wamasimba Ose:

<sup>6</sup> Zvirokwazvo nguva ichauya iyo zvose zviru mumba mako, nezvose zvakaunganidzwa namadzibaba ako kusvikira nhasi, zvichatakurwa zvichiendeswa kuBhabhironi. Hapana chichasara, ndizvo zvinotaura Jehovha.

<sup>7</sup> Uye vamwe vavana vako, venyama neropa rako

chairo vauchabereka, vachatorwa uye vachava varanda mumuzinda wamambo weBhabhironi.”

<sup>8</sup> Hezekia akapindura achiti, “Shoko raJehovha rawataura rakanaka.” Nokuti akafunga kuti, “Pachava norugare nokudzivirirwa pamazuva oupenyu hwangu.”

## 40

### *Kunyaradzwa kwaVanhu vaMwari*

- <sup>1</sup> Nyaradzai, nyaradzai vanhu vangu,  
ndizvo zvinotaura Mwari wenyu.
- <sup>2</sup> Taurai nounyoro kuJerusarema,  
mudanidzire kwariri  
kuti kubata kwaro kukuru kwapera,  
uye kuti chivi charo charipirwa,  
kuti ragamuchira kubva muruoko rwaJehovha  
zvkapetwa kaviri pamusoro pezvivi zvaro.
- <sup>3</sup> Inzwi rounodanidzira achiti,  
“Gadzirai nzira yaJehovha  
mugwenga,  
ruramisai mugwagwa  
waMwari wedu murenje.
- <sup>4</sup> Mipata yose ichasimudzirwa,  
makomo ose nezvikomo zvichaenzaniswa;  
nzvimbo dzisakaenzana dzichava bani.
- <sup>5</sup> Uye kubwinya kwaJehovha kucharatidzwa,  
uye marudzi ose avanhu achazviona.  
Nokuti muromo waJehovha wazvi-  
taura.”
- <sup>6</sup> Inzwi rinoti, “Danidzirai.”  
Ini ndokuti, “Ndodanidzireiko?”

“Vanhu vose vakaita souswa,

uye kubwinya kwavo kwose kwakaita samaruva omunda.

<sup>7</sup> Uswa hunooma uye maruva anowa, nokuti mweya waJehovha unofuridzira pamusoro pazvo.

Zvirokwazvo vanhu uswa.

<sup>8</sup> Uswa hunooma uye maruva anowa, asi shoko raMwari wedu rinogara nokusingaperi.”

<sup>9</sup> Imi munoparidzira Zioni zvinhu zvakanaka, kwirai pagomo refu.

Imi munoparidzira Jerusarema mashoko akanaka, danidzirai nesimba, musatya; muti kumaguta eJudha, “Hoyu Mwari wenyu!”

<sup>10</sup> Tarirai, Ishe Jehovha ari kuuya nesimba, uye ruoko rwake runomubatira ushe.

Tarirai, mubaiyero wake anawo, uye zvaanoripira nazvo anazvo.

<sup>11</sup> Anofudza makwai ake somufudzi: Anounganidza makwayana mumaoko ake agoatakurira pedyo nomwoyo wake; zvinyoronyoro anotungamirira nhunzvi dzinonwisa.

<sup>12</sup> Ndianiko akayera mvura zhinji muchanza chake, kana kuyera denga nou pamhi hwechanza chake?

Ndianiko akaisa guruva rose rapasi mudengu, kana kuyera kurema kwamakomo nechiyero,



nezvikomo pachiyero?

- 13 Ndiani akanzwisisa murangariro waJehovha, kana kumudzidzisa somudzidzisi wake?
- 14 Ndiani akabvunzwa naJehovha kuti amujeke-sere, uye ndiani akamudzidzisa nzira yakanaka? Ndianiko akamudzidzisa ruzivo kana kumuratidza nzira yokunzwisisa?
- 15 Zvirokwazvo ndudzi dzavanhu dzakaita se-donhwe remvura riri muchirongo; vanongova seguruva riri pamusoro pechiyero; anoyera zwiwi kunge guruva rakatsetseka.
- 16 Rebhanoni harina huni dzinoringana kuvesa moto wearitari, uye zvipfuwo zvaro hazvikwani kuita chipiriso chinopiswa.
- 17 Ndudzi dzose dzakaita sepasina chinhu pam-beri pake; iye anodziona sedzisina maturo, kunge dzisipo.
- 18 Zvino, mungafananidza Mwari naaniko? Ndoupi mufananidzo wamungamuenzanisa nawo?
- 19 Kana chiri chifananidzo, muumbi anochi-umba, mupfuri wegoridhe ochinamira negoridhe, uye anochiitira uketani hwesirivha.
- 20 Murombo anoshayiwa chipo anosarudza danda risingaori. Anotsvaka mhizha kuti

imuvezere chifananidzo chisingazozun-  
gunuki.

21 Hamuzivi here?

Hamuna kunzwa here?

Hamuna kumbozviudzwa kubva pakutanga  
here?

Hamuna kunzwisisa kubva pakuvamba  
kwenyika here?

22 Anogara samambo pamusoro pedenderedzwa  
renyika,

uye vanhu vayo vakaita semhashu.

Anotambanudza matenga setende,

agoawaridzira setende kuti agaremo.

23 Anoita kuti machinda ave pasina,

uye anoderedza vatongi venyika ino kuti  
vave pasina.

24 Vachangosimwa, vachangodyarwa,

vachangodzika midzi movhu,

iye anofuridza pamusoro pavo vachibva  
vaoma, uye chamupupuri chinovakukura  
sehundi.

25 “Mungandienzanisa naaniko?

Kana kuti ndiani akaenzana neni?” ndizvo  
zvinotaura Iye Mutsvene.

26 Simudzai meso enyu mutarire kumatenga.

Ndianiko akasika zvose izvi?

Iye anobudisa nyeredzi imwe imwe,

achidzidana imwe neimwe nezita rayo.

Nokuda kwesimba rake guru uye noukuru hwes-  
imba rake,

hapana kana imwe zvayo inoshayikwa.

- 27 Unoreveiko, iwe Jakobho,  
unogunun'una chii, iwe Israeri uchiti,  
“Nzira yangu haizivikanwi naJehovha;  
Mwari wangu haana hanya nezvandinor-  
wira?”
- 28 Hauzivi here?  
Hauna kunzwa here?  
Jehovha ndiye Mwari nokusingaperi,  
Musiki wamagumo enyika.  
Haaneti kana kuziya,  
uye hakuna angayera kunzwisisa kwake.
- 29 Anopa simba kuna vakarukutika,  
uye anowedzera simba kuna vasina simba.
- 30 Kunyange majaya anoneta uye anorukutika,  
uye majaya anogumburwa agowa;
- 31 asi avo vane tariro muna Jehovha  
vachavandudza simba ravo.  
Vachabhururuka namapapiro samakondo;  
vachamhanya vasinganeti;  
vachafamba vasingaziyi.

## 41

### *Mubatsiri waIsraeri*

- 1 “Nyararai pamberi pangu, imi zviwi!  
Ndudzi ngadzivandudze simba radzo!  
Ngadziswedere mberi dzitaure;  
ngatisanganei pamwe chete panzvimbo ino-  
tongerwa mhaka.
- 2 “Ndianiko akamutsa mumwe kubva kumab-  
vazuva,  
akamadana nokururama kuushumiri  
hwake?  
Anopa ndudzi kwaari,

uye anoisa madzimambo pasi pake.  
 Anovashandura vagova guruva nomunondo  
 wake,  
 vagova hundi inopepereswa nemhepo nouta  
 hwake.

<sup>3</sup> Anovadzinganisa agopfuurira mberi asina  
 vanga,  
 nenzira yaasina kumbotsika netsoka dzake  
 kare.

<sup>4</sup> Ndiani akabata basa iri akaripedza,  
 akadana zvizvarwa kubva pakutanga?  
 Ini, Jehovha, iye wokutanga wavo  
 newokupedzisira, ndini iye.”

<sup>5</sup> Zviwi zvakazviona zvikatya;  
 magumo enyika anodedera.

Vanoswedera uye vagouya mberi;

<sup>6</sup> mumwe nomumwe anobatsira wokwake,  
 achiti kuhama yake, “Simba!”

<sup>7</sup> Mhizha inokurudzira mupfuri wegoridhe,  
 uye iye anotsetsenura nenyundo  
 anokurudzira uyo anorova panhera.

Anoti kune chakanamwa nomoto, “Ichi  
 chakanaka.”

Anoroverera chifananidzo pasi nechipikiri  
 kuti chisazungunuka.

<sup>8</sup> “Asi iwe, Israeri, muranda wangu,  
 Jakobho, wandakasarudza,  
 imi vana vaAbhurahama, shamwari yangu,

<sup>9</sup> ndakakutora kubva kumagumo enyika,  
 ndikakudana kubva kumakona ayo ari kure.  
 Ndakati kwauri, ‘Uri muranda wangu,’  
 ndakakusarudza uye handina kukuramba.

- 10 Naizvozvo usatya, nokuti ndinewe;  
 usavhunduka, nokuti ndini Mwari wako.  
 Ndichakusimbisa uye ndichakubatsira;  
 ndichakutsigira noruoko rwangu rworudyi  
 rwokururama.
- 11 “Vose vanokutsamwira  
 zvirokwazvo vachanyadziswa uye vachan-  
 yara;  
 vose vanokakavadzana newe  
 vachava sechinhu chisipo uye vachaparara.
- 12 Kunyange ukatsvaka vavengi vako,  
 hauzovawani.  
 Avo vanorwa newe  
 vachava sechinhu chisipo chose.
- 13 Nokuti ndini Jehovha, Mwari wako,  
 anobata ruoko rwako rworudyi  
 achiti kwauri, Usatya;  
 ndichakubatsira.
- 14 Usatya Jakobho iwe honye,  
 iwe mudiki Israeri,  
 nokuti ini iyeni ndichakubatsira,” ndizvo zvino-  
 taura Jehovha,  
 Mudzikinuri wako, Mutsvene waIsraeri.
- 15 “Tarira, ndichakuita mupuro, mutsva un-  
 opinza,  
 una meno mazhinji.  
 Uchapura makomo ugoapwanya,  
 uye uchaderedza zvikomo zvikava hundi.
- 16 Uchaapepeta, achatorwa nemhepo,  
 uye chamupupuri chichaaparadzira.  
 Asi iwe uchafara muna Jehovha,  
 uye uchazvirumbidza muMutsvene waIs-  
 raeri.

- 17 “Varombo navanoshaya vanotsvaka mvura  
asi hakuna;  
ndimi dzavo dzaoma nenyota.  
Asi ini Jehovha ndichavapindura;  
ini, Mwari waIsraeri, handizovasiya.
- 18 Ndichaita kuti nzizi dziyerere pamitunhu isina  
miti,  
namatsime pakati pemipata.  
Ndichashandura gwenga rikava madziva  
emvura,  
nenyika yakaoma ikava matsime.
- 19 Ndichaisa mugwenga musidhari nomuakasiya,  
mumite nomuorivhi.  
Ndichaisa mipaini musango,  
misipuresi nemifiri pamwe chete,
- 20 kuitira kuti vanhu vaone uye vagoziva,  
varangarire vagonzwisisa,  
kuti ruoko rwaJehovha rwakaita izvozvi,  
kuti Mutsvene waIsraeri ndiye akazvisika.
- 21 “Sumai mhaka yenyu,” ndizvo zvinotaura  
Jehovha.  
“Uyai namashoko enyu akasimba,” ndizvo  
zvinotaura Mambo waJakobho.
- 22 “Uyai nezvifananidzo zvenyu zvitiudze  
zvichaitika.  
Tiudzei zvinhu zvakare kuti zvaiva zvipi,  
kuti zvimwe tizviongorore  
tigoziva magumo azvo.  
Kana kuti tizivisei, zvinhu zvichaitika,  
23 tiudzei kuti ramangwana rinei,  
kuti tizive kana imi muri vanamwari.  
Itai chimwe chinhu, chingava chakanaka kana  
chakaipa,

kuitira kuti tigoshamiswa tigozadzwa  
nokutya.

24 Asi imi hamusi chinhu,  
uye mabasa enyu haana maturo chose;  
anokusarudzai anonyangadza.

25 “Ndamutsa mumwe anobva kumusoro, zvino  
ari kuuya,  
mumwe anobva kumabvazuva anodana  
kuzita rangu.

Iye anotsika pamusoro pavabati kunge anotsika  
dope,  
kuita sokunge muumbi wehari anokanya  
ivhu.

26 Ndianiko akazvireva kubva pakutanga, kuti  
zvimwe,  
tingaziva, kana kuti zvichigere kuitika, kuti  
zvimwe tigoti, ‘Akanga anatsa?’

Hapana akataura izvozvi,  
hapana akataura kuti zvichauya,  
hapana akanzwa kana shoko kubva kwa-  
muri.

27 Ndini akava wokutanga kuudza Zioni kuti,  
‘Tarira, ava vari pano!’  
Ndakapa kuJerusarema nhume yamashoko  
akanaka.

28 Ndinotarisa asi hapana munhu,  
hapana pakati pavo anopa zano,  
hapana anondipindura pandinovabvunza.

29 Tarirai, vose inhema dzoga!  
Mabasa avo haana maturo;  
zvifananidzo zvavo imhepo nenyonganiso.

## 42

### *Muranda waJehovha*

- <sup>1</sup> “Tarirai muranda wangu, wandinotsigira,  
 musanangurwa wangu wandinofarira;  
 Ndichaisa Mweya wangu pamusoro pake,  
 uye achavigira ndudzi kururamisirwa.
- <sup>2</sup> Haazodanidziri kana kuridza mhere,  
 kana kusimudza inzwi munzira dzomuguta.
- <sup>3</sup> Rutsanga rwakapwanyika haangaruvhuni,  
 uye nomwenje unopfungaira haazoudzimi.  
 Mukutendeka, achavigira vanhu kururamisira;  
<sup>4</sup> haangakoniwi uye haangaperi simba  
 kusvikira asimbisa kururamisirwa panyika.  
 Zwiwi zvichaisa tariro yazvo mumurayiro  
 wake.”
- <sup>5</sup> Zvanzi naMwari Jehovha,  
 iye akasika matenga akaatatamura,  
 akatambanudza nyika nezvose zvinobuda  
 mairi,  
 anopa kufema kuvanhu vayo,  
 noupenyu kuna avo vanofamba pamusoro  
 payo:
- <sup>6</sup> “Ini, Jehovha, ndakakudana mukururama;  
 ndichabata ruoko rwako.  
 Ndichakuchengeta ndigokuita  
 kuti uve sungano yavanhu  
 nechiedza kune veDzimwe Ndudzi,
- <sup>7</sup> kuti usvinudze meso asingaoni,  
 usunungure vakasungwa mutorongo  
 uye usunungure vari mugomba, avo vagere  
 murima.



8 “Ndini Jehovha; ndiro zita rangu!  
 Handizopi kukudzwa kwangu kuno  
 mumwe,  
 kana kurumbidzwa kwangu kuzvi-  
 fananidzo.

9 Tarira, zvinhu zvakare zvaitika,  
 uye ndiri kutaura zvinhu zvitsva;  
 izvo zvisati zvavapo  
 ndinozvizivisa kwamuri.”

*Rwiyo rwoKurumbidza Jehovha*

10 Imbirai Jehovha rwiyo rutsva,  
 murumbidzei kubva kumagumo enyika,  
 imi munoburukira kugungwa, nezvose zviri  
 mariri,  
 imi zviwi, navose vanogaramo.

11 Gwenga namaguta aro ngazvidanidzire;  
 nzvimbo dzinogara Kedhari ngadzifare.  
 Vanhu veSera ngavaimbe nomufaro;  
 ngavapururudze pamusoro pemakomo.

12 Ngavape rukudzo kuna Jehovha  
 uye vaparidze rumbidzo yake kuzviwi.

13 Jehovha achabuda somunhu ane simba,  
 semhare, achamutsa kushingaira kwake;  
 nokudanidzira, achamutsa kurwa  
 uye achakunda vavengi vake.

14 “Nokuti ndanga ndakanyarara kwenguva refu,  
 ndanga ndinyerere uye ndichizvidzora.  
 Asi zvino kufanana nomukadzi ari kusunun-  
 guka,  
 ndiri kudandizira, ndiri kufemedzeka noku-  
 takwaira.

15 Ndichaparadza makomo nezvikomo,

uye ndichaomesa zvose zvawo zvinomera;  
ndichashandura nzizi dzikava zwiwi,  
uye madziva ndichaaomesa.

16 Ndichatungamirira mapofu nenzira  
dzavasingazivi,  
nomumakwara avasina kuziva,  
ndichavatungamirira; ndichashandura rima  
rikava chiedza pamberi pavo  
uye ndichaita kuti nzvimbo dzakaipa dziti  
chechetere.

Izvi ndizvo zvinhu zvandichaita;  
handizovasiya.

17 Asi ivo vanovimba nezvifananidzo,  
vanoti kune zvakaumbwa, 'Ndimi vamwari  
vedu,'  
vachadzoserwa shure mukunyadziswa  
kukuru.

*Israeri iBofu neMatsi*

18 "Inzwai, imi matsi;  
tarirai, imi mapofu, muone!

19 Ndianiko bofu, asi muranda wangu,  
uye matsi kufanana nenhume yandino-  
tuma?

Ndianiko bofu rakafanana naiye akazvipira  
kwandiri,  
kana bofu rakafanana nomuranda waJe-  
hovha?

20 Wakaona zvinhu zvizhinji, asi hauna kuva  
nehanya;  
nzeve dzako dzakazaruka, asi hauna  
chaunonzwa."

21 Zvakafadza Jehovha  
nokuda kwokururama kwake,  
kuti akudze murayiro wake uye aubwinyise.

22 Asi ava ndivo vanhu vakapambwa uye vak-  
 abirwa,  
 vose vakasungwa mumakomba  
 kana kuti vakavanzwa mumatorongo.  
 Vakava vabatwa,  
 pasina anovarwira;  
 vakaitwa chinhu chakapambwa,  
 pasina anoti, “Vadzoserei kwavakabva.”

23 Ndiani pakati penyu achateerera izvi,  
 kana kurerekera nzeve dzake zvikuru pan-  
 guva inouya?

24 Ndiani akarega Jakobho achipambwa,  
 akaendesa Israeri kuvapambi?

Akanga asiri Jehovha here,  
 iye watakatadzira?

Nokuti havana kuda kutevera nzira dzake;  
 havana kuteerera murayiro wake.

25 Naizvozvo akadururira hasha dzake dzinopisa  
 pamusoro pavo,  
 iro bongozozo rehondo.

Rakavaputira movira romoto, asi havana kun-  
 zwisisa;

rakavapisa, asi mwoyo yavo yakashaya  
 hanya nazvo.

## 43

### *Muponesi waIsraeri Mumwe Oga*

<sup>1</sup> Asi zvino, zvanzi naJehovha,  
 iye akasika iwe Jakobho,  
 iye akakuumba iwe Israeri:

“Usatya, nokuti ndakakudzikinura;  
 ndakakudana nezita rako; uri wangu.

- 2 Paunopfuura nomumvura zhinji  
 ini ndichava newe;  
 uye paunopinda nomunzizi, hadzizokukukuri.  
 Paunofamba nomumoto, haungazotsvi;  
 murazvo haungazokupisi.
- 3 Nokuti ndini Jehovha, Mwari wako,  
 Mutsvene waIsraeri, Muponesi wako;  
 ndinopa Ijipiti kuti ive rusununguko rwako,  
 Etiopia neShebha pachinzvimbo chako.
- 4 Sezvo uchikosha uye uchikudzwa pamberi  
 pangu,  
 uye nokuti ndinokuda,  
 ndichaisa vanhu panzvimbo yako,  
 namarudzi avanhu pachinzvimbo  
 choupenyu hwako.
- 5 Usatya, nokuti ndinewe;  
 ndichauyisa vana vako kubva kumab-  
 vazuva,  
 ndichakuunganidzai kubva kumavirira.
- 6 Ndichati kurutivi rwokumusoro, 'Varegedze!  
 uye kurutivi rwezasi, 'Usavadzivisa.'  
 Uyisai vanakomana vangu kubva kure,  
 uye navanasikana vangu vabva kumigumo  
 yenyika,
- 7 vose vanodanwa nezita rangu,  
 vandakasikira kukudzwa kwangu  
 vandakaumba uye ndikaita."
- 8 Uyai neavo vane meso asi vari mapofu,  
 vane nzeve asi vari matsi.
- 9 Ndudzi dzose ngadziungane pamwe chete,  
 uye marudzi ngaaungane.  
 Ndianiko pakati pavo akati izvi zvichaitika,  
 akatiparidzira zvinhu zvakare?

Ngavauye nezvapupu zvavo kuti zvionekwe kuti  
 havana mhosva,  
 kuitira kuti vamwe vanzwe vagoti, “Ichok-  
 wadi.”

10 “Imi muri zvapupu zvangu,” ndizvo zvinota-  
 taura Jehovha,  
 “uye nomuranda wangu wandakasarudza,  
 kuti mugoziva uye mugonditenda  
 uye mugonzwisisa kuti ndini iye.

Hakuna kumbova nomumwe mwari akaumbwa  
 ndisati ndavapo,  
 uye hakuchazova nomumwe shure kwangu.

11 Ini, iyeni, ndini Jehovha,  
 uye kunze kwangu hakuna muponesi.

12 Ini ndakararatidza ndikaponesa, ndikaparidza,  
 ini, kwete vamwe vamwari vedzimwe  
 ndudzi vari pakati penyu.

Imi muri zvapupu zvangu,” ndizvo zvinotaura  
 Jehovha, kuti, “ndini Mwari.

13 Hongu, kubva pamazuva akare ndini iye.  
 Hakuna angarwira munhu muruoko rwangu.  
 Pandinoita chinhu, ndianiko an-  
 gachikonesa?”

*Ngoni dzaMwari noKusatendeka kwaIsraeri*

14 Zvanzi naJhovha,  
 Mudzikunuri wenyu, Mutsvene waIsraeri:  
 “Ndichatuma vanhu kuBhabhironi nokuda  
 kwenyu,  
 uye ndichaburitsa vaBhabhironi vose vachi-  
 tiza,  
 muzvikepe zvavaidada nazvo.

15 Ndini Jehovha, Mutsvene Wenyu,  
 Musiki waIsraeri, Mambo wenyu.”

- 16 Zvanzi naJehovha,  
 iye akaita nzira pakati pegungwa,  
 nenzira mukati memvura zhinji,
- 17 iye akabudisa ngoro namabhiza,  
 hondo pamwe chete nezvinosimbisa,  
 vakavata ipapo, havana kuzombomukazve,  
 vadzimwa, vadzimwa somwenje:
- 18 “Chikanganwai zvinhu zvakare;  
 musaramba muri pane zvakapfuura.
- 19 Tarirai, ndava kuita chinhu chitsva!  
 Zvino chava kumera; hamuchioni here?  
 Ndiri kuita nzira mugwenga  
 nehova musango.
- 20 Zvikara zvesango zvinondikudza,  
 makava namazizi,  
 nokuti ndinozvipa mvura mugwenga  
 nehova musango,  
 kuti ndipe vanhu vangu chokunwa, vasanan-  
 gurwa vangu,
- 21 vanhu vandakazviumbira,  
 kuti vaparidze kurumbidzwa kwangu.
- 22 “Kunyange zvakadaro hauna kudana  
 kwandiri, iwe Jakobho;  
 hauna kuzvinetesa nokuda kwangu, iwe  
 Israeri.
- 23 Hauna kundivigira makwai ezvipiriso  
 zvinopiswa,  
 kana kundikudza nezvibayiro zvako.  
 Handina kukuremedza nezvipiriso zvezviyo,  
 kana kukunetesa nokuda zvinonhuhwira.
- 24 Hauna kundivigira kana zvinotapira,

kana kundigutsa namafuta ezvibayiro  
zvako.  
Asi wakandiremedza nezvivi zvako  
uye ukandinetesa nokudarika kwako.

- 25 “Ini, iyeni, ndini ndinodzima kudarika kwako,  
nokuda kwangu,  
handizorangaririzve zvakaipa zvako.  
26 Ndiyeuchidze zvakapfuura,  
ngatitaurirane nyaya iyi pamwe chete;  
zvipupurire kuti hauna mhosva.  
27 Tateguru wako akatadza;  
vamiririri vako vakandimukira.  
28 Naizvozvo ndichanyadzisa vanokudzwa vo-  
mutemberi yako,  
uye ndichaita kuti Jakobho aparadzwe  
uye Israeri asekwe.

## 44

### *Israeri Musanangurwa*

- 1 “Asi zvino chinzwa, iwe Jakobho, muranda  
wangu,  
Israeri, wandakasarudza.  
2 Zvanzi naJehovha, iye akakuita,  
akauumba mudumbu  
uye iye achakubatsira:  
Usatya, iwe Jakobho, muranda wangu,  
Jeshuruni, wandakasarudza.  
3 Nokuti ndichadurura mvura panyika ine nyota,  
nehova pamusoro pevhu rakaoma;  
ndichadurura Mweya wangu pamusoro porudzi  
rwako,

nemikomborero yangu pamusoro pavana vako.

<sup>4</sup> Vachamera souswa mudekete, semiti yemikonachando pahova dzinoyera.

<sup>5</sup> Mumwe ahati, 'Ndiri waJehovha'; mumwe achazvitumidza nezita raJakobho; zvakadaro, mumwe achanyora muruoko rwake achiti, 'Ndiri waJehovha,' uye achatora zita rokuti Israeri.

*Jehovha, Kwete Zvifananidzo*

<sup>6</sup> "Zvanzi naJehovha, Mambo waIsraeri noMudzikinuri, Jehovha Wamasimba Ose: Ndini wokutanga uye ndini wokupedzisira; kunze kwangu hakuna Mwari.

<sup>7</sup> Ndianiko zvino akafanana neni? Ngaazvitaure. Ngaadanidzire, azviise mberi kwangu izvo zvakaitika kubva pandakasimbisa vanhu vangu vekare, uye kuti chiiko chichaitika hongu, ngaataure zvichaitika.

<sup>8</sup> Musadedera, musatya. Handina kuparidza izvi here uye ndikazvitaure kare kare?

Imi muri zvapupu zvangu. Kune mumwe Mwari kunze kwangu here? Kwete, hakuna rimwe Dombo; hakuna rimwe randinoziva."

<sup>9</sup> Vose vanoita zvifananidzo havana maturo, uye zvinhu zvavanofarira hazvibatsiri. Vose vangada kuvapupurira mapofu;



havazivi, ndiko kuchava kunyadziswa kwavo.

10 Ndiani anoveza mwari uye anoumba chifananidzo, chisingamubatsiri chinhu?

11 Iye navamwe vake vachanyadziswa; mhizha hadzizi chinhu asi vanhu zvavo. Ngavaungane vose pamwe chete uye vamire vasingazungunuswi; vachaderedzwa, uye vachatya vachanyadziswa.

12 Mupfuri anotora chokupfurisa agochishandisa mumazimbe; anoita chifananidzo nenyundo, agochiumba nesimba roruoko rwake. Anonzwa nzara agorasikirwa nesimba rake. Mukusanwa kwake mvura anobva aziya.

13 Muvezi anoyera nerwodzi ozoita mutsetse nechokunyoresa; anonunatsa nembezo, uye anoutara nezvienzaniso.

Anoumba mumufananidzo womunhu, womunhu nokunaka kwake kwose, kuti ugare mumba.

14 Akatema misidhari, kana zvimwe akatora musipuresi kana muouki.

Akaurega uchikura pakati pemitu yesango, kana kuti akasima mupaini, mvura ikaita kuti ukure.

15 Ndidzo huni dzomunhu dzokuvesa moto; dzimwe dzacho anodzitora agozvidziyisa nadzo, anovesa moto agobika chingwa nadzo.

Asizve anoveza chimwari agochinamata;  
anoita chifananidzo agochipfugamira.

16 Hafu yehuni anopisa mumoto,  
nadzo anobika zvokudya zvake,  
anogocha nyama yake agoidya achiguta.

Anozvidziyisazve, agoti,  
“Haiwa! Ndadziyirwa; moto ndiri kuuona.”

17 Nezvasara anoita nazvo chimwari,  
icho chifananidzo chake; anochipfugamira  
agochinamata.

Anonyengetera kwachiri achiti,  
“Ndiponesei; ndimi mwari wangu.”

18 Havana chavanoziva, havanzwisisi chinhu,  
meso avo akanamwa kuitira kuti varege  
kuona,  
uye ndangariro dzavo dzakafukidzirwa  
kuitira kuti varege kunzwisisa.  
Hapana anombomira kuti afunge,

19 Hapana ane ruzivo  
kana kunzwisisa kuti ati,  
“Hafu yacho ndaishandisa pakuvesa moto;  
ini iyeni ndabikira chingwa pamazimbe  
acho,  
ndagocha nyama ndikadya.

Ndichaita zvinonyangadza pane zvasara here?  
Ndichapfugamira kudanda rehuni here?”

20 Anodya madota, mwoyo wakanyengerwa un-  
omutsausa;  
haagoni kuzviponesa kana kuti ati,  
“Ko, chinhu ichi chiri muruoko rwangu  
rworudyi hachisi chenhema here?”

21 “Rangarira zvinhu izvi, iwe Jakobho,

nokuti uri muranda wangu, iwe Israeri.  
 Ndakakuita, uri muranda wangu;  
 haiwa Israeri, handichakukanganwizve.  
 22 Ndakadzima kudarika kwako segore,  
 nezvivi zvako semhute yamangwanani.  
 Dzokera kwandiri,  
 nokuti ndakakudzikinura.”

23 Imbai nomufaro imi matenga, nokuti Jehovha  
 akaita izvozvi;  
 danidzira nesimba, iwe nyika iri pasi.  
 Imbai nziyo, imi makomo,  
 nemi masango nemiti yose,  
 nokuti Jehovha adzikinura Jakobho,  
 akaratidza kubwinya muIsraeri.

*Jerusarema Richagarwazve*

24 “Zvanzi naJehovha,  
 mudzikinuri wako, iye akakuumba uri  
 mudumbu:

“Ndini Jehovha,  
 akaita zvinhu zvose,  
 iye oga akatatamura matenga,  
 akatambanudza nyika oga,

25 “Iye anokonesa zviratidzo zvavaprofita ven-  
 hema,  
 anoita kuti vavuki vave mapenzi,  
 iye anoparadza kudzidza kwevane njere,  
 uye anokushandura kuti kuve upenzi,  
 26 anozadzisa mashoko omuranda wake,  
 uye anozadzisa zvakaprofitwa nenhume  
 dzake,

“anoti kuJerusarema, ‘Richagarwa,’  
 nokumaguta eJudha, ‘Achavakwa,’  
 nokumatongo awo, ‘Ndichaavandudza,’  
 27 iye anoti kumvura yakadzika, ‘Oma,  
 uye ndichaomesa hova dzako,’  
 28 iye anoti pamusoro paSirasi,  
 ‘Ndiye mufudzi wangu uye achaita zvole  
 zvandinoda;  
 iye ahati pamusoro peJerusarema, “Ngari-  
 vakwezve,”  
 uye pamusoro petemberi ahati, “Nheyo  
 dzayo ngadziteyiwe.” ’

## 45

1 “Zvanzi naJehovha kumuzodziwa wake,  
 kuna Sirasi, ane ruoko rworudyi rwandaka-  
 bata  
 kuti akunde ndudzi pamberi pake,  
 uye kuti atorere madzimambo zvombo  
 zvavo,  
 kuti ndizarure mikova pamberi pake,  
 masuo agorega kupfigwa:  
 2 Ndichaenda mberi kwako  
 uye ndichaenzanisa makomo;  
 ndichaputsa masuo endarira  
 uye ndichacheka ndigopinda napamazariro  
 esimbi.  
 3 Ndichakupa pfuma yerima,  
 upfumi hwakavigwa panzvimbo  
 dzakavanda,  
 kuti uzive kuti ndini Jehovha, Mwari waIsraeri,  
 anokudana nezita rako.  
 4 Nokuda kwaJakobho muranda wangu,

nokwaIsraeri musanangurwa wangu,  
 ndinokudana nezita rako,  
 uye ndinoisa pamusoro pako zita  
 rokukudzwa,  
 kunyange iwe usingandizivi.

<sup>5</sup> Ndini Jehovha, uye hakuna mumwe;  
 kunze kwangu ini hakuna Mwari.

Ndichakusimbisa,  
 kunyange usina kundiziva,

<sup>6</sup> kuti kubya kumabudazuva  
 kusvikira kwarinovirira,  
 vanhu vazive kuti hakuna mumwe kunze  
 kwangu.

Ndini Jehovha uye hakuna mumwe.

<sup>7</sup> Ndinoumba chiedza uye ndinosika rima,  
 ndinoita rugare uye ndinosika njodzi;  
 ini Jehovha, ndini ndinoita zvinhu izvi  
 zvose.

<sup>8</sup> “Imi matenga kumusoro, nayisai kururama;  
 makore ngaakudonhedze pasi.

Nyika ngaizaruke kwazvo,  
 ruponeso ngarutubuke,  
 kururama ngakukure pamwe chete narwo;  
 ini Jehovha, ndini ndakazvisika.

<sup>9</sup> “Ane nhamo uyo anokakavadzana noMuiti  
 wake,  
 iye anongova chaenga pakati pezvaenga pa-  
 musoro pevhu.

Ko, ivhu ringati kumuumbi,  
 ‘Uri kugadzirei?’

Ko, basa rako rinoti here,  
 ‘Uyu haana maoko?’

10 Ane nhamo uyo anoti kuna baba vake,  
 ‘Chiiko chamakabereka?’  
 kana kuna mai vake,  
 ‘Chiiko chamakazvara?’

11 “Zvanzi naJehovha,  
 iye Mutsvene waIsraeri, noMuiti wake:  
 Pamusoro pezvinhu zvichauya,  
 unondibvunza here pamusoro pavana  
 vangu,  
 kana kundirayira pamusoro pebasa ra-  
 maoko angu?”

12 Ndini ndakaita nyika  
 uye ndikasika vanhu vendudzi dzose pamu-  
 sororo payo.  
 Maoko angu pachangu akatatamura matenga;  
 ndakarayira hondo dzawo dzose dzeny-  
 eredzi.

13 Ndichamutsa Sirasi mukururama kwangu:  
 ndichaita kuti nzira dzake dzose dzirurame.  
 Achavakazve guta rangu,  
 uye achasunungura vatapwa vangu,  
 asi pasina muripo kana mubayiro,  
 ndizvo zvinotaura Jehovha Wamasimba  
 Ose.”

14 Zvanzi naJehovha:  
 “Zvibereko zveIjipiti nezvinoshambadzirwa  
 zveEtiopia,  
 navaSabhea varefu,  
 vachauya kwauri  
 uye vachava vako;  
 vachatevera mushure mako,  
 vachiuya kwauri vakasungwa nengetani.  
 Vachapfugama pamberi pako

uye vachakunyengetedza, vachiti,  
 ‘Zvirokwazvo Mwari anewe,  
 uye hakunazve mumwe; hakuna mumwe  
 mwari.’”

15 Zvechokwadi muri Mwari anozvivanza,  
 imi Mwari noMuponesi waIsraeri.

16 Vose vanoita zvifananidzo vachava nenyadzi  
 uye vachanyadziswa,  
 vachasvika pakunyadziswa pamwe chete.

17 Asi Israeri achaponeswa naJehovha  
 noruponeso rusingaperi;  
 hamuchazombonyadziswi kana kuva nenyadzi,  
 kusvikira kumakore asingaperi.

18 Nokuti zvanzi naJehovha,  
 iye akasika matenga,  
 ndiye Mwari;  
 iye akaumba uye akaita nyika,  
 ndiye akaisimbisa;  
 haana kuisikira kuti igare isina chinhu,  
 asi akaiumba kuti igarwe,  
 anoti:

“Ndini Jehovha,  
 uye hakuna mumwe.

19 Handina kutaura ndiri pakavanda,  
 ndichibva kumwe kunyika yerima;  
 handina kuti kuvana vaJakobho,  
 ‘Nditsvakei pasina.’

Ini, Jehovha ndinotaura chokwadi;  
 ndinoparidza zvakarurama.

20 “Unganai pamwe chete muuye;

unganai, imi vatizi vanobva kune dzimwe ndudzi.

Vose vanotakura mifananidzo yamatanda havazivi,  
vanonyengetera kuna vamwari vasingagoni kuponesa.

<sup>21</sup> Paridzai zvichauya, muzvibudise pachena:  
ngavarangane pamwe chete.

Ndianiko akazvitaure kare,  
ndiani akazvireva kubva kare nakare?

Handizini Jehovha here?

Uye kunze kwangu ini hakuna Mwari,

Mwari akarurama noMuponesi;  
hakuna mumwe asi ini.

<sup>22</sup> “Dzokerai kwandiri mugoponeswa,  
imi mose migumo yenyika;  
nokuti ndini Mwari, uye hakuna mumwe.

<sup>23</sup> Ndakapika neni pachangu,  
muromo wangu wakataura  
nokururama kwose shoko risingazoshan-  
durwi:

Mabvi ose achapfugama pamberi pangu;  
ndimi dzose dzichapika neni.

<sup>24</sup> Vachati pamusoro pangu,  
‘Muna Jehovha chete ndimo muno kuru-  
rama nesimba.’”

Vose vakamutsamwira  
vachauya kwaari uye vachanyadziswa.

<sup>25</sup> Asi rudzi rwose rwaIsraeri  
ruchawanikwa rwakarurama muna Jehovha  
uye ruchafara.



## 46

### *Vamwari veBhabhironi*

- <sup>1</sup> Bheri rinokotamira pasi, Nebho rinokotama;  
zvifananidzo zvavo zvinotakurwa nezvipfuwo zvinotakura mutoro.  
Zvifananidzo zvacho zvinotakurwa zvinorema,  
mutoro pazvipfuwo zvakaneta.
- <sup>2</sup> Zvinokotama uye zvinokotamira pasi pamwe chete;  
zvisingagoni kurwira mutoro,  
izvo pachazvo zvinoenda kuutapwa.
- <sup>3</sup> “Ndinzwei, imi imba yaJakobho,  
imi mose vakasara veimba yaIsraeri,  
imi vandakasimudzira kubvira muchiri mudumbu,  
uye ndikakutakurai kubvira pakuzvarwa kwenyu.
- <sup>4</sup> Kunyange kusvikira pakuchembera kwenyu,  
bvudzi rachena, ndini iye, ndini ndichakururamisai.  
Ndakakuitai uye ndichakutakurai;  
ndichakuraramisai uye ndichakununurai.
- <sup>5</sup> “Mungandienzanisa naaniko kana kunditi ndakaita saani?  
Mungandifananidza naaniko wandingaenzaniswa naye?
- <sup>6</sup> Vamwe vanodurura goridhe kubva muhomwe dzavo,  
uye vanoyera sirivha pazviyero;  
vanotsvaka mupfuri kuti avaitire chimwari,  
vagopfugama kuti vachinamate.

- 7 Vanochisimudzira pamapfudzi avo vagochi-  
takura;  
vanochigadzika panzvimbo yacho,  
uye hecho chomira, hachigoni kufamba kuti  
chibvepo.  
Kunyange mumwe akadanidzira kwachiri,  
hachipinduri;  
hachigoni kumuponesa kubva pamatam-  
budziko ake.
- 8 “Rangarirai chinhu ichi, muchiise mupfungwa  
dzenyu,  
muisse pamwoyo yenyu, imi vapanduki.
- 9 Rangarirai zvinhu zvakare, zviya zvekare kare;  
ndini Mwari, uye hakuna mumwe;  
ndini Mwari, hakuna akafanana neni.
- 10 Ndinozivisa magumo kubva pakutanga,  
kubva panguva yekare kare, izvo zvichiri  
kuuya.  
Ndinoti: Zvandakaronga zvichaitika,  
uye ndichaita zvose zvandinoda.
- 11 Kubva kumabvazuva ndinodana gondo;  
kubva kunyika iri kure kure ndinodana  
munhu achazadzisa kuda kwangu.  
Zvandakareva ndichaita kuti zviitike;  
zvandakaronga, ndichazviita.
- 12 Nditeererei, imi vane mwoyo yakasindimara,  
iyemi muri kure nokururama.
- 13 Ndiri kuswededza pedyo kururama kwangu,  
hakusi kure;  
uye ruponeso rwangu haruzononotswi.  
Ndichapa ruponeso kuZioni,  
nokubwinya kwangu kuna Israeri.

## 47

*Kuwa kweBhabhironi*

- 1 “Buruka, ugare muguruva,  
iwe Mhandara yeBhabhironi;  
gara pasi usina chigaro choushe,  
iwe Mhandara yavaBhabhironi.  
Hauchazonzi uri munyoro  
kana munhu akapfava.
- 2 Tora makuyo ukuye upfu;  
bvisa vhoiri rako.  
Fukura nguo dzako,  
makumbo ako aonekwe, uyambuke hova.
- 3 Kushama kwako kuchava pachena,  
uye kunyadzwa kwako kuchaonekwa.  
Ndichatsiva;  
handizosiyi munhu.”
- 4 Mudzikinuri wedu, Jehovha Wamasimba Ose  
ndiro zita rake;  
ndiye Mutsvene waIsraeri.
- 5 Gara unyerere, enda murima,  
Mhandara yavaBhabhironi;  
hauchazonzi mambokadzi wenyika  
dzakasiyana-siyana.
- 6 Ndakatsamwira vanhu vangu  
ndikasvibisa nhaka yangu;  
ndakavapa muruoko rwako,  
iwe ukasavanzwira ngoni.  
Kunyange vakakwegura  
wakavatakudza joko rinorema kwazvo.
- 7 Wakati, “Ndicharamba  
ndiri mambokadzi nokusingaperi!”

Asi hauna kufunga zvinhu izvi,  
kana kucherechedza zvaizogona kuitika.

<sup>8</sup> Naizvozvo zvino, chinzwa,  
iwe chisikwa chisingagutsikani,  
ugere zvakachengetedzeka, uchiti,  
mumwoyo mako, “Ndini, hakuna mumwe  
kunze kwangu.

Handizovi chirikadzi,  
uye handizotambudziki nokurasikirwa na-  
vana.”

<sup>9</sup> Zviviri izvozvi zvichakuwira nechinguva  
chidiki diki,

pazuva rimwe chete zvinoti:

kufirwa navana nouchirikadzi.

Zvichauya pamusoro pako nechiyero chizere,  
kunyange uine un’anga hwako huzhinji,  
nouroyi hwako hwakawanda.

<sup>10</sup> Wakavimba nezvakaipa zvako uye wakati,  
“Hapana anondiona.”

Uchenjeri hwako nezivo yako

zvinokutsausa paunoti, mumwoyo mako,

“Ndini, uye hakuna mumwe kunze  
kwangu.”

<sup>11</sup> Dambudziko richakuwira,

uye haugoni kuzoziva kuti ungaritanda sei.

Njodzi ichakuwira yausingagoni

kubvisa nomuripo;

pakarepo kuparadza kwausingagoni kuziva,  
kuchawira pamusoro pako.

<sup>12</sup> “Zvino, enderera hako mberi nouroyi hwako,  
uye noun’anga hwako huzhinji,

hwawakashandira kubva paudiki hwako.  
 Zvichida uchabudirira,  
 zvichida uchavhundutsira vamwe.  
 13 Mazano ose awakagamuchira, akakunetesa  
 chete!  
 Vanhu vako vanocherechedza nyeredzi  
 ngavauye mberi,  
 avo vanotarira nyeredzi vachifembera mwedzi  
 nomwedzi,  
 ngavakuponesa pane zviri kuuya pamusoro  
 pako.  
 14 Zvirokwazvo vakafanana namashanga;  
 moto uchaapisa akapera.  
 Havangatongogoni kuzvirwira,  
 pasimba romurazvo womoto.  
 Asi hapana mazimbe okuti munhu adziyirwe;  
 hapana moto wokudziya ipapo.  
 15 Izvozvi ndizvo chete zvavangakuitira,  
 ava vawakashanda navo,  
 uye ukafamba navo kubva paudiki hwako.  
 Mumwe nomumwe wavo anoenderera mberi  
 nokukanganisa kwake;  
 hapana kana mumwe angakuponesa.

## 48

### *Israeri ino mwoyo mukukutu*

1 “Inzwi izvi, imi imba yaJakobho,  
 makatumidzwa zita raIsraeri,  
 uye muchibva kurudzi rwaJudha,  
 imi munoita mhiko muzita raJehovha,  
 uye munodana kuna Mwari waIsraeri,  
 asi musingaiti muzvokwadi kana mukuru-  
 rama,

- 2 imi munozviti vagari vomuguta dzvene,  
 muchivimba naMwari weIsraeri;  
 Jehovha Wamasimba Ose ndiro zita rake:
- 3 Ndakazivisa zvinhu zvakare, kare kare,  
 muromo wangu wakazvireva uye ndakaita  
 kuti zvizivikanwe;  
 ipapo nokukurumidza ndakazviita, uye  
 zvikaitika.
- 4 Nokuti ndaiziva kuti mwoyo wako wakanga  
 wakasindimara sei;  
 nokuti mutsipa wako wakanga uri runda  
 rwesimbi,  
 huma yako yakanga iri ndarira.
- 5 Naizvozvo ndakakuudza zvinhu izvi kare kare;  
 zvisati zvaitika ndakazvizivisa kwauri,  
 kuitira kuti urege kuzoti,  
 ‘Zvifananidzo zvangu,  
 ndizvo zvakazviita; mufananidzo wangu  
 wedanda namwari wangu wesimbi ndizvo  
 zvakarayira izvozvo.’
- 6 Wakazvinzwa zvinhu izvi; zvitarire zvose.  
 Haungazvibvumi here?

“Kubva zvino ndichakuzivisa zvinhu zvitsva,  
 zvakavanzika zvausingazivi.

- 7 Zvava kusikwa zvino, uye hakusi kare;  
 hauna kumbozvinzwa zuva ranhasi risati  
 rasvika.

Saka haugoni kuti,  
 ‘Hongu, ndaizviziva.’

- 8 Hauna kumbonzwa kana kunzwisisa;  
 kubva kare nzeve yako yakanga isina kudz-  
 iurwa.

Ndinoziva kwazvo kuti uri munyengeri akadii;

wakanzi mhandu kubva pakuzvarwa kwako.

9 Nokuda kwezita rangu ndinononoka kut-samwa;

nokuda kwokurumbidzwa kwangu ndinozvidzora pamusoro pako, kuti ndisakuparadza.

10 Tarira, ndakakunatsa, kunyange zvisina kuita sesirivha;

ndakakuedza muchoto chokutambudzika.

11 Nokuda kwangu, nokuda kwangu, ndinoita izvi.

Ko, ndingaregererei zita rangu richimhurwa?

Handingapi kukudzwa kwangu kuno mumwe.

*Israeri inosunungurwa*

12 “Nditeerere, iwe Jakobho, Israeri, wandakadaidza;

ndini iye:

ndini wokutanga uye ndini wokupedzisira.

13 Ruoko rwangu ndirwo rwakateya nheyo dzenyika,

uye ruoko rwangu rworudyi rwakatambanudza matenga;

pandinozvidana,

zvose zvinomira pamwe chete.

14 “Unganai pamwe chete, imi mose muteerere;

Ndechipiko chimwe chezvifananidzo chakakuudzai kuti zvinhu izvi zvichaitika?

Iye anodikanwa naJehovha

achaita zvakarongwa naJehovha pamusoro peBhabhironi;

ruoko rwake rucharwisa vaBhabhironi.  
 15 Ini, iyeni ndataura;  
 hongu, ndamudana.

Ndichauya naye,  
 uye achabudirira pane zvaanotumwa.

16 “Swederai kwandiri muteerere izvi:  
 “Kubvira pachiziviso chokutanga handina kum-  
 botaura muchivande;  
 panguva yazvinoitika, ndinenge ndiripo.”

Uye zvino Ishe Jehovha andituma  
 noMweya wake.

17 Zvanzi naJehovha  
 Mudzikinuri wako, Mutsvene waIsraeri:  
 “Ndini Jehovha Mwari wako,  
 anokudzidzisa zvinokubatsira,  
 anokutungamirira munzira yaunofanira ku-  
 famba nayo.

18 Dai chete wakanga wateerera mirayiro yangu,  
 rugare rwako rungadai rwakaita sorwizi,  
 kururama kwako samafungu egungwa.

19 Zvizvarwa zvako zvingadai zvakaita sejecha,  
 navana vako vakaita setsanga dzejecha  
 dzisingaverengeki;  
 zita ravo haraimboparara  
 kana kuparadzwa pamberi pangu.”

20 Mudai muBhabhironi,  
 tizai vaBhabhironi!  
 Zivisai izvi nomufaro mukuru,  
 uye muzviparidze.  
 Zvitumirei kumagumo enyika;



muti, “Jehovha adzikinura muranda wake Jakobho.”

21 Havana kunzwa nyota paakavatungamirira mugwenga;  
akaita kuti mvura iyerere ichibva mudombo, achiitira ivo;  
akatsemura dombo mvura ikatubuka.

22 “Vakaipa havana rugare,” ndizvo zvinotaura Jehovha.

## 49

### *Muranda waJehovha*

1 Ndinzwei, imi zviwi;  
inzwai izvi, imi ndudzi dziri kure;  
Jehovha akandidana ndisati ndaberekwa;  
kubva pakuzvarwa kwangu akataura zita rangu.

2 Akaita muromo wangu somunondo unopinza,  
akandiviga mumumvuri wechanza chake;  
akandiita museve unopenya,  
akandiviga mugomba rake.

3 Akati kwandiri, “Ndiwe muranda wangu, Israeri, wandicharatidza kubwinya kwangu maari.”

4 Asi ndakati, “Ndakashandira pasina,  
ndapedza simba rangu pane zvisina maturo uye pasina.

Nyamba zvakandifanira ini zviru muruoko rwa-Jehovha,  
uye mubayiro wangu uri kuna Mwari.”

5 Zvino Jehovha anoti,

iye akandiumba ndiri muchizvaro kuti ndive  
 muranda wake,  
 kuti ndidzorere Jakobho kwaari  
 uye kuti Israeri vaunganidzweze kwaari,  
 nokuti ndinokudzwa pamberi paJehovha,  
 uye Mwari wangu ndiye anga ari simba  
 rangu,

<sup>6</sup> iye anoti:

“Chinhu chiduku kwazvo kuti iwe uve muranda  
 wangu,  
 anomutsazve marudzi aJakobho  
 uye achadzosa avo vaIsraeri van-  
 dakachengeta.  
 Uyezve ndichakuita chiedza chevedzimwe  
 ndudzi,  
 kuti uyuyise ruponeso rwangu kumigumo  
 yenyika.”

<sup>7</sup> Zvanzi naJehovha,

Mudzikinuri noMutsvene waIsraeri,  
 kuna iye akanga azvidzwa uye akasemwa  
 norudzi,  
 kumuranda wavatongi:

“Madzimambo achakuona agosimuka,  
 machinda achaona agokotamira pasi,  
 nokuda kwaJehovha akatendeka,  
 Mutsvene waIsraeri, akakusarudza.”

*Israeri Inomutsiridzwa*

<sup>8</sup> Zvanzi naJehovha:

“Munguva yangu yakafanira, ndichakupindura,  
 uye pazuva roruponeso ndichakubatsira;  
 ndichakuchengeta uye ndichakuita  
 kuti uve sungano yavanhu,

kuti uvandudze nyika  
 uye uvagarise patsva nhaka yakaparara,  
 9 kuti uti kunhapwa, 'Budai,'  
 nokuna avo vari murima, 'Uyai muchiedza!'

"Vachadya zvokudya parutivi rwenzira,  
 uye vachawana mafuro pazvikomo zvose  
 zvisina zvibereko.

10 Havangavi nenzara kana nyota,  
 havangabayiwi nokupisa kwegwenga, kana  
 nokupisa kwezuva.

Iye anovanzwira tsitsi achavatungamirira,  
 uye achavafambisa napazvitubu zvemvura.

11 Ndichashandura makomo angu ose kuti ave  
 migwagwa,  
 uye migwagwa yangu mikuru  
 ichasimudzirwa.

12 Tarirai vachauya vachibva kure:  
 vamwe vachibva nechokumusoro, vamwe  
 nechokumavirazuva,  
 vamwe nokurutivi rweAsiwani."

13 Imbai, imi matenga,  
 pembera iwe nyika;  
 imbai rwiyo imi makomo!

Nokuti Jehovha anonyaradza vanhu vake,  
 uye achava netsitsi navanhu vake vanotam-  
 budzika.

14 Asi Zioni rakati, "Jhovha akandisiya,  
 Jhovha akandikanganwa."

15 "Ko, mai vangakanganwa mucheche anonwa  
 ari pachipfuva chavo,

- uye vangasanzwira tsitsi mwana wavakaz-  
 vara here?  
 Kunyange hazvo ivo vakakanganwa,  
 ini handizokukanganwi!
- 16 Tarira, ndakakunyora pazvanza zvamaoko  
 angu;  
 madziro ako anogara ari mberi kwangu.
- 17 Vanakomana vako vanokurumidza kudzoka  
 shure,  
 uye vose vaikuparadza vachabva kwauri.
- 18 Simudza meso ako utarise kwose kwose;  
 vanakomana vako vose vanoungana vachi-  
 uya kwauri.
- Zvirokwazvo noupenyu hwangu,”  
 ndizvo zvinotaura Jehovha, “uchavafuka  
 vose sezvishongo:  
 uchavapfeka, somwenga.
- 19 “Kunyange wakaparadzwa ukaitwa dongo,  
 uye nyika yako yakasiyiwa yava dongo,  
 zvino vanhu vako havachakwani mauri,  
 uye vose vaikumedza vachava kure.
- 20 Vana vakaberekwa panguva yokufirwa kwako  
 vachatizve munzeve dzako,  
 ‘Nzvimbo iyi yava diki kwatiri:  
 tipeiwo nzvimbo yakatambanuka yatinga-  
 gara.’
- 21 Ipapo uchatu mumwoyo mako,  
 ‘Ndianiko akandiberekera ava?  
 Ndakanga ndafirwa uye ndisina mwana;  
 ndakanga ndadzingwa uye ndarambwa.  
 Ndianiko akarera ava?  
 Ndakasiyiwa ndiri ndoga,  
 asi ava, vabvepiko?’ ”

22 Zvanzi naIshe Jehovha,  
 “Tarira ndichasimudza ruoko rwangu kune  
 veDzimwe Ndudzi,  
 ndichasimudzira mureza wangu kumarudzi;  
 vachauya navanakomana vako vari mumaoko  
 avo,  
 uye vachatakura vanasikana vako pamap-  
 fudzi avo.

23 Madzimambo achava madzibaba anokurerai,  
 uye vanamambokadzi vavo vachava vana-  
 mai vanokurerai.  
 Vachakupfugamirai uso hwavo hwakatsikitsira  
 pasi,  
 vachananzva guruva patsoka dzenyu.  
 Ipapo muchaziva kuti ndini Jehovha;  
 vanovimba neni havachazonyadziswi.”

24 Ko, mhare ingapambwa here,  
 kana vatapwa vanganunurwa kubva kune  
 anotyisa here?

25 Asi zvanzi naJehovha,  
 “Hongu vatapwa vachatorwa kubva kumhare,  
 uye zvakapambwa kubva kune anotyisa;  
 ndicharwa nevanorwa newe,  
 uye vana vako ndichavaponesa.

26 Ndichaita kuti vamanikidzi vako vadye nyama  
 yavo;  
 vachadhakwa neropa ravo, sevadhakwa  
 newaini.  
 Ipapo vanhu vose vachaziva kuti ini Jehovha,  
 ndini Muponesi wako,  
 Mudzikinuri wako, Wamasimba Ose wa-  
 Jakobho.”

## 50

### *Chivi chaIsraeri noKuteerera kwoMuranda*

<sup>1</sup> Zvanzi naJehovha:

“Ko, rugwaro rwokurambwa  
kwamai venyu rwuripiko rwan-  
dakavadzinga narwo?

Uye ndevapiko vandakakwereta  
ndikazokutengesai kwavari?

Makatengeswa nokuda kwezvivi zvenyu;  
mai venyu vakadzingwa nokuda kwoku-  
darika kwenyu.

<sup>2</sup> Sei ndakashaya munhu, pandakauya?

Sei pasina akapindura pandakadana?

Ko, ruoko rwangu rwakanga rwakapfupika here  
kuti ndikudzikinurei?

Handina simba rokukununurai here?

Nokungorayira chete ndinopwisa gungwa;  
ndinoshandura nzizi dzikava gwenga;

hove dzadzo dzinoora nokushayiwa mvura,  
uye dzinofa nenyota.

<sup>3</sup> Ndinoshonedza denga nerima

uye ndinoita masaga chifukidzo charo.”

<sup>4</sup> Ishe Jehovha akandipa rurimi rwakadzidziswa,  
kuziva shoko rinosimbisa vakarukutika.

Anondimutsa mangwanani namangwanani,  
anomutsa nzeve yangu kuti iteerere so-  
munhu anodzidziswa.

<sup>5</sup> Ishe Jehovha akazarura nzeve dzangu,

uye handina kumumukira;

handina kudzokera shure.

<sup>6</sup> Ndakapa musana wangu kuna avo vaindirova,

namatama angu kuna avo vakadzura nde-  
 bvu dzangu;  
 Handina kuvanza chiso changu  
 pakusekwa nokupfirwa mate.  
 7 Nokuti Ishe Jehovha anondibatsira,  
 handizonyadziswi.  
 Naizvozvo ndakaita kuti chiso changu chive  
 sebwe romusarasara,  
 uye ndinoziva kuti handizonyadziswi.  
 8 Iye anondiruramisira ari pedyo.  
 Ndianiko zvino achandipa mhosva?  
 Ngatitarisanei!  
 Ndianiko mupomeri wangu?  
 Ngaanangane neni!  
 9 Ndiye Ishe Jehovha anondibatsira.  
 Ndianiko achandipa mhosva?  
 Vose vachasakara senguu;  
 vachadyiwa nezvipfuno.  
 10 Ndiani pakati penyuru anotywa Jehovha,  
 uye anoteerera shoko romuranda wake?  
 Ngaafambe murima,  
 iye asina chiedza,  
 ngaavimbe nezita raJehovha  
 uye avimbe naMwari wake.  
 11 Asi zvino, imi mose munotungidza moto  
 muchava nemwenje inopfuta,  
 endai, mufambe muchiedza chomoto  
 wenyu nechemwenje yamakabatidza.  
 Izvi ndizvo zvamuchagamuchira kubva paruoko  
 rwangu:  
 Muchavata pasi mukurwadziwa.

# 51

## *Ruponeso Rwokusingaperi rweZioni*

- <sup>1</sup> Nditeererei, imi munotevera kururama  
 uye munotsvaka Jehovha:  
 Tarirai kudombo ramakabviswa pariri  
 naparuware pamakacherwa;
- <sup>2</sup> tarirai kuna Abhurahama, baba venyu,  
 nokuna Sara, akakuberekai.  
 Pandakamudana akanga achingova mumwe  
 chete,  
 ndikamuropafadza ndikamuita vazhinji.
- <sup>3</sup> Zvirokwezvo Jehovha achanyaradza Zioni,  
 uye achatarira netsitsi pamusoro pamatongo  
 aro ose;  
 achaita magwenga aro kuti afanane neEdheni,  
 marenje aro achafanana nebindu raJehovha.  
 Kupembera nomufaro zvichawanikwa mariri,  
 kuvonga nenzwi rokuimba.
- <sup>4</sup> “Nditeererei, imi vanhu vangu;  
 ndinzwei imi rudzi rwangu:  
 Ndichakupai murayiro;  
 kururamisira kwangu kuchava chiedza kundudzi.
- <sup>5</sup> Kururama kwangu kwoswedera pedyo nokukurumidza,  
 ruponeso rwangu rwuri munzira,  
 uye ruoko rwangu ruchauyisa kururamisira kundudzi.  
 Zwiwi zvichatarira kwandiri  
 uye zvichamirira ruoko rwangu netariro.
- <sup>6</sup> Simudzirai meso enyu kumatenga,  
 tarirai pasi panyika;



matenga achanyangarika soutsu,  
 nyika ichasakara senguu,  
 uye vanogaramo vachafa senhunzi.  
 Asi ruponeso rwangu ruchagara nokusingaperi,  
 kururama kwangu hakuzombogumi.

7 “Ndinzwei, imi munoziva zvakarurama,  
 imi vanhu vane murayiro wangu mumwoyo  
 yenyu:

Musatya kuzvidza kwavanhu,  
 uye musavhundutswa nokutuka kwavo.

8 Nokuti chipfuno chichavadya senguu;  
 honye ichavadya sewuru.

Asi kururama kwangu kuchagara nokusingaperi,  
 ruponeso rwangu kuzvizvarwa zvose.”

9 Muka, muka! Zvishongedze nesimba,  
 iwe ruoko rwaJehovha;  
 muka, sepamazuva akare,  
 sepazvizvarwa zvakare.

Ko, hausuwe wakagura-gura Rahabhi,  
 ukabaya chikara chiya here?

10 Hausuwe wakaomesa gungwa here,  
 iyo mvura yokwakadzika zvikuru,  
 ukaita mugwagwa makadzika megungwa  
 kuitira kuti vakadzikinurwa vayambuke?

11 Vakasunungurwa vaJehovha vachadzoka.  
 Vachapinda muZioni vachiimba;  
 mufaro usingaperi uchava korona pamisoro  
 yavo.

Mufaro nokupembera zvichafashukira,  
 uye kusuwa nokukahadzika zvichatiza.

- 12 “Ini, iyeni, ndini iye anokunyaradzai.  
 Ndiwe aniko unotyva vanhu vanofa,  
 vanakomana vavanhu, ivo uswa zvahwo,  
 13 kuti ukanganwe Jehovha Muiti wako,  
 akatatamura matenga,  
 akateya nheyo dzenyika,  
 kuti ugare uchitya mazuva ose  
 nokuda kwehasha dzomumanikidzi,  
 uyo akarerekera kukuparadza?  
 Ko, hasha dzomumanikidzi dziripi?  
 14 Vasungwa vakatapwa vachakurumidza  
 kusunungurwa;  
 havazofiri mumakomba avo,  
 kana kuzoshayiwa chingwa.  
 15 Nokuti ndini Jehovha Mwari wako,  
 anomutsa gungwa kuti mafungu aro atin-  
 hire,  
 Jehovha Wamasimba Ose ndiro zita rake.  
 16 Ndakaisa mashoko angu mumuromo mako,  
 ndikakufukidza nomumvuri woruoko  
 rwangu,  
 iyeni ndakagadzika matenga panzvimbo yawo,  
 iyeni ndakateya nheyo dzenyika,  
 uye ndinoti kuZioni, ‘Muri vanhu vangu.’ ”

*Mukombe weHasha dzaJehovha*

- 17 Muka, muka! Simuka,  
 iwe Jerusarema,  
 iwe wakanwa kubva muruoko rwaJehovha,  
 mukombe wehasha dzake,  
 iwe wakasveta kusvikira wapera kuti tsvai,  
 iwo mukombe unoita kuti vanhu vadzedz-  
 ereke.  
 18 Pavanakomana vose

vaakabereka pakanga pasina anomu-  
tungamirira;  
pavanakomana vose vaakarera  
pakanga pasina aimusedza noruoko  
rwake.

19 Njodzi mbiri idzi dzauya pamusoro pako,  
ndianiko angakunyaradza? Dzinoti:  
kuva dongo nokuparadzwa, nzara nomunondo;  
ndianiko anogona kukunyaradza?

20 Vanakomana vako vaziya;  
vanovata panotangira migwagwa,  
kufanana nemhara yabatwa mumumbure.  
Vakazadzwa nehasha dzaJehovha  
nokutuka kwaMwari wako.

21 Naizvozvo inzwa izvi,  
iwe munhu wokutambudzika, wakadhak-  
iswa asi kwete newaini.

22 Zvanzi naIshe Jehovha Mwari wako,  
anodzivirira vanhu vake,  
“Tarira, ndabvisa muruoko rwako mukombe  
wakakuita kuti udzedzereke;  
kubva pamukombe uyo,  
iwo mukombe wehasha dzangu,  
hauchazounwizve.

23 Ndichauisa mumaoko avatambudzi vako,  
ivo vanoti kwauri,  
‘Zvambarara pasi kuti tifambe napamusoro  
pako.’

Iwe wakaita kuti musana wako uve sapasi,  
kufanana nomugwagwa unofambwa nawo.”

## 52

1 Muka, muka iwe Zion,

zvfukidze nesimba.  
 Fuku nguo dzako dzakanakisa,  
 iwe Jerusarema, guta dzvene.  
 Vasina kudzingiswa navakasvibiswa  
 havachapindizve mauri.  
<sup>2</sup> Zunza guruva rako: simuka,  
 ugare paushe, iwe Jerusarema.  
 Zvisunungure pangetani dziri pamutsipa wako,  
 iwe nhapwa, Mwanasikana weZioni.  
<sup>3</sup> Nokuti zvanzi naJehovha,  
 “Wakatengeswa pasina mutengo,  
 uye uchadzikinurwa pasina mari.”  
<sup>4</sup> Nokuti zvanzi naIshe Jehovha,  
 “Pakutanga vanhu vangu vakaenda kuIjipiti  
 kundogarako;  
 iye zvino Asiria inovamanikidza.  
<sup>5</sup> “Uye zvino ndinei pano?” ndizvo zvinotaura  
 Jehovha.  
 “Nokuti vanhu vangu vakabviswa pasina,  
 uye avo vanovatonga vanovaseka,”  
 ndizvo zvinotaura Jehovha.  
 “Uye zuva rose  
 zita rangu rinogara richimhurwa.  
<sup>6</sup> Naizvozvo vanhu vangu vachaziva zita rangu;  
 naizvozvo pazuva iro vachaziva  
 kuti ndini ndakazvitaura.  
 Hongu, ndini iye.”  
<sup>7</sup> Dzakanaka sei pamusoro pamakomo  
 tsoka dzavanouya namashoko akanaka,  
 vanoparidza rugare,  
 vanouya namashoko akanaka,  
 vanoparidza ruponeso,

vanoti kuZioni,

“Mwari wako anotonga!”

8 Chinzwa! Nharirire dzako dzinodanidzira  
namanzwi adzo;

vanopembera nomufaro pamwe chete.

Panodzokera Jehovha kuZioni,

vachazviona nameso avo pachavo.

9 Pururudzai muimbe nziyo dzomufaro pamwe  
chete,

imi matongo eJerusarema,

nokuti Jehovha anyaradza vanhu vake,

akadzikinura Jerusarema.

10 Jehovha acharatidza ruoko rwake rutsvene  
pamberi pendudzi dzose,

uye magumo ose enyika achaona

ruponeso rwaMwari wedu.

11 Ibvai, ibvai, budai ikoko!

Musabata chinhu chine tsvina!

Budaimo mugova vakachena,

imi munotakura midziyo yaJehovha.

12 Asi hamungazobudi nokukurumidza

kana kuenda muchitiza;

nokuti Jehovha achakutungamirirai,

Mwari waIsraeri achakurindai mushure.

*Kutambudzika noKukudzwa kwoMuranda*

13 Tarirai muranda wangu achaita nouchenjeri;

achasimudzirwa uye achakwidzwa pamu-  
soro, uye achakudzwa kwazvo.

14 Sezvo vazhinji vakashamiswa naye,

chiso chake chakanga chakakuvadzwa  
zvikuru, kupfuura chomunhu upi zvake,

uye chimiro chake chakanga chakangan-  
 iswa, kupfuura kuratidzika kwomunhu,  
 15 saka iye achasasa ndudzi zhinji,  
 uye madzimambo achafumbira miromo  
 nokuda kwake.  
 Nokuti zvavakanga vasina kuudzwa,  
 vachazviona,  
 uye zvavasina kumbonzwa, vachazvinzwi-  
 sisa.

## 53

1 Ndianiko akatenda zvatakaparidza,  
 uye ruoko rwaJehovha rwakaratidzwa kuna  
 aniko?  
 2 Akamera pamberi pake sebukira nyoro,  
 uye somudzi pavhu rakaoma.  
 Akanga asina runako kana chimiro choumambo  
 kuti atikwezve kwaari,  
 hapana chatingada pakuratidzika kwake.  
 3 Akazvidzwa uye akarambwa navanhu, mu-  
 rume wokusuwa,  
 uye anoziva kutambudzika.  
 Somunhu anovanzirwa chiso navanhu,  
 akazvidzwa,  
 uye isu hatina kumukudza.  
 4 Zvirokwazvo akatakura matenda edu,  
 uye akatakura kurwadziswa kwedu;  
 asi isu takafunga kuti akarohwa naMwari,  
 akarohwa naye uye akarwadziswa.  
 5 Asi akabayiwa nokuda kwokudarika kwedu,  
 akakuvadzwa nokuda kwezvakaipa zvedu;  
 kurohwa kwakatigira rugare kwaiva pamu-  
 soro pake,  
 uye namavanga ake takaporeswa.

- 6 Isu tose takanga takarasika samakwai,  
mumwe nomumwe nenzira yake,  
asi Jehovha akaisa pamusoro pake  
kuipa kwedu tose.
- 7 Akamanikidzwa uye akarwadziswa,  
asi haana kushamisa muromo wake;  
akatungamirirwa segwayana riri kundobayiwa,  
uye sokunyarara kwegwai pamberi pomu-  
veuri waro,  
saizvozvo haana kushamisa muromo wake.
- 8 Akabviswa achimanikidzwa uye akatongwa.  
Uye ndianiko angataura rudzi rwake?  
Nokuti akagurwa kubva panyika yavapenyu,  
nokuda kwokudarika kwavanhu vangu,  
akarohwa.
- 9 Akapiwa guva rake pakati pavatadzi,  
uye akava navapfumi pakufa kwake,  
kunyange akanga asina kuita zvechisimba,  
uye kunyengera kusina kuwanikwa mu-  
muromo make.
- 10 Asi kwakanga kuri kuda kwaJehovha kuti  
amukuvadze uye aite kuti atambudzike,  
uye kunyange zvazvo Jehovha akaita kuti  
upenyu hwake huve chipiriso chezvivi,  
achaona zvibereko zvake uye achawedzera  
mazuva ake,  
uye kuda kwaJehovha kuchabudirira mu-  
ruoko rwake.
- 11 Shure kwokutambudzika kwomweya wake,  
achaona chiedza choupenyu uye achagut-  
sikana;

nokuziva kwake, muranda wangu akarurama  
 acharuramisira vazhinji,  
 uye achatakura kuipa kwavo.

12 Naizvozvo ndichamupa mugove pakati  
 pavakuru vakuru,  
 uye achagoverana zvakapambwa navane  
 simba,  
 nokuti akadurura upenyu hwake kusvika  
 parufu,  
 akaverengwa pamwe chete navadariki.  
 Nokuti akatakura chivi chavazhinji,  
 akanyengeterera vadariki.

## 54

### *Kubwinya kuchaita Zioni*

- 1 “Imba, iwe mukadzi asina mwana,  
 iwe usina kumbobereka mwana  
 pururudza uimbe rwiyo, pembera nomufaro,  
 iwe usina kumborwadziwa;  
 nokuti vana vomukadzi akasiyiwa ari oga  
 vazhinji kupfuura  
 veane murume,”  
 ndizvo zvinotaura Jehovha.
- 2 Wedzera nzvimbo yetende rako,  
 tambanudza micheka yetende rako ifare,  
 usarega kuita izvozvo;  
 rebesa tambo dzako,  
 simbisa mbambo dzako.
- 3 Nokuti uchapararira kurudyi nokuruboshwe;  
 vana vako vachatorera dzimwe ndudzi  
 uye vachagara mumatongo amaguta avo.
- 4 “Usatya hako: haunganyadziswi.



Usatya kunyadziswa; haunganinipiswi.  
 Uchakanganwa nyadzi dzapaudiki hwako,  
 uye hauzorangarizve kunyadzisa kwouch-  
 irikadzi hwako.

<sup>5</sup> Nokuti Muiti wako ndiye murume wako,  
 Jehovha Wamasimba Ose ndiro zita rake,  
 Mutsvene waIsraeri ndiye Mudzikinuri wako;  
 anonzi Mwari wenyika yose.

<sup>6</sup> Jehovha achakudanazve  
 sokunge wanga uri mukadzi akasiyiwa, uye  
 anotambudzika pamweya,  
 mukadzi akawanikwa achiri mudiki,  
 pedzezvo ndokurambwa,” ndizvo zvinota-  
 taura Mwari wako.

<sup>7</sup> “Kwechinguvana ndakakusiya,  
 asi netsitsi huru ndikakudzozazve.

<sup>8</sup> Ndichisundwa nehasha  
 ndakavanza chiso changu kwauri kwechin-  
 guva,  
 asi nounyoro husingaperi  
 ndichava netsitsi, pamusoro pako,”  
 ndizvo zvinotaura Jehovha Mudzikinuri  
 wako.

<sup>9</sup> “Kwandiri izvi zvakafanana namazuva aNoa,  
 pandakapika kuti mvura zhinji yaNoa haizo-  
 fukidzizve nyika.

Naizvozvo zvino ndapika kuti ndirege kukut-  
 samwira,  
 kana kukutukazve.

<sup>10</sup> Kunyange makomo akazungunuswa,  
 uye zvikomo zvikabviswa,  
 rudo rwangu rusingaperi harungazungunuswi,  
 uye sungano yangu yorugare haingabviswi,”

ndizvo zvinotaura Jehovha anokunzwira  
tsitsi.

- 11 “Haiwa, iwe guta rokutambudzika wakarohwa  
nedutu ukasanyaradzwa,  
ndichakuvaka namabwe ana mavara,  
nheyo dzako namabwe esafire.
- 12 Ndichakuitira zviruvi zvamabwe matsvuku,  
masuo amabwe anovaima,  
uye masvingo ako ose amabwe anokosha.
- 13 Vanakomana venyu vose vachadzidziswa na-  
Jhovha,  
uye rugare rwavana venyu ruchava rukuru.
- 14 Muchasimbiswa mukururama:  
Kumanikidzwa kuchava kure nemi:  
hapana chamuchazotyā.  
Kutya kuchava kure nemi;  
hakuchazosviki pedyo nemi.
- 15 Kana mumwe akakurwisa, handisini ndinenge  
ndazviita;  
ani naani anokurwisa achazvipira kwauri.
- 16 “Tarira, ndini ndakasika mupfuri wesimbi  
anopfutidza mazimbe moto ugonganduma,  
uye anopfura munondo wakakodzera  
pabasa rawo.
- Uye ndini ndakasika muparadzi kuti aparadze;  
17 hapana munondo ucharwisana newe  
ukakunda,  
uye uchakonesa rurimi rumwe norumwe  
runokupomera mhosva.
- Iyi ndiyo nhaka yavaranda vaJhovha,  
uye uku ndiko kururamisirwa kwavo  
kunobva kwandiri,”

ndizvo zvinotaura Jehovha.

## 55

### *Kukokwa kwaVane Nyota*

- <sup>1</sup> “Uyai imi mose mune nyota,  
uyai kumvura zhinji;  
nemi musina mari, uyai,  
mutenge uye mudyu!
- Uyai mutenge waini nomukaka  
pasina mari uye pasina mutengo.
- <sup>2</sup> Ko, munopedzerei mari pazvinhu zvisati zviriri  
zvokudya,  
nesimba renyu pazvinhu zvisingagutsi?  
Teerera, nditeererei mugodya zvakanaka,  
uye mweya yenyu ichafarira zvakanaka  
zvezvakanaka.
- <sup>3</sup> Rerekai nzeve yenyu muuye kwandiri;  
ndinzwei kuti mweya yenyu irarame.  
Ndichaita sungano isingaperi nemi,  
iko kutendeka kworudo rwangu rwakavim-  
biswa kuna Dhavhidhi.
- <sup>4</sup> Tarirai, ndakamuita chapupu kumarudzi,  
mutungamiri nomukuru wamarudzi.
- <sup>5</sup> Zvirokwazvo uchakoka ndudzi dzausina kum-  
boziva,  
uye ndudzi dzisingakuzive dzichamhanyira  
kwaauri,  
nokuda kwaJhovha Mwari wako,  
Mutsvene waIsraeri,  
nokuti iye akakufukidza nokubwinya.”
- <sup>6</sup> Tsvakai Jehovha achawanikwa:  
danai kwaari achiri pedyo.
- <sup>7</sup> Akashata ngaasiye nzira yake,

nomunhu akaipa mirangariro yake.  
 Ngaadzokere kuna Jehovha, uye iye achamun-  
 zwira ngoni,  
 nokuna Mwari wedu, nokuti achakangan-  
 wirwa zvikuru.

8 “Nokuti ndangariro dzangu hadzizi ndangariro  
 dzenyu,  
 uye nzira dzenyu hadzizi nzira dzangu,”  
 ndizvo zvinotaura Jehovha.

9 “Sokukwirira kwakaita matenga kupfuura  
 nyika,  
 saizvozvo nzira dzangu dzakakwirira  
 kupinda dzenyu,  
 nendangariro dzangu kupfuura ndangariro  
 dzenyu.

10 Sezvinoita mvura nechando  
 zvinoburuka kubva kudenga,  
 zvisingadzokeriko  
 zvisina kudiridza nyika  
 nokuita kuti ibukire uye ibereke zvakawanda,  
 kuitira kuti iberekere mudyari wembeu, uye  
 ipe chingwa kune anodya,

11 saizvozvo neshoko rangu rinobuda mu-  
 muromo mangu:  
 Haringadzokeri kwandiri risina chinhu,  
 asi richaita zvinondifadza,  
 uye richaita zvandakarituma.

12 Muchabuda nomufaro,  
 uye muchafambiswa murugare;  
 makomo nezvikomo zvichapururudza  
 uye zvichaimba rwiyo pamberi penyu,  
 uye miti yose yeminda

ichauchira maoko ayo.

<sup>13</sup> Pachinzvimbo chomunzwa pachamera muti womupaini,  
pachinzvimbo chorukato pachamera mumite.

Izvi zvichava mukurumbira waJehovha,  
nechiratidzo chokusingaperi,  
chisingazoparadzwi.”

## 56

### *Ruponeso rwaVamwe*

<sup>1</sup> Zvanzi naJehovha:  
“Chengetedzai kururamisira mugoitani zvakanaka,  
nokuti ruponeso rwangu rwava pedyo,  
uye kururama kwangu kuchakurumidza kuratidzwa.  
<sup>2</sup> Akaropafadzwa munhu anoita izvi,  
munhu anozvibatisisa,  
anochengeta Sabata asingarivibisi,  
uye anodzivisa ruoko rwake kuita chinhu chakaipa.”

<sup>3</sup> Mutorwa akanamatira kuna Jehovha ngaarege kuti,  
“Zvirokwazvo Jehovha achandiparadzanisa navanhu vake.”

Uye nomuyunaki ngaarege kugununa achiti,  
“Ndinongova zvangu muti wakaoma.”

<sup>4</sup> Nokuti zvanzi naJehovha:  
“Kuvayunaki vanochengeta maSabata angu,  
vanosarudza zvinondifadza,  
uye vanobatirira pasungano yangu,

5 kwavari ndichapa, mukati metemberi yangu  
 namasvingo ayo,  
 chirangaridzo nezita riri nani kupfuura  
 vanakomana navanasikana;  
 ndichavapa zita risingaperi, risinga-  
 zoparadzwi.

6 Uye vatorwa vakazvipira kuna Jehovha  
 kuti vamushumire,  
 kuti vade zita raJehovha,  
 uye vamunamate,  
 vose vanochengeta Sabata  
 vasingarisvibisi vachibatisisa sungano  
 yangu,

7 ivava ndichavauyisa kugomo rangu dzvene  
 ndigovapa mufaro muimba yangu yokun-  
 yengerera.

Zvipiriso zvavo zvinopiswa  
 nezvibayiro zvichagamuchirwa paaritari  
 yangu;  
 nokuti imba yangu ichanzi  
 imba yokunyengerera yendudzi dzose.”

8 Ishe Jehovha anoti,  
 iye anounganidza vakatapwa vaIsraeri,  
 “Ndichaunganidzazve vamwe kwavari,  
 tisingaverengeri avo vakaunganidzwa  
 kare.”

*Mwari anopa mhosva kuna Vakaiipa*

9 Uyai, imi mose zvikara zvesango,  
 uyai mudye, imi mose zvikara zvesango!

10 Nharirire dzeIsraeri mapofu,  
 vose vanoshayiwa zivo;  
 vose imbwa dzisingahukuri,  
 hadzigoni kuhukura;

dzinovata pose pose dzichingorota,  
dzinofarira kuvata.

11 Imbwa dzinokara zvikuru;  
dzisingamboguti.

Vafudzi vanoshayiwa kunzwisisa:  
vose vanotsaukira kunzira yavo pachavo,  
mumwe nomumwe anotsvaka zvinomupfu-  
misa.

12 Mumwe nomumwe anodanidzira achiti, “Uyai,  
regai nditore waini!

Regai tinwe tigute nedoro!

Uye mangwana achafanana nanhasi,  
kana kutopfuura.”

## 57

1 Vakarurama vanoparara,  
uye hakuna anofunga izvi mumwoyo make;

vanhu vanoda Mwari vanobviswa,  
uye hakuna anonzwisisa

kuti vakarurama vanobviswa  
kuti vanunurwe kubva pane zvakaipa.

2 Vose vanofamba mukururama  
vanopinda murugare,

vanowana zororo pavanovata murufu.

3 “Asi imi, uyai pano, imi vanakomana vomuroyi,  
imi chibereko chemhombwe nezvifeve!

4 Muri kuseka aniko?

Ndiani wamunohomera

uye wamunobudisira rurimi rwenyu?

Ko, hamusi chibereko chemhandu here,  
nechizvarwa chavanoreva nhema?

5 Munotsva noruchiva pakati pemitu

yemuouki napasi pomuti mumwe  
nomumwe wakapfumvutira;

munobayira vana venyu mumipata  
napasi pamapazi akarembera.

<sup>6</sup> Zvifananidzo zviri pakati pamatombo  
anotsvedzerera emipata ndiwo mugove  
wenyu;

izvozvo, ndiwo mugove wenyu.

Hongu, wakadururira chipiriso chokunwa  
kwazviri,

uye ukapa chipiriso chezviyo.

Ko, ini muchagona kundiripira zvinhu izvi  
here?

<sup>7</sup> Wakawaridza nhoo pakakwirira napachikomo  
chirefu;

ikoko wakakwira kundobayira zvibayiro.

<sup>8</sup> Seri kwamakonhi ako nezvivivo zvako  
wakaisa chirangaridzo chamwari vako.

Uchindisiya ini, wakafukura mubhedha wako,  
wakakwira pauri ukaushamisa kwazvo;

wakaita sungano naavo vane mibhedha yaun-  
oda,

uye wakatarisa kusasimira kwavo.

<sup>9</sup> Wakaenda kuna Moreki namafuta  
omuorivhi ukawedzera zvinonhuhwira  
zvako.

Wakatumira nhume dzako kure;

wakaburukira kuguva chaiko!

<sup>10</sup> Wakaneteswa nenzira dzako dzose,  
asi hauna kumboti, 'Hazvina maturo.'

Wakawana kuvandudzwa kwesimba rako,  
nokudaro hauna kuziya.

<sup>11</sup> “Ndianiko wawakatya uye ukavhunduka  
zvokuti wakazoreva nhema kwandiri,  
uye hauna kumbondirangarira



kana kumbozvifunga izvi mumwoyo mako?  
Hakuzi kuti ndakaramba ndakanyarara  
iwe ukasanditya here?

<sup>12</sup> Ndichaisa pachena kururama kwako nam-  
abasa ako,  
uye hazvizombokubatsiri.

<sup>13</sup> Paunochemera rubatsiro,  
zvifananidzo zvawakaunganidza ngazviku-  
batsire!

Mhepo ichazvikukura zvole,  
mweya wokungofema zvawo uchazvifu-  
ridzira kure.

Asi munhu anondiita utiziro hwake  
achagara nhaka yenyika,  
uye gomo rangu dzvene richava rake.”

*Kunyaradzwa kwaVane Mwoyo Yakapwanyika*

<sup>14</sup> Uye zvichazonzi:

“Vakai, vakai, gadzirai mugwagwa!  
Bvisai zvipinganidzo munzira yavanhu  
vangu.”

<sup>15</sup> Nokuti zvanzi naIye akakwirira ari kumusoro,  
iye anorarama nokusingaperi, ane zita  
dzvene:

“Ndinogara pakakwirira panzvimbo tsvene,  
asi naiyewo ane mweya wapakwanyika uye  
anozvininipisa,

kuti ndimutsiridze mweya yavanozvininipisa  
uye ndimutsiridze mwoyo yavakapwanyika.

<sup>16</sup> Handichapi mhosva nokusingaperi,  
kana kugara ndakatsamwa,  
nokuti ipapo mweya yavanhu ingaziya pamberi  
pangu,  
kufema kwomunhu wandakasika.

- 17 Ndakatsamwiswa nechivi chake chokukara;  
ndakamuranga, ndikavanza chiso changu  
mukutsamwa kwangu,  
asi akaramba ari munzira dzaaida.
- 18 Ndakaona nzira dzake,  
asi ndichamuporesa; ndichamutungamirira  
uye ndichamunyaradza,  
19 ndichisika rumbidzo pamiromo  
yavanochema muIsraeri.
- Rugare, rugare kuna vari kure navari pedyo,”  
ndizvo zvinotaura Jehovha. “Uye ndichava-  
poresa.”
- 20 Asi vakaipa vakafanana negungwa rinozun-  
gunuka,  
risingagoni kuzorora,  
rina mafungu anorasa marara namatope.
- 21 Mwari wangu anoti, “Vakaipa havana rugare.”

## 58

### *Kutsanya kwechokwadi*

- 1 “Danidzira nesimba, usanyarara.  
Simudza inzwi rako sehوامanda.  
Paridzira vanhu vangu kupanduka kwavo,  
neimba yaJakobho zvivi zvavo.
- 2 Nokuti zuva nezuva vanonditsvaka;  
vanoita savane chido chokuziva nzira  
dzangu,  
kunge vanga vari rudzi runoita zvakanaka  
uye rusina kusiya mirayiro yaMwari wavo.  
Vanondikumbira kutonga kwakarurama  
sokunge vanofarira kuti Mwari auye pedyo  
navo.
- 3 Vanoti, ‘Takatsanyireiko,

uye imi mukasazviona?  
 Takazvininipisireiko,  
 imi mukasazviona?’

“Asi pazuva rokutsanya kwenyu munoita zva-  
 munoda  
 muchimanikidza vashandi venyu.

4 Kutsanya kwenyu kunogumisira  
 mukukakavadzana nemhirizhonga,  
 uye kurovana netsiva dzakaipisisa.

Hamungatsanyi sezvamunoita mazuva ano,  
 mugotaraisira kuti inzwi renyu richanzwika  
 kumusoro.

5 Ko, ndiko here kutsanya kwandakasarudza,  
 zuva rimwe chete rokuti munhu  
 azvininipise?

Ndezvokukotamisa musoro chete sورشanga  
 here,  
 nokungovata pamusoro penguo dzamasaga  
 namadota?

Ndiko kwamunoti kutsanya here,  
 pazuva rinodikanwa naJehovha?

6 “Uku handiko kutsanya kwandakasarudza  
 here:

Kusunungura ngetani dzokusaruramisira  
 nokusunungura zvitirobho zvejoko,  
 kusunungura vakamanikidzwa  
 nokuvhuna joko rimwe nerimwe?

7 Hakuzi kugoverana zvokudya zvako nevane  
 nzara,  
 nokupa varombo vanodzungaira pokugara  
 here,  
 paunoona vakashama, kuvapfekedza,

uye kusafuratira venyama neropa rako?

<sup>8</sup> Ipapo chiedza chako chichabuda samambakwedza,  
uye kuporeswa kwako kucharatidzwa nokukurumidza;

ipapo kururama kwako kuchakutungamirira,  
uye kubwinya kwaJehovha kuchakurinda mumashure.

<sup>9</sup> Ipapo uchadana, Jehovha achakupindura;  
uchadanidzira uchida rubatsiro, uye iye ahati: Ndiri pano.

“Kana ukabvisa joko roudzvinyiriri,  
kutendeka nomunwe nokutaura kwakaipa,

<sup>10</sup> uye ukapa zvokudya zvako kune vane nzara  
uye ukagutsa vakamanikidzwa pakushaya kwavo,

ipapo chiedza chako chichabuda murima,  
uye usiku hwako huchashanduka hukafanana namasikati.

<sup>11</sup> Jehovha achakutungamirira nguva dzose;  
achakugutsa pakushaya kwako munyika yakapiswa nezuva  
uye achasimbisa mapfupa ako.

Uchafanana nebindu rinodiridzwa nemvura yet-sime,  
sechitubu chine mvura isingapwi.

<sup>12</sup> Vanhu vako vachavakazve matongo akare  
vachasimudza nheyo dzakare;

iwe uchanzi Mugadziri waMasvingo Akakoromoka,  
Muvandudzi weMigwagwa ine Dzimba.

- 13 “Kana ukachengeta tsoka dzako kuti dzisaputsa Sabata,  
 uye kuti dzisaita zvinokufadza iwe pazuva rangu dzvene,  
 kana ukati Sabata izuva rinofadza,  
 uye ukati zuva dzvene raJehovha izuva rinokudzwa,  
 uye kana ukarikudza nokusafamba munzira yako,  
 uye usingaiti zvinokufadza kana kutaura mashoko asina maturo,  
 14 ipapo uchawana mufaro wako muna Jehovha,  
 uye ndichakuita kuti ukwire pakakwirira penyika,  
 uye ndichakugutsa nenhaka yababa vako Jakobho.”

Muromo waJehovha wazvitaure.

## 59

### *Chivi, Kureurura, neDzikinuro*

- 1 Zvirokwazvo ruoko rwaJehovha haruna kupfupika kuti rukonewe kuponesa,  
 uye nzeve yake haina kudzivira kuti irege kunzwa.  
 2 Asi zvakaipa zvenyu zvakakuparadzanisai naMwari wenyu;  
 zvivi zvenyu zvakavanza chiso chake kwamuri kuti arege kunzwa.  
 3 Nokuti maoko enyu akasvibiswa neropa,  
 minwe yenyu nezvakaipa.  
 Miromo yenyu yakareva nhema,  
 rurimi rwenyu runonguruma zvinhu zvakaipa.

- 4 Hapana anochemera kururamisira;  
hapana anokwidza mhaka yake nokuten-  
deka.  
Vanongovimba negakava risina maturo uye  
nokureva nhema;  
vanoita mimba yezvakashata uye  
vanobereka zvakaipa.
- 5 Vanochochonya mazai emvumbi,  
uye vanoruka dandira redandemutande.  
Ani naani anodya mazai avo achafa,  
uye rimwe rikaputsika, panochochonywa  
nyoka.
- 6 Matandira avo haabatsiri pakupfeka;  
havagoni kuzvifukidza nezvavanogadzira.  
Mabasa avo mabasa akaipa,  
uye kuita nechisimba kuri mumaoko avo.
- 7 Tsoka dzavo dzinomhanyira kundopinda  
muchivi;  
vanokurumidza kuteura ropa risina  
mhosva.  
Mirangariro yavo mirangariro yakaipa;  
kuputsa nokuparadza zviru munzira dzavo.
- 8 Nzira yorugare havaizivi;  
hapana kururamisira pamakwara avo.  
Vakashandura nzira dzavo dzikava dzakami-  
nama;  
hakuna anofamba madziri achaziva rugare.
- 9 Naizvozvo kururamisira kuri kure nesu,  
uye kururama hakusviki kwatiri.  
Tinotsvaka chiedza, asi zvose irima;  
tinotsvaka kujeka, asi tiri kufamba mu-  
mumvuri werima.
- 10 Sebofu tinotsvanzvadzira tichitevedza  
madziro,

tichitsvaka nzira yedu savanhu vasina meso.  
 Panguva yamasikati tinogumburwa kunge  
 nguva yorubvunzavaeni;  
 pakati pavane simba, tangoita savakafa.

11 Tose tiri kuomba samapere;  
 tinorira nokurira kukuru senjiva.  
 Tinotsvaka kururamisira, asi hatikuwani;  
 tinotsvaka kurwirwa, asi kuri kure kure.

12 Nokuti kutadza kwedu kwawanda pamberi  
 penyu,  
 uye zvivi zvedu zvinotipupurira zvakaipa.

Kudarika kwedu kunogara nesu,  
 uye tinobvuma kutadza kwedu:

13 kumukira nokunyengera Jehovha,  
 kufuratira Mwari wedu,  
 kukuchidzira udzvinyiriri nokupanduka,  
 nokutaura mashoko enhema anobva mum-  
 woyo yedu.

14 Naizvozvo kururamisirwa kwadzorerwa  
 shure,  
 uye kururama kwamira kure;  
 chokwadi chakagumburwa munzira dzomu-  
 musha,  
 kutendeka hakuchagoni kupinda.

15 Zvokwadi haichawanikwi  
 uye vanovenga zvakaipa ndivo vopambwa.

Jhovha akatarisa akasafara  
 kuti pakanga pasisina kururamisira.

16 Akaona kuti pakanga pasina munhu,  
 akashamiswa kuti pakanga pasina munhu  
 aipindira;

naizvozvo ruoko rwake rwakamuvigira  
ruponeso,

uye kururama kwake kwakamuraramisa.

17 Akashonga kururama sechidzitiro chechip-  
fuva,

nenguwani yoruponeso mumusoro make;  
akashonga nguo dzokutsiva akazviputira  
mukushingaira kwake seanozviputira nejasi.

18 Sezvakaita, saizvozvo acharipira  
hasha

kuvavengi vake

nokutsiva kuvadzivisi vake;  
acharipira zvakafanira kuzviwi.

19 Kubva kumavirira, vanhu vachatya Jehovha,  
uye kubva pakubuda kwezuva, vachakudza  
kubwinya kwake.

Nokuti achauya sokudira kworwizi  
runosundwa nokufema kwaJhovha.

20 “Mudzikinuri achauya kuZioni,  
kuna avo vari muna Jakobho vanotendeuka  
pazvivi zvavo,”

ndizvo zvinotaura Jehovha.

21 “Kana ndirini, iyi ndiyo sungano yangu  
navo,” ndizvo zvinotaura Jehovha. “Mweya  
wangu uri pamusoro pako, namashoko angu  
andakaisa mumuromo mako hazvichabvi pa-  
muromo wako, kana pamiromo yavana venyu,  
kana pamiromo yezvizvarwa zvavo kubva zvino  
nokusingaperi,” ndizvo zvinotaura Jehovha.

## 60

*Kubwinya kweZioni*



- 1 “Simuka, upenye nokuti chiedza chako chasvika,  
uye kubwinya kwaJehovha kwabuda pamusoro pako.
- 2 Tarira, rima rakafukidza nyika  
uye rima guru riri pamusoro pavanhu,  
asi Jehovha anobuda pamusoro pako  
uye kubwinya kwake kunoratidzwa pamusoro pako.
- 3 Ndudzi dzichauya kuchiedza chako,  
uye madzimambo kukubwinya kwamambakwedza ako.
- 4 “Simudza meso ako utarise zvakakukomberedza:  
vose vanoungana uye vanouya kwauri,  
vanakomana vako vanobva kure,  
uye vanasikana vako vanotakurwa pamaoko.
- 5 Ipapo ucharisa ugopenya,  
mwoyo wako uchakwata uye uchazara nomufaro;  
upfumi huri pamusoro pamakungwa huchauyiswa kwauri,  
pfuma yendudzi ichauya kwauri.
- 6 Mapoka engamera achazadza nyika yako,  
mhuru dzengamera dzeMidhiani neEfa.  
Uye vose vanobva kuShebha vachauya,  
vakatakura goridhe nezvinonhuhwira  
vachiparidza kurumbidzwa kwaJehovha.
- 7 Mapoka eKedhari achaunganidzirwa kwauri makondobwe eNebhayoti achakushumira:  
achagamuchirwa sezvipo paaritari yangu,

uye ndichashongedza temberi yangu  
yokukudzwa.

<sup>8</sup> “Ndivanaani ava vanobhururuka samakore,  
senjiva dzinoenda kumatendere adzo?

<sup>9</sup> Zvirokwazvo zwiwi zvinotarira kwandiri;  
zvikepe zveTashishi zvinotungamira  
zvichiuya navanakomana venyu vari kubva  
kure,  
nesirivha yavo negoridhe,  
kuzokudza Jehovha Mwari wako,  
iye Mutsvene waIsraeri,  
nokuti akakushongedza nokubwinya.

<sup>10</sup> “Vatorwa vachavakazve masvingo ako,  
uye madzimambo avo achakushandira.  
Kunyange ndakakurova mukutsamwa kwangu,  
munyasha dzangu ndichakunzwira tsitsi.

<sup>11</sup> Masuo ako achagara akashama  
haachazombozarirwi, masikati kana usiku  
kuitira kuti vanhu vakuvigire upfumi hwen-  
dudzi,  
madzimambo adzo achafambiswa ari mu-  
mudungwe akundwa.

<sup>12</sup> Nokuti rudzi kana ushe husingakushumiri  
huchaparadzwa;  
huchaparadzwa zvachose.

<sup>13</sup> “Kubwinya kweRebhanoni kuchauya kwauri,  
mipaini nemifiri nemisipuresi pamwe chete,  
kuzoshongedza nzvimbo yetemberi yangu  
tsvene;

uye ndichabwinyisa nzvimbo yetsoka  
dzangu.

14 Vanakomana vavamanikidzi venyu  
vachauya vachikotama pamberi penyu;  
vose vanokuzvidzai vachapfugama patsoka  
dzenyu uye vachakutumidzai kuti Guta  
raJehovha,  
Zioni roMutsvene waIsraeri.

15 “Kunyangwe wanga wasiyiwa uye uchivengwa,  
pasina munhu anopfuura nemauri,  
ndichakuita kuti ukudzwe nokusingaperi  
uye uve mufaro wezvizvarwa zvinotevera.

16 Uchanwa mukaka wendudzi  
uye ucharerwa pamazamu oumambo.  
Ipapo uchaziva kuti ini, iyeni Jehovha, ndini  
Muponesi wako,  
Mudzikinuri wako, Wamasimba Ose wa-  
Jakobho.

17 Ndichakuvigira goridhe pachinzvimbo chen-  
darira,  
nesirivha pachinzvimbo chesimbi.  
Ndichakuvigira ndarira pachinzvimbo  
chamatanda,  
nesimbi pachinzvimbo chamabwe.

Ndichaita rugare mubati wako  
nekururama mutongi wako.

18 Kuita nechisimba hakuchazonzwikwa mun-  
yika yako,  
kana dongo kana kuparadzwa mukati memi-  
ganhu yako,  
asi uchatumidza masvingo ako zita

- rokuti Ruponeso nemasuo ako kuti  
Rumbidzo.
- 19 Zuva harichazovi chiedza chako masikati,  
uye kupenya kwomwedzi hakungavi pamu-  
soro pako,  
nokuti Jehovha ndiye achava chiedza chako  
chisingaperi,  
uye Mwari wako achava kubwinya kwako.
- 20 Zuva rako harichazovirizve,  
uye mwedzi wako hauchazoperizve;  
Jhovha achava chiedza chako chisingaperi,  
uye mazuva okuchema kwako achaguma.
- 21 Ipapo vanhu vako vose vachava vakarurama,  
uye vachatora nyika kuti ive yavo nokusin-  
gaperi.
- Ndivo mabukira andakadyara,  
basa ramaoko angu,  
kuti ndiratidze kubwinya kwangu.
- 22 Mudikisa wako achava chiuru,  
mudiki achava rudzi rune simba.  
Ndini Jehovha,  
munguva yacho ndichazviita nokukuru-  
midza.”

## 61

### *Gore reNyasha dzaJhovha*

- 1 Mweya waIshe Jehovha uri pamusoro pangu,  
nokuti Jehovha akandizodza  
kuti ndiparidze vhangeri kuvarombo.  
Akandituma kuti ndirape vane mwoyo yakaput-  
sika,  
kuti ndiparidze kusunungurwa kwavakat-  
apwa,

- nokubudiswa kwavasungwa kuti vabve  
 murima,  
<sup>2</sup> kuti ndiparidze gore rengoni dzaJehovha  
 uye nezuva rokutsiva kwaMwari wedu,  
 kuti ndinyaradze vose vanochemama,  
<sup>3</sup> uye ndiritire avo vanochemama muZioni,  
 kuti ndiise pamusoro pavo korona yorunako  
 pachinzvimbo chamadota,  
 mafuta omufaro  
 pachinzvimbo chokuchema,  
 uye nenguu yokurumbidza  
 pachinzvimbo chomweya wakarukutika.  
 Vachanzi miouki yokururama,  
 yakasimwa naJehovha  
 kuti aratidze kubwinya kwake.
- <sup>4</sup> Vachavakazve matongo akare  
 uye vachamutsazve nzvimbo dzaka-  
 paradzwa kare;  
 vachavandudza matongo amaguta  
 akaparadzwa kwezvizvarwa nezvizvarwa  
 zvakapfuura.
- <sup>5</sup> Vatorwa vachafudza mapoka amakwai enyu;  
 vatorwa vachashanda muminda yenyu no-  
 muminda yenyu yemizambiringa.
- <sup>6</sup> Ipapo imi muchanzi vaprista vaJehovha,  
 muchanzi vashumiri vaMwari.  
 Muchadya pfuma yendudzi,  
 uye muchazvirumbidza nepfuma yavo.
- <sup>7</sup> Pachinzvimbo chokunyadziiswa kwavo  
 vanhu vangu vachagamuchira migove  
 miviri,

uye pachinzvimbo chokunyadziwa vachafara  
 munhaka yavo;  
 nokudaro vachagara nhaka yemigove miviri  
 munyika yavo,  
 uye mufaro usingaperi uchava wavo.

<sup>8</sup> “Nokuti ini, Jehovha, ndinoda kururamisira;  
 ndinovenga kupamba nezvakaipa.  
 Mukutendeka kwangu, ndichavapa mubayiro  
 uye ndichaita sungano isingaperi navo.

<sup>9</sup> Zvizvarwa zvavo zvichazivikanwa pakati pen-  
 dudzi  
 uye navana vavo pakati pamarudzi.  
 Vose vanovaona vachaziva  
 kuti vanhu vakaropafadzwa naJehovha.”

<sup>10</sup> Ndinofara zvikuru muna Jehovha;  
 mweya wangu unofara muna Mwari.  
 Nokuti akandifukidza nengu dzoruponeso,  
 uye akandishongedza nengu yokururama,  
 sechikomba chinoshongedza musoro wacho  
 somuprista,  
 uye somwenga anozvishongedza nezvis-  
 hongo zvatombo anokosha.

<sup>11</sup> Nokuti ivhu sezvarinomeresa mbeu,  
 nebindu richiita kuti mbeu dzikure,  
 saizvozvo Ishe Jehovha achaita kuti kururama  
 nerumbidzo  
 zvimere pamberi pendudzi dzose.

## 62

### *Zita idzva reZioni*

<sup>1</sup> Nokuda kweZioni handinganyarari,

nokuda kweJerusarema handingarambi  
 ndinyerere,  
 kusvikira kururama kwake kwapenya samam-  
 bakwedza,  
 noruponeso rwake somwenje unopfuta.

<sup>2</sup> Ndudzi dzichaona kururama kwako,  
 uye madzimambo ose achaona kubwinya  
 kwako;  
 iwe uchadaidzwa nezita idzva  
 richataurwa nomuromo waJehovha.

<sup>3</sup> Uchava korona yokubwinya muruoko rwaJe-  
 hovha,  
 ukomba hwoumambo muruoko rwaMwari  
 wako.

<sup>4</sup> Havachazokutizve Musiyiwa,  
 kana kutumidza nyika yako kuti Dongo.  
 Asi uchatumidzwa kuti Hefizibha  
 uye nyika yako ichanzi Bhiyura;  
 nokuti Jehovha achakufarira,  
 uye nyika yako icharoorwa.

<sup>5</sup> Sejaya zvarinowana mhandara,  
 saizvozvo vanakomana vako vachakuwana;  
 sechikomba chinofarira mwenga,  
 saizvozvo Mwari wako achafara pamusoro  
 pako.

<sup>6</sup> Ndakagadza nharirire pamasvingo ako, iwe  
 Jerusarema;  
 havangambonyarari masikati kana usiku.  
 Imi munodana kuna Jehovha,  
 musazorora,

<sup>7</sup> uye musamupa zororo kusvikira asimbisa  
 Jerusarema,  
 uye ariita rumbidzo yenyika.

- 8 Jehovha akapika noruoko rwake rworudyi,  
 noruoko rwake rune simba achiti,  
 “Handichazopizve zviyo zvenyu sezvokudya  
 kuvavengi venyu,  
 uye vatorwa havachazonwizve waini itsva  
 yamakatamburira;  
 9 asi ivo vanokohwa ndivo vachadya  
 uye vacharumbidza Jehovha,  
 uyewo vaya vanounganidza mazimbiringa ndivo  
 vachainwa  
 mumavazhe eimba yangu tsvene.”

- 10 Pfuurai, pfuurai napamasuo!  
 Gadzirirai vanhu nzira.  
 Vakai, vakai mugwagwa mukuru!  
 Bvisai mabwe.  
 Simudzirai ndudzi mureza.

- 11 Jehovha akaparidzira kumagumo enyika  
 achiti, “Uti kuMwanasikana weZioni,  
 ‘Tarira, Muponesi wako ouya! Tarira,  
 mubayiro wake anawo, uye kuripira  
 kwake kunomutevera.’”  
 12 Vachanzi Vanhu Vatsvene, Vakadzikinurwa  
 vaJehovha; uye iwe uchanzi Mutsvakwa,  
 iro Guta Risina Kuzova Dongo.

## 63

### *Zuva raMwari roKutsiva noKudzikinura*

- 1 Ndianiko uyu anobva kuEdhomu,  
 anobva kuBhozira, ane nguo dzakatsvuka  
 seropa?  
 Ndianiko uyu, akafuka zvinobwinya,  
 anofamba muukuru hwesimba rake?



“Ndini ndinotaura nokururama,  
ndine simba rokuponesa.”

<sup>2</sup> Seiko nguo dzenyu dzakatsvuka  
sedzomunhu anotsika chisviniro chewaini?

<sup>3</sup> “Ndakatsika chisviniro chewaini ndoga;  
kubva kundudzi dzose hapana akanga  
aneni.

Ndakavatsika-tsika mukutsamwa kwangu  
uye ndakavapwanyira pasi muhasha  
dzangu;

ropa ravo rikatsatikira panguo dzangu,  
ndikasvibisa nguo dzangu dzose.

<sup>4</sup> Nokuti zuva rokutsiva rakanga riri mumwoyo  
mangu,  
uye gore rokudzikinura kwangu rasvika.

<sup>5</sup> Ndakatarisa, asi pakanga pasina angabatsira,  
ndakashamiswa nokuti hapana akatsigira;  
naizvozvo ruoko rwangu rwakandivigira  
ruponeso,  
uye hasha dzangu dzakanditsigira.

<sup>6</sup> Ndakatsika-tsika ndudzi mukutsamwa kwangu;  
muhasha dzangu ndakaita kuti vadhakwe  
uye ndakadurura ropa ravo pasi.”

*Kurumbidza noKunyengerera*

<sup>7</sup> Ndichataura nezvounyoro hwaJehovha,  
iwo mabasa aanofanira kukudzwa nawo,  
nokuda kwezvose zvatakaitirwa naJehovha,  
hongu, izvo zvinhu zvizhinji zvaakaitira  
imba yaIsraeri,  
nokuda kwetsitsi dzake uye nengoni dzake  
zhinji.

- 8 Akati, “Zvirokwazvo ndivo vanhu vangu,  
ivo vanakomana vasingazovi venhema  
kwandiri,”  
naizvozvo akava Muponesi wavo.
- 9 Mumatambudziko avo ose naiyewo akatambudzika,  
uye mutumwa wokuvapo kwake  
akavaponesa.  
Murudo rwake nengoni akavadzikinura;  
akavasimudza uye akavatakura  
mumazuva ose akare.
- 10 Asi vakamumukira  
vakachemedza Mweya wake Mutsvene.  
Saka akashanduka akava muvengi wavo,  
uye iye amene akarwa navo.
- 11 Ipapo vanhu vake vakarangerira mazuva  
akare,  
mazuva aMozisi navanhu vake, vakati,  
aripiko akavayambutsa gungwa,  
nomufudzi wamakwai ake?  
Aripiko akaisa  
Mweya wake Mutsvene pakati pavo,
- 12 iye akavatumira ruoko rwake rwokukudzwa  
nesimba  
kuti ruve paruoko rworudyi rwaMozisi,  
iye akaparadzanisa mvura pamberi pavo,  
kuti azviwanire mukurumbira usingaperi,
- 13 iye akavatungamirira nomakadzika?  
Sebhiza murenje, havana kugumburwa;
- 14 semombe dzinoburukira kubani,  
vakapiwa zororo noMweya waJehovha.  
Ndiwo matungamiriro amakaita vanhu venyu  
kuti muzviitire zita rine mukurumbira.

- 15 Tarirai pasi muri kudenga uye muone,  
 kubva pachigaro chenyu chakakwirira  
 chitsvene uye chinobwinya.  
 Kushingaira kwenyu nesimba renyu zviripiko?  
 Unyoro hwenyu netsitsi dzenyu zvakab-  
 viswa kwatiri.
- 16 Asi muri Baba vedu,  
 kunyange Abhurahama asingatizivi  
 kana naIsraeri asingatiziviwo;  
 imi, Jehovha, ndimi Baba vedu,  
 Mudzikinuri wedu kubva kare ndiro zita  
 renyu.
- 17 Haiwa Jehovha, munotiregereiko tichidzun-  
 gaira, kubva panzira dzenyu  
 muchiomesa mwoyo yedu kuti tirege  
 kukutyai?
- Dzokai nokuda kwavaranda venyu,  
 iwo marudzi enhaka yenyu.
- 18 Kwenguva duku vanhu venyu vakatora  
 nzvimbo yenyu tsvene,  
 asi zvino vavengi vedu vakatsika-tsika  
 nzvimbo yenyu tsvene.
- 19 Isu tiri venyu kubva kare;  
 asi ivo hamuna kumboatonga,  
 havana kumbodaidzwa nezita renyu.

## 64

- 1 Haiwa, dai maibvarura matenga mukaburuka  
 pasi,  
 kuti makomo adedere pamberi penyui!
- 2 Sezvinoita moto paunopisa tsotso  
 uchiita kuti mvura ivire,

- burukai muzoita kuti zita renyu rizivikanwe  
kuvavengi venyu,  
uye multe kuti ndudzi dzidedere pamberi  
penyu!
- 3 Nokuti pamakaita zvinhu zvinotyisa  
zvatakanga tisina kutarisira,  
makaburuka pasi, makomo akabvunda pam-  
beri penyu.
- 4 Kubva panguva dzekare hakuna munhu  
akanzwa,  
hakuna nzeve yakanzwisisa,  
hakuna ziso rakaona mumwe Mwari kunze  
kwenyu,  
anobatsira avo vanomumirira.
- 5 Munouya kuzobatsira avo vanofarira kuita  
zvakarurama,  
vanorangarira nzira dzenyu.  
Asi patakaramba tichivatadzira,  
imi makatsamwa.  
Zvino tingaponeswa seiko?
- 6 Isu tose tafanana nousina kuchena,  
uye mabasa edu ose okururama afanana  
namamvemve enguo dzine tsvina;  
isu tose tinooma seshizha,  
semhepo zvivi zvedu zvinotitsvairira kure.
- 7 Hakuna anodana kuzita renyu  
kana anoshingairira kuti akubatei;  
nokuti makativanzira chiso chenyu mukaita  
kutitiperezeke nokuda kwezvivi zvedu.
- 8 Haiwa, Jehovha, kunyange zvakadaro muri  
Baba vedu.  
Isu tiri ivhu, imi muri muumbi;  
isu tose tiri basa ramaoko enyu.
- 9 Regai kutsamwa zvikuru imi Jehovha;

- regai kurangarira zvivi zvedu nokusin-  
gaperi.  
Haiwa Jehovha, ringirai kwatiri, tinokumbira,  
nokuti tose tiri vanhu venyu.
- <sup>10</sup> Maguta enyu matsvene ava renje;  
kunyange Zioni irenje, Jerusarema rava  
dongo.
- <sup>11</sup> Temberi yedu tsvene inobwinya, umo madz-  
ibaba edu akakurumbidzai,  
yakapiswa nomoto,  
uye nzvimbo dzose dzataikoshesa dza-  
parara.
- <sup>12</sup> Haiwa Jehovha, mushure maizvozvi  
mungazvidzorawo here?  
Mucharamba munyerere, uye mugotiranga  
zvinopfura mwero here?

## 65

### *Kutongwa noRuponeso*

- <sup>1</sup> “Ndakazviratidza kuna avo vasina kundib-  
vunza;  
ndakawanikwa neavo vasina kunditsvaka.  
Kurudzi rwakanga rusina kudana kuzita rangu  
ndakati, ‘Ndiri pano, ndiri pano.’”
- <sup>2</sup> Zuva rose ndakatambanudzira maoko angu  
kurudzi rwakasindimara,  
vanofamba munzira dzisina kunaka  
vachitevera zvavanofunga,
- <sup>3</sup> vanhu vanogara vachindigumbura  
ipo pamberi pangu chaipo,  
vachibayira zvibayiro pamapindu  
uye vachipisira zvinonhuhwira paaritari  
dzezvitinha;

<sup>4</sup> vanogara pakati pamarinda  
 uye vanopedza usiku hwavo  
 vachinyengetera vari munzira yakavanda:  
 vanodya nyama yenguruve,  
 uye hari dzavo dzine furo renyama  
 yakasvibiswa;

<sup>5</sup> vanoti, 'Gara kure; usaswedera pedyo neni,  
 nokuti ndiri mutsvene kupfuura iwe.'  
 Vanhu vakadaro utsi mumhuno dzangu,  
 moto unoramba uchipfuta zuva rose.

<sup>6</sup> "Tarirai, zvakanyorwa pamberi pangu zvinoti:  
 Handinganyarari asi ndicharipira  
 zvakazara;

ndichazviripa pamakumbo avo,  
<sup>7</sup> zvakaipa zvenyu nezvamadzibaba enyu,"  
 ndizvo zvinotaura Jehovha.

"Nokuti vakapisira zvibayiro pamusoro  
 pezvikomo,  
 ndichayera pamakumbo avo  
 muripo wakazara wamabasa avo akare."

<sup>8</sup> Zvanzi naJehovha:

"Sezvazvakangoita kana musvi uchiri  
 kuwanikwa musumbu ramazambiringa  
 uye vanhu vachiti, 'Musauparadza, muchine  
 zvakana ma mauli,'  
 saizvozvo ndizvo zvandichaitira varanda vangu;  
 handingavaparadzi vose.

<sup>9</sup> Ndichabudisa marudzi kuna Jakobho,  
 uye nokubva kuna Judha avo vachatora  
 makomo angu;  
 vasanangurwa vangu vachagara nhaka,  
 uye varanda vangu vachagara ikoko.

- 10 Sharoni richava mafuro amakwai,  
 uye Mupata weAkori uchava uvato hwe-  
 mombe  
 dzavanhu vangu vanonditsvaka.
- 11 “Asi kana murimi munosiya Jehovha  
 uye munokanganwa gomo rangu dzvene,  
 munowaridzira Rombo Rakanaka tafura,  
 uye munozadza zvirongo newaini yakavhen-  
 ganisirwa Magumo,
- 12 ndichakuendesai kumunondo,  
 uye mose muchakotamira pasi kuti  
 mubayiwe,  
 nokuti ndakadana asi hamuna kudavira,  
 ndakataura asi hamuna kuteerera.  
 Makaita zvakaipa pamberi pangu  
 mukasarudza zvisingandifadzi.”
- 13 Naizvozvo zvanzi naIshe Jehovha:  
 “Varanda vangu vachadya,  
 asi imi muchanzwa nzara;  
 varanda vangu vachanwa,  
 asi imi muchava nenyota;  
 varanda vangu vachafara,  
 asi imi muchanyadziswa.
- 14 Varanda vangu vachaimba zvichibva mumu-  
 faro wemwoyo yavo,  
 asi imi muchachema nokurwadziwa nem-  
 woyo  
 uye muchaungudza mukupwanyika kwom-  
 weya.
- 15 Muchasiyira zita renyu  
 kuvasanangurwa vangu sechituko;  
 Ishe Jehovha achakuurayai,

asi achapa varanda vake rimwe zita.

- 16 Ani naani achati nyika iropafadzwe  
achazviita naMwari wechokwadi;  
ani naani achaita mhiko munyika  
achapika naMwari wechokwadi.  
Nokuti matambudziko akare achakanganwikwa,  
uye achavanzirwa meso angu.

*Matenga Matsva neNyika Itsva*

- 17 “Tarirai, ndichasika  
matenga matsva nenyika itsva.  
Zvinhu zvakare hazvichazorangarirwi,  
kana kuuya mundangariro.
- 18 Asi farai mupembere nokusingaperi  
mune zvandichasika,  
nokuti ndichasika Jerusarema kuti rifadze  
uye kuti vanhu varo vave mufaro.
- 19 Ndichapembera pamusoro peJerusarema,  
uye ndichafarira vanhu vangu;  
maungira okuchema kana kurira  
haachazonzwikwazve imomo.
- 20 “Mariri hamungazovazve  
nomucheche achararama mazuva mashoma  
shoma,  
kana mutana asingasvitsi makore ake oku-  
rarama;  
uyo anofa ane zana ramakore  
achangotorwa somujaya;  
uyo anotadza kusvika pazana ramakore  
achatorwa sowakatukwa.
- 21 Vachavaka dzimba vagogara madziri;  
vachadyara mazambiringa vagodya michero  
yawo.



- 22 Havachazovakazve dzimba dzinozogarwa  
navamwe,  
kana kudyara vamwe vachizodya.  
Nokuti sezvakaita mazuva omuti,  
ndizvo zvichaita mazuva avanhu vangu;  
vasanangurwa vangu vachafara kwenguva refu  
mumabasa amaoko avo.
- 23 Havachazoshandira pasina  
kana kubereka vana vanoparadzwa;  
nokuti vachava vanhu vakaropafadzwa naJe-  
hovha,  
ivo nezvizvarwa zvavo.
- 24 Vasati vadana ndichavapindura;  
vachiri kutaura ndichavanzwa.
- 25 Bumhi negwayana zvichafura pamwe chete,  
uye shumba ichadya uswa senzombe,  
asi guruva richava chokudya chenyoka.  
Havachazokuvadza kana kuparadza  
pamusoro pegomo rangu dzvene rose,”  
ndizvo zvinotaura Jehovha.

## 66

### *Kutonga neTariro*

- <sup>1</sup> Zvanzi naJehovha:  
“Denga ndicho chigaro changu,  
uye nyika chitsiko chetsoka dzangu.  
Ko, iripi imba yamungandivakira?  
Nzvimbo yangu yokuzorora ichava kupiko?”
- <sup>2</sup> Haruzi ruoko rwangu rwakaita izvozvi zvose  
here,  
nokudaro zvikavapo?”  
ndizvo zvinotaura Jehovha.

“Munhu akadai ndiye wandichakudza:  
 iye anozvininipisa uye ane mweya wakap-  
 wanyika,  
 uye anodedera paanonzwa shoko rangu.

<sup>3</sup> Asi ani naani anobayira hando  
 akafanana nouyo anouraya munhu,  
 uye anobayira gwayana,  
 anofanana nouyo anovhuna mutsipa wem-  
 bwa;  
 ani naani anoita chipiriso chezviyo  
 anofanana nomunhu anopa ropa renguruve,  
 uye ani naani anopisira zvinonhuhwira zvoku-  
 rangaridza,  
 anofanana nounonamata chifananidzo.

Vakasarudza nzira dzavo,  
 uye mweya yavo inofarira zvinonyangadza  
 zvavo;

<sup>4</sup> naizvozvo neniwo ndichavasarudzira kuranga  
 kuchavaomera,  
 uye ndichauyisa pamusoro pavo izvo zva-  
 vanotyanya.

Nokuti pandakadana, hapana akapindura,  
 pandakataura, hapana akateerera.

Vakaita zvakaipa pamberi pangu  
 vakasarudza zvisingandifadzi.”

<sup>5</sup> Inzwai shoko raJehovha,  
 imi munodedera pamunonzwa shoko rake:  
 “Hama dzenyu dzinokuvengai,  
 uye dzinokutsaurai nokuda kwezita rangu,  
 dzakati,  
 ‘Jehovha ngaaratidze kukudzwa kwake,  
 kuti tione mufaro wenyu!’  
 Asi ivo vachanyadziswa.

6 Inzwi maungira ebope anobva muguta,  
inzwi mheremhere inobva mutemberi!  
Ndiwo maungira aJehovha  
achiripira vavengi vake zvose zvakavakodzera.

7 “Asati arwadziwa nemimba,  
anosununguka;  
kurwadza kusati kwauya pamusoro pake,  
anosununguka mwanakomana.

8 Ndiani akambonzwa chinhu chakadai?  
Ndiani akamboona zvinhu zvakadai?  
Ko, nyika ingazvarwa pazuva rimwe here  
kana rudzi rungazvarwa pakarepo here?  
Kunyange zvakadaro, Zioni rakangoti kurwadziwa,  
pakarepo ndokubereka vana varo.

9 Ndingasvitsa panguva yokubereka  
ndikasaberekesa here?” ndizvo zvinotaura  
Jehovha.

“Ko, ndinozarira chizvaro  
pandinoberekesa here?” ndizvo zvinotaura  
Mwari wenyu.

10 “Pemberai pamwe chete neJerusarema uye  
mufarisise nokuda kwaro,  
imi mose munorida;  
farisisai pamwe chete naro,  
imi mose munochema pamusoro paro.

11 Nokuti muchanwa mukaguta  
pamazamu ake anonyaradza;  
muchanwa zvikuru kwazvo  
uye muchafadzwa nezvakawanda zvake  
zvinopfachukira.”

12 Nokuti zvanzi naJehovha:

“Ndichawedzera rugare kwaari sorwizi,  
 uye upfumi hwendudzi sokudira  
 kworukova;  
 muchayamwa uye muchatakurwa paruoko  
 rwake,  
 uye muchavaraidzwa pamabvi ake.

13 Samai vanonyaradza mwana wavo,  
 saizvozvo ndichakunyaradzai;  
 uye muchanyaradzwa pamusoro  
 peJerusarema.”

14 Pamuchaona izvozvo, mwoyo wenyu ucha-  
 fara,  
 uye muchaita bumhudza sebundo;  
 ruoko rwaJehovha rucharatidzwa kuvaranda  
 vake,  
 asi hashu dzake dzicharatidzwa kuvavengi  
 vake.

15 Tarirai, Jehovha ari kuuya nomoto,  
 uye ngoro dzake dzakaita sechamupupuri;  
 achaburutsa kutsamwa kwake nehashu huru,  
 uye kutuka kwake nomurazvo womoto.

16 Nokuti nomoto uye nomunondo wake  
 Jehovha achatonga vanhu vose,  
 uye vazhinji vachava vaya vanourayiwa na-  
 Jehovha.

17 “Vaya vanozvinatsa nokuzvichenesa kuti  
 vaende mumapindu, vachitevera munhu ari  
 pakati paavo vanodya nyama yenguruve nem-  
 beva uye nezvimwe zvinhu zvinonyangadza,  
 magumo avo achava mamwe chete,” ndizvo  
 zvinotaura Jehovha.

18 “Nokuti ini nokuda kwamabasa avo nepfungwa dzavo, ndiri kuuya kuzounganidza marudzi ose nendimi dzose; vachauya uye vachaona kubwinya kwangu.

19 “Ndichaisa chiratidzo pakati pavo, uye ndichatumira vamwe vavakapunyuka kundudzi, kuTashishi, nokuvaRibhiya navaRidhia (vane mbiri yokuwembura uta), nokuTubhari nokuGirisi, nokuzviwi zviri kure zvisina kumbonzwa nezvembiri yangu kana kuona kubwinya kwangu. Vachaparidza kubwinya kwangu pakati pendudzi. <sup>20</sup> Uye vachauyisa hama dzenyu dzose, kubva kundudzi dzose, kugomo rangu dzvene muJerusarema, sechipo kuna Jehovha, pamusoro pamabhiza, nomungoro uye mungoro dzina matenga, napamanyurusi uye napangamera,” ndizvo zvinotaura Jehovha. “Vachazviuyisa, savaIsraeri vanouyisa zvipiriso zvavo zvezviyo, kutemberi yaJehovha mumidziyo yakacheneswa. <sup>21</sup> Ipapo ndichasarudza vamwe vavo kuti vave vaprista navaRevhi,” ndizvo zvinotaura Jehovha.

<sup>22</sup> “Nokuti sezvakaita matenga matsva nenyika itsva zvandinoita zvichazogara pamberi pangu,” ndizvo zvinotaura Jehovha, “saizvozvo zita renyu nezvizvarwa zvenyu zvichagara. <sup>23</sup> Kubva paKugara kwoMwedzi kusvikira kuno mumwe, uye kubva paSabata rimwe kusvikira kune rimwe, marudzi ose achauya kuzokotama pamberi pangu,” ndizvo zvinotaura Jehovha. <sup>24</sup> “Vachabudapo vachindotarira zvitunha zvaavo vaindimukira; honye yavo haizofi, moto

wavo haungadzimwi, uye vachasemesa vanhu  
vose.”

**Biblica® Bhaibheri Dzvene Rakasununguka  
MuChiShona Chanhasi 2017  
The Holy Bible in the Shona language of Zimbabwe:  
Biblica® Bhaibheri Dzvene Rakasununguka  
MuChiShona Chanhasi 2017**

copyright © 2017 Biblica, Inc.

Language: chiShona

Contributor: Biblica, Inc.

Biblica® Bhaibheri Dzvene Rakasununguka MuChiShona Chanhasi™

Kopakodzero © 2005, 2018 ne Biblica, Inc.

Biblica® Open Shona Contemporary Bible™

Copyright © 2005, 2018 by Biblica, Inc.

“Biblica” chiratidzo chekutengeserana chakanyoreswa mu United States uye chiratidzo chehofisi yeBiblica, Inc. Inoshandiswa zviripamutemo.

“Biblica” is a trademark registered in the United States Patent and Trademark Office by Biblica, Inc. Used with permission.

**Creative Commons License**

Iri basa rinowanikwa pasi peCreative Commons Attribution-ShareAlike 4.0 International License (CC BY-SA). Kuti utarise kopi yeiri rezinesi, shanyira <https://creativecommons.org/licenses/by-sa/4.0> kana kutumira tsamba kuCreative Commons, PO Box 1866, Mountain View, CA 94042, USA.

Biblica® chiratidzo chinozikanwa chakanyorwa neBiblica, Inc., uye kushandiswa kwechiratidzo cheBiblica® kunoda mvumo yakanyorwa yeBiblica, Inc. Pasi pemitemo ye rizinesi re CC BY-SA, unogona kuteedzera uye kugovera patsva basa iri risina kugadziridzwa bedzi kana uchichengetedza chiratidzo che Biblica®. Kana iwe ukachinja kopi kana kushandura iri basa, nokudaro uchigadzira rimwe basa, unofanira kubvisa chiratidzo cheBiblica®. Pabasa rakatorwa, unofanirwa kuratidza shanduko dzawakaita uye woratidza sezvinotevera: “Basa rekutanga reBiblica, Inc. rinowanikwa mahara pa [www.biblica.com](http://www.biblica.com) uye nepa [open.bible](http://open.bible).”

Cherechedzo yekopakodzero inofanirwa kuoneka pamusoro wenyaya kana peji rekopakodzero sezvinotevera:

Biblica® Bhaibheri Dzvene Rakasununguka MuChiShona Chanhasi™

Kopakodzero © 2005, 2018 ne Biblica, Inc.

cc

Biblica® Open Shona Contemporary Bible™

Copyright © 2005, 2018 by Biblica, Inc.

“Biblica” chiratidzo chekutengeserana chakanyoreswa mu United States uye chiratidzo chehofisi yeBiblica, Inc. Inoshandiswa zviripamutemo.

“Biblica” is a trademark registered in the United States Patent and Trademark Office by Biblica, Inc. Used with permission.

Unofanirwa zvakare kuita kuti basa rawachinja riwanikwe pasi pe rezinesi yakafanana (CC BY-SA).

Kana iwe uchida kuzivisa Biblica, Inc. maererano neshanduro yako yebasa iri, taura nesu pa <https://open.bible/contact-us>.

This work is made available under the Creative Commons Attribution-ShareAlike 4.0 International License (CC BY-SA). To view a copy of this license, visit <https://creativecommons.org/licenses/by-sa/4.0> or send a letter to Creative Commons, PO Box 1866, Mountain View, CA 94042, USA.

Biblica® is a trademark registered by Biblica, Inc., and use of the Biblica® trademark requires the written permission of Biblica, Inc. Under the terms of the CC BY-SA license, you may copy and redistribute this unmodified work as long as you keep the Biblica® trademark intact. If you modify a copy or translate this work, thereby creating a derivative work, you must remove the Biblica® trademark. On the derivative work, you must indicate what changes you have made and attribute the work as follows: “The original work by Biblica, Inc. is available for free at [www.biblica.com](http://www.biblica.com) and [open.bible](http://open.bible).”

Notice of copyright must appear on the title or copyright page of the work as follows:

Biblica® Bhaibheri Dzvene Rakasununguka MuChiShona Chanhasi™

Kopakodzero © 2005, 2018 ne Biblica, Inc.

Biblica® Open Shona Contemporary Bible™

Copyright © 2005, 2018 by Biblica, Inc.

“Biblica” chiratidzo chekutengeserana chakanyoreswa mu United States uye chiratidzo chehofisi yeBiblica, Inc. Inoshandiswa zviripamutemo.

“Biblica” is a trademark registered in the United States Patent and Trademark Office by Biblica, Inc. Used with permission.

You must also make your derivative work available under the same license (CC BY-SA).

If you would like to notify Biblica, Inc. regarding your translation of this work, please contact us at <https://open.bible/contact-us>.



This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

---

PDF generated using Haiola and XeLaTeX on 22 Feb 2024 from source files dated 15 Apr 2023

e78882a0-8658-5bf1-903b-2f6c3e560076